

આલ્પવાનુ



শাহেরবানু

আবুল কালাম শামসুদ্দীন

পরিবেশক

ভারতী লাইব্রেরী
৬, বঙ্কিম চ্যাটার্জী স্ট্রীট
কলিকাতা-৯

নওরোজ কিতাবিস্তান
৪৬, বাংলাবাজার
ঢাকা

প্রকাশ—বৈশাখ, ১৩৬৪

প্রকাশক :

এ. হক

নবযুগ প্রকাশনী

২১ বি, নাসিরুদ্দীন রোড

কলিকাতা-১৭

প্রচ্ছদপট

খালেদ চৌধুরী

মুদ্রক :

শ্রীরামচন্দ্র দে

ইউনিয়ন আর্ট প্রেস

২৫বি, হিদারাম ব্যানার্জী লেন

কলিকাতা-১২

দাম আড়াই টাকা

বহুদিন ধরে এই বইখানি ছাপা ছিলো না। সম্প্রতি ‘নবযুগ প্রকাশনী’ কর্তৃপক্ষের সহযোগিতায় এর বর্তমান সংস্করণ আবার পাঠক-সমাজের কাছে উপস্থিত করা গেল।

গল্পগুলি নানা পত্র-পত্রিকায় প্রকাশিত হয়েছিলো এবং অধিকাংশেরই রচনাকাল তেরোশো পঞ্চাশ-একাল্ল সাল।

গ্রন্থটির প্রথম প্রকাশ ব্যাপারে বন্ধু নির্মলেন্দু গুপ্ত, মোজাম্মেল হক প্রভৃতি নানাভাবে সহায়তা করেছিলেন। তাঁদের কাছে আমি কৃতজ্ঞ। আর বিশেষ করে স্মরণ করি অগ্রণী বুক ক্লাবের দেবকুমার গুপ্ত ও প্রফুল্ল রায়কে যাঁদের উদ্যোগে অখ্যাতনামা লেখকের এই ক্ষুদ্র গল্প-সংকলনখানি প্রথম স্তম্ভীসমাজে নিবেদিত হবার সুযোগ পেয়েছিলো। এই বই আমাকে যে খ্যাতি ও প্রতিষ্ঠাটুকু দিয়েছে, তা তাঁদেরই চেষ্টায় সম্ভবপর হয়েছে। তাঁদের আমি ভুলবো না।

আর একটি কথা এই প্রসঙ্গে জানানো প্রয়োজন। আজাদ সম্পাদক আবুল কালাম শামসুদ্দীন সম্পূর্ণ ভিন্ন ব্যক্তি।

কামদেবপুর, বরিশাল
১লা বৈশাখ, ১৩৬৪

}

আবুল কালাম শামসুদ্দীন

শ্রীঅচিন্ত্যকুমার সেনগুপ্ত

ও

অমুরাগী বন্ধুদের করকমলে

শাহেরবানু

তাহাকে লইয়া সে এক মধুর স্বপ্ন-নীড় রচিবাব সংকল্প করিয়াছিল। তাহার দৈনন্দিন জীবনের প্রতিটি ক্ষণ শাহেরবানুময় হইয়া আছে। ক্ষেতে কাজ করিতে করিতে তাহারই কথা ভাবিয়া সে ভুলিয়া গিয়াছে পিঠিপোড়া রৌদ্রের জ্বালা, ভুলিয়া গিয়াছে ছুঃখবেদনাময় পৃথিবীর নির্ভুরতা। বিষাদমলিন মুহূর্তগুলিও তাহারই কেন্দ্রায়িত ভাবনায় কী এক ভাষা পাইয়া পরম মাধুরিম হইয়া উঠিয়াছে। ভাবিয়া অবাক হয় মাজেদ, কেমন করিয়া ঐ সপ্তদশী বালিকা তাহার হৃদয়ের সকল অন্তর্ভূতি এমন করিয়া জুড়িয়া বসিল।

মুখ খুলিয়া কাহাকেও সে একথা জানায় নাই। বন্ধু-বান্ধবদের মুখে এই ধরনের অনুরাগের কাহিনী শুনিয়া মাজেদ হাসিয়াছে, বিদ্রূপ করিয়াছে কতো। একটি ছেলে যে কোনো মেয়ের জন্ত এমন পাগল হইয়া উঠিতে পারে, তাহা কিছুদিন আগে পর্যন্ত তাহার ধারণার অতীত ছিল। কী করিয়া যে এমন আকর্ষণ জন্মিল যাহার জন্ত শাহেরবানুর ক্ষণিকের দেখার জন্তও সে উন্মুখ হইয়া তাহাদের বাড়ির কাছাকাছি ঘোরাঘুরি করে, ভাবিয়া মাজেদের বিশ্বাসের অন্ত নাই।

কখনো কখনো জোর করিয়া তাহার কথা মন হইতে মুছিয়া ফেলিবার চেষ্টা করিয়াছে, ভাবিয়াছে মাথার উপরে যে ছুঃখ-রাত্রির অন্ধকার ছাইয়া আসিতেছে, আর কোনোদিক খেয়াল না করিয়া এবার তাহা অপসারণের চেষ্টাই তাহাকে করিতে হইবে। সাংসারিক ছুঃখকষ্ট, নানা বাধা-নিবেধ প্রভৃতির কথা ভাবিয়া কখনো সে মনে মনে কঠিন হইবার

শাহেরবাহু

সংকল্প করিয়াছে, কিন্তু তবু শাহেরবাহুকে ভোলা তাহার পক্ষে সম্ভব হয় নাই। বরং সে যেন তাহার স্নকুমার সৌন্দর্য লইয়া তাহার কাছে আরো পরম কাম্য হইয়া উঠিয়াছে। আরো উগ্রতর হইয়াছে তাহাকে পাওয়ার ব্যাকুলতা।

সেদিন অতো ভোরে দুই হাঁড়ি মাছ বাঁকে বুলাইয়া শহরের পথে পা দিয়াছিল তাহারই জন্ত।

গাঙতীরের ধানক্ষেতের গা ঘেঁষিয়া পথ। দুইধারে ঘাস আর ঝোপঝাড়। ঘাসের ডগায় ডগায় গতরাত্রির শিশিরবিন্দু নীল রৌদ্রে চিকমিক করিয়া ঝলকাইতেছে। পথ কিছুদূর এইভাবে চলিয়া ক্রমান্বয়ে গ্রামের অভ্যন্তরে প্রবেশ করিয়া দুইপাশে পৌঁতা ঝাউয়ের সারি লইয়া শহরে ঢুকিয়াছে। 'চাঁই'তে ধরা কিছু কই খলিসা লইয়া, সকালবেলার এই বিজনপথে চলিতে চলিতে সে যে কী না ভাবিয়াছে তাহার ইয়ত্তা নাই। শহরের মাইল তিনেকের মধ্যে নদী হইতে খাল আসিয়া যেখানে পথটাকে দুই ভাগ করিয়া ফেলিয়াছে, সেখানে পৌঁছিয়া মাজেদ খেয়াল করিল—বেলা ইতিমধ্যে বেশ বাড়িয়াছে, তাহার আরো একটু দ্রুত চল। প্রয়োজন। নহিলে যাইতে যাইতে রৌদ্রে মাছ মরিয়া গেলে কেহ আর তাহা ছুঁইতেও চাহিবে না। সকল আশা নষ্ট হইবে। এক এক কুড়ি ছ' আনা করিয়া বেচিলেও পাঁচকুড়ি কই মাছের দাম হইবে—মাজেদ হিসাব করিয়া দেখিল—এক টাকা চৌদ্দ আনা। আরো যেসব খুচরা মাছ আছে তাহার দামও অন্যান্য আনা আটেক হইবে। মোট হইল দুই টাকা ছয় আনা। শাহেরবাহু তাহার সহইয়ের যে শাড়িখানার কথা উল্লেখ করিয়াছে তাহার দাম নাকি সওয়া পাঁচ টাকা। স্ততরাং বাকি টাকাটা সে কর্ত্ত করিবে। পুথের

পাশেই আছে হাশেম মোল্লার মুদিখানা। মোল্লা তাহার মায়ের দিক দিয়া কি রকম দূর সম্পর্কের জ্ঞাতি। দোকানপসার করিয়া অবস্থাটা বেশ সচ্ছল করিয়া লইয়াছে। তাহার কাছে গোটাতিনেক টাকা ধার চাহিলে নিশ্চয়ই পাওয়া যাইবে। শহরের বাজারে মাছের যেরকম দাম বাড়িতেছে, শোধ করিয়া দিতে তাহার সময় লাগিবে না।

তাহার মা বলিয়াছিল এই মাছ-বেচা টাকায় ধীরে ধীরে কাছারির বকেয়া খাজনাটা শোধ করিয়া দিতে। অনেক টাকা বাকী পড়িয়াছে, এখন হইতেই ধীরে ধীরে শোধ করিয়া না দিতে থাকিলে, কোন দিন কি বিপদ হইয়া যাইবে, তখন আর উদ্ধারের উপায়ও পাওয়া যাইবে না। সামনাসামনি মাজেদ তাহার কথায় সম্মতি দিয়া আসিয়াছে। দিতে বাধ্য হইয়াছে। এতো কষ্ট করিয়া জ্বলে কাদায় যে এই মাছ ধরিয়াছে অথ কাজের জন্ত—শাহেরবানুর জন্ত, সে কথা তাহাকে সে বলে কেমন করিয়া? অবশ্য এ টাকাটা যে কাছারিতে দেওয়া হইল না নায়েব প্রমুখাৎ সেকথা শীগ্গীরই সে জানিতে পারিবে। তখন? তখন যাহা হয় একটা ব্যবস্থা করা যাইবে।

আর মাও যে কিছু টের পায় নাই কে বলিবে? চালচলনে মাজেদ যে আজকাল অনেক গম্ভীর হইয়া উঠিয়াছে তাহাতে সন্দেহ নাই। মাঝে মাঝে সে লক্ষ করিয়াছে মা তাহার মুখের দিকে তীক্ষ্ণচোখে চাহিয়া আছে। টের পাইলেও ভালো, স্বতঃপ্রবৃত্ত হইয়া বলার দায় হইতে সে বাঁচিয়া যাইবে।

কিন্তু তাহার কথাবার্তায় যে আবার অন্তরকম মনে হয়। কখনো কখনো বিবাহের প্রসঙ্গ লইয়া মা কাছে আসিয়া বসে—অমুকের মেয়েটি বড় ভালো, তমুকের—। কাহাদের বাড়িতে নাকি আজকাল আসা যাওয়াও

শাহেরবানু

বাড়িয়া গিয়াছে তাহার। মাজেদের যখনই সম্মতি লইতে আসিয়াছে, সে সাক্ষ না বলিয়া দিয়াছে। মা অবাক হইয়া তাহার মনের অন্তঃস্থল পর্যন্ত অনুসন্ধান করিবার চেষ্টা করিয়াছে। মাঝে মাঝে মাজেদের মনে হয়, হয়তো কথাটা চাপিয়া রাখিয়া সে ভুলই করিতেছে, মাকে জানাইয়া দেওয়াই ভালো।

অথচ আজিকার এই শাড়ি কেনার ব্যাপারটা মায়ের কানে উঠিলে তাহার সংকোচের সীমা থাকিবে না। কিন্তু না, লজ্জাই বা কিসের? সে যদি কখনো জিজ্ঞাসা করে, মাজেদ মুখ নিচু করিয়া একদিন সব বলিয়া ফেলিবে। মা নিশ্চয়ই রাগ করিতে পারিবে না। সংসারের অগ্রাগ্র অভাব-অনটন সে জোয়ান মর্দ থাকিয়াও দূর করিতে পারিবে না?

আপাততঃ যে সম্ভাবনা নষ্ট হইয়া যাইতে বসিয়াছে তাহা রক্ষাই মাজেদের আশু কর্তব্য। এই উপহার দিয়া শাহেরবানু এবং তার মায়ের একটু সন্তুষ্টি আনুক, ইঙ্গিতে শাহেরবানুর মাকে অন্ততঃ তাহার দাবিটা তো জানাইয়া রাখুক। অবশ্য ইচ্ছা করিলে হয়তো এখনই বিবাহটা ঘটাইয়া ফেলা যায়, কিন্তু নানা অশুবিধায় সে ব্যবস্থা এখন বিছুতেই সম্ভব নয়। বিবাহে এটা ওটা—নানাপ্রকারে টাকা পয়সা প্রয়োজন। সে সব পাইবে কোথায়? কেবল কলেমা পড়াইয়া বউ ঘরে আনা নয়, দস্তুরমতো একটু আমোদ-আহ্লাদ করিয়া, কাসেম খাঁর নাকের উপর দিয়া শাহেরবানুকে ঘরে আনিতে হইবে। ভবিষ্যৎ কল্পনায় উৎসাহিত হইয়া মাজেদ বাঁকটা কাঁধ বদল করিয়া লইল।

অথচ দেৱীতে আবার দুর্ভাবনাও আছে। কাসেম খাঁ ওদিকে বড়ো

বেশি ঘোরাঘুরি আরম্ভ করিয়াছে। কিন্তু তাহার দৃষ্টি যে কোন্‌খানে, সেকথা শাহেরবানুর মা সবুরজান এতো ধুরন্ধর হইয়াও যে কেন বোঝে না ভাবিয়া মাজেদ বিস্ময় অনুভব করে। শাহেরবানুকে বিবাহ করিবার লোভ তাহারও আছে, কিন্তু তার চাইতেও বেশি লোভ অভিভাবকহীনা সবুরজানের সম্পত্তির উপর। জায়গা-জমি মামলা-মোকদ্দমা প্রভৃতি ব্যাপারে কাসেমও তাহার বাপের মতোই চালাক-চতুর, সবুরজানের সঙ্গে তাহার মাখামাখি বাড়িবার কারণও কতোকটা সেইখানে। অথচ ঐ কাসেমই যে সুযোগ পাইলে সবুরজানের মাথায় কাঁঠাল ভাঙিবে না, সেকথা কে বলিবে? বুড়ী ওর ছদ্ম আত্মীয়তায় ভুলিয়া বসিলেই তো সর্বনাশ! সম্পত্তির পরোয়া সে করে না, কিন্তু শাহেরবানুকে সে পাইবে না, সে হইবে ঐ কাসেমের অঙ্কণায়ী, একথা ভাবিতেও তাহার মন উত্তপ্ত হইয়া ওঠে। মুখ বিকৃত করিয়া সে আপন মনেই বলে : আরে বাপু, তুমি ঘোরাঘুরি যতোই করো, আসল কথাতো শাহেরবানুর পছন্দ লইয়া। কয়েক ‘কুড়া’ জমি না হয় কাসেম খাঁর আছে। কিন্তু রূপ? ঐ তো কালিবকের মতো চেহারা। উহাকে পছন্দ করিবে কি দেখিয়া? সম্পত্তি দিয়াই যদি গুণাগুণ বিচার করে, তবে পাশের গ্রামের বৃদ্ধ করমালীর প্রস্তাব সবুরজান প্রত্যাখ্যান করিল কেন? আর শাহেরবানুও যে কাসেম খাঁকে দেখিলে কিরকম টিটকারীতে মুখর হইয়া ওঠে, তাহাও মাজেদ জানে। মাজেদ তাহার সব কিছু আনন্দ আর ভরসা তো পায় সেইখানেই।

নিশ্চয়ই, মাজেদ রূপের তুলনায় তাহার সঙ্গে অতুলনীয়। এ তাহার নিজের অহংকার নয়, ছেলেবেলা হইতেই শুনিয়া আসিতেছে তাহার

নাকি রাজপুত্রের মত চেহারা। বড়োমিয়ার ছেলে একদিন বলিয়া-
ছিল : শহরে জামা জুতো প'রে বেরোলে কে বলবে তুমি কোনো
বড়ো ঘরের ছেলে নও ? অবশ্য গর্ব করিবার মতো রূপ হয়তো
এখন আর নাই। বাপ মরিবার পরে অনবরত কাদা রৌদ্র জলে খাটিয়া,
অস্থখে বিস্থখে ভুগিয়া, গায়ের সেই উজ্জল লাবণ্য তামাটে চামড়ার
আড়ালে ঢাকিয়া গিয়াছে, দেহের সেই মাংসল বিশালতাও যেন শীর্ণ
হইয়া আসিয়াছে। আর্থিক অবস্থা কাসেমের তুলনায় তাহার একটু
খারাপই। এবার এই আকালের বৎসরে সকলের ঘরেই অল্পবিস্তর
টানাটানি চলিতেছে। এট রাজায় রাজায় যুদ্ধে উহার বিনাশ হইয়া
থামুক, তারপর দেখা যাইবে কাসেম খাঁর চাইতে স্বন্দর ঘর-সংসার
জায়গা-জমি সে গুছাইতে পারে কিনা। জীবনের এখনো কতো
বাকি ; তাহার দুঃখের সংসারকে নতুন করিয়া গড়িয়া তুলিবে না সে !
শাহেরবানুকে লইয়া একটি ছোট্ট সচ্ছল সংসার গড়িয়া তুলিবে, শত
প্রতিকূলতা সত্ত্বেও সে নিজের বাহ ও বুদ্ধির শ্রমে প্রকৃতির ভাণ্ডার
হইতে সম্পদ আনিবে, শাহেরবানু কর্তৃত্ব করিবে—কতো রঙীন কল্পনা
তাহার সন্মুখে প্রসারিত হইয়া রহিয়াছে। বউ শাহেরবানুর ঘোমটা-
টানা শরমাতুর মুখ, তাহার লঘুপায়ের আসাযাওয়া, চুড়ির রিনিঝিনি,
সমীহ, ব্রীড়া—ভাবিতে ভাবিতে মাজেদের মন এক মধুর পুলকের
আস্বাদে উদ্দীপিত হইয়া ওঠে। সে একটা গাছের নিচে দাঁড়াইয়া
বাঁকটা নামাইয়া বিশ্রাম করিয়া লয়।

কিন্তু ভাগ্য যেন তাহার সব আশার মূলে কুঠার হানিবার জ্ঞপ্তি
প্রাপ্ত হইয়া আছে। কাল সকালে খালে মাছ ধরিতে গিয়াছিল ;
সেখানে সিকু মাঝির সঙ্গে দেখা। কথায় কথায় চোখ ঠারিয়া সিকু

প্রশ্ন করিল : ওদিকের কী করলা ? কাসেম খাঁ সবুরজানকে যে প্রায় হাতের মুঠে আইত্তা ফেলাইলো ।

সিকু এককালে পাঠশালায় প্রথমপাঠের সময় তাহার সহপাঠিত্ব না করিলেও সহবেক্ষিত্ব করিয়াছিল । খুব তুখোড় ছেলে । হয়তো উহাদের বাড়িতে মাজেদের আসাযাওয়া দেখিয়া সে কিছু অনুমান করিয়া লইয়াছে । মাজেদ তাহার প্রশ্নে একটু সঙ্কুচিত হইয়া পড়িলেও তাহার শঙ্কার চাহনি সিকুর চোখ এড়ায় নাই । সিকু যুছু হাসিয়া আরও বলিয়াছিল : তোমার পছন্দের তারিফ করি । কিন্তু শোনো, সবুরজান কি চায় বোঝো তো ? কাপুড়-চুপুড়, টাকাপয়সা, এটাওটা দিয়া টিয়া ওকে হাতে রাখো, নইলে কিন্তু ফসকাইবে । এই সিকু একটা কথা কইলে, রাইখ্যো, নইলে দেইখ্যো শেষে পস্তাবা । পরে স্বর নামাইয়া ফিসফিস করিয়া কহিল : কাইল কাসেম আমারে কি কইলে জানো ? কয়, বড়িরে ভুলিয়ে ভালিয়ে হাত করার চেষ্টায় আছি । ওরে একবার ভিজাইতে পারলে বিয়ের কথা তোললে আর না বলতে পারবে না ।

সিকু আর কি বলিয়াছিল মাজেদ শোনে নাই । মনটা হঠাৎ হিংস্র হইয়া উঠিয়াছিল, আর মাছ ধরায় মন বসিল না । সিকু চলিয়া যাইবার পর জালটাকে কাঁধে ফেলিয়া বিমর্ষ মনে বাড়ি ফিরিয়া আসিল ।

বাড়ি ফিরিয়া সারাটা দুপুর অশ্রুমনস্কভাবে এটা-ওটা করিয়া, মায়ের কাছে কয়েকবার বলি বলি করিয়া ইতস্ততঃ করিবার পর খানিকক্ষণ এদিক ওদিক, এবাড়ি ওবাড়ি উদ্দেশ্যহীনভাবে ঘুরিয়া বেড়াইয়া, সামান্য কারণে অনর্থক ছোট বোনের গালে একটা চড়

শাহেরবানু

কশাইয়া, ডিঙি লইয়া উহাদের বাড়ির দিকে রওনা হইয়া গেল।
মাকে বলিয়া গেল : তালতলার হাট দিয়া একবার ঘুরাইয়া আসি।
কচুরাপানা-ভরা মরা খাল বাহিয়া শাহেরবানুদের ওখানে পৌঁছিতে
বেলা পড়িয়া গেল। সবুরজান তাহাকে আদর-আপ্যায়ন মন্দ
করিল না।

কৌশল করিয়া মাজেদ কথা বাহির করিয়া লইল। সবুরজান হাসিয়াই
বলিল : পাগল ! কাসেমের সঙ্গে বিয়ার কোনো কথাই ওঠে নাই।
তবে অন্য কোথাও যদি ভালো সম্বন্ধ না জোটে তবে—

গোল্লায় যাউক সে তবে। মাজেদের সমস্ত মন আবার প্রফুল্ল হইয়া
উঠিল। এদিক ওদিক চাহিয়া কয়েকবার শাহেরবানুর খোঁজ করিয়া
সে উঠিয়া পড়িল। শাহেরবানুকে অন্ততঃ একবার দেখার গোপন
ইচ্ছা থাকিলেও, অনর্থক দেৱী করিলে সবুরজান আবার কিছু ভাবিয়া
বসে সেই সংকোচে, আর তাহা ছাড়া সন্ধ্যাও হইয়া আসিয়াছে
বলিয়া, মাজেদ বিদায় লইয়া আসিল। ভাবিল, যাউক, সেও এবার
কাসেমের পথ ধরিবে। আর মাকে দিয়া একবার—

ভাগ্য তাহার ভালো ছিল। উহাদের বাগানে অপ্রত্যাশিতভাবে
শাহেরবানুর সহিত দেখা হইয়া গেল।

সন্ধ্যা তখন আসন্ন ; হাজীবাড়ির মসজিদ হইতে আজানের ডাক
উদাত্ত হইয়া উঠিয়াছে। মাজেদ শাহেরবানুকে দেখিয়াই থমকিয়া
দাঁড়াইয়া পড়িল। শিউলিফুলের বোঁটায় রঙকরা একখানা হলুদরঙের
কাপড়ে তাহার গৌর কিশোরী তনু মাজেদের চোখে যেন এক অপক্লপ
সৌন্দর্যের মতো দেখাইল।

সে আঁকসী দিয়া ‘কাফিলা’গাছের উপর হইতে খুব সম্ভব বয়সটি

পাড়িতেছিল। মাজেদের সঙ্গে চোখাচোখি হইতেই ছইজনেই একটু লজ্জিত হইয়া চোখ নামাইল। প্রথমটা মাজেদ কোনো কথা না বলিয়াই চলিয়া যাইবে স্থির করিয়াছিল, কিন্তু খানিকদূর গিয়াই আবার ফিরিয়া আসিল, কি বলিবে ভাবিয়া, ইতস্তত করিয়া, সে প্রায় ঘামিয়া উঠিল।

: কথা না কইয়াই যে বড়ো চলিয়া যাইতে আছিলেন?—শাহেরবানুই তাহাকে বাঁচাইল।

: বাড়িতে কাজ আছে কিনা, তাই—মাজেদ হাসিল—ভালো আছো তুমি?

লম্বা ঘাড় কাৎ করিয়া তাহার প্রশ্নের জবাব দিয়া শাহেরবানু আবার প্রশ্ন করিল : কী এমন কাজ? কখন আইলেন জানতেও তো পারলাম না।

মাজেদ খুশি হইয়া গেল; কহিল : অনেকক্ষণ, তোমারে—বলিতে যাইয়াই মাজেদ আবার চুপ করিয়া গেল। ‘তোমাকে খুঁজিয়াছি’ একথাটি যেন মুখে আটকাইয়া গেল।

: কী আমারে? কয়েন।

: কিছুনা; এই আজকাল তো পর্দানশীন হইয়া গেছো, আইলেই বা কেমন করইয়া জানবা?—বলিয়া মাজেদ হাসিল, কিন্তু ইহার পর আর কি বলিবে ভাবিয়া পাইল না। একটু ইতস্ততঃ করিয়া আবার কহিল : আইজ তাইলে আসি।—বলিয়া ছুঁপা বাড়াইয়া সে আবার ফিরিয়া আসিল : একটা কথা তোমারে জিজ্ঞাসা করতাম, রাগ করবা না তো?

: কি?—হাসিমুখে শাহেরবানু ফিরিয়া চাহিল।

শাহেরবান্ন

: তোমার মায়ের হয়তো ইচ্ছা কাসেম খাঁর সঙ্গে তোমার বিয়া দেবেন ।
তোমারো সেই ইচ্ছা নাই তো ?

শাহেরবান্নর আঁকসী গাছেই বুলিয়া রহিল, সে লজ্জায় মুখ নামাইল ।
তাহাকে নিরন্তর দেখিয়া মাজেদ বলিতে লাগিল : আমি জানি,
তোমার মত নাই । কিন্তু সেরকম কোনো চেষ্টা হইলেও তুমি বাধা
দেবা, অমত করবা । বলো, অমত করবা ।—মাজেদের কণ্ঠে অগ্নয়ের
স্বর ফুটিয়া উঠিল ।

শাহেরবান্ন আর মুখ তুলিল না, ঘাড় নাড়িয়া সম্মতি জ্ঞাপন
করিল ।

খুশির উল্লাসে মাজেদের বুক ভরিয়া গেল । ইহার পরই সে অকস্মাৎ
প্রশ্ন করিল : তোমারে যদি আমি একখান শাড়ি দিই, নেবা ?

শাহেরবান্ন মুহূর্তের জন্য চক্ষু তুলিয়া তাকাইল ।

মাজেদ তাহার উত্তরের অপেক্ষা না করিয়াই আবার প্রশ্ন করিল :
কেন নেবা তাই ভাবতে আছো ? ধরো, আমি তোমারে এই—এই—
এমনিই দিতে চাই । আচ্ছা, সে কথা না হয় আরেকদিন কয় । কী
রকম কাপড় তোমার পছন্দ কও তো ?

: বাঃ ! শুধু শুধু আপনার কাপড় আমি নিমু কেন ? মায়ের কী
কয় ?

মাজেদ দমিয়া গেল ।

: সে আমি জানিনা । তোমারে দিমু, আর তোমার তা নিতেই
হইবে ।

মাজেদের জেদ দেখিয়া শাহেরবান্ন হাসিয়া ফেলিয়াই আবার গম্ভীর
হইয়া গেল ।

মাজেদ কহিল : মায়ে কইতে হইবে না ।

: বাঃ, সে জানবে না ?

: জানলে কবা, আমি আমার জমানো পয়সা দিয়া কিনছি । আমিই যে তোমারে দিছি সেকথা কাউকে জানাইও না । কেন তোমারে দিতে চাইছি, সে কথা আজ না, আরেক দিন কয় । এবার বলো, কী রকম কাপড় তোমার চাই ?

বহু পীড়াপীড়ি করিয়া অবশেষে মাজেদ তাহার পছন্দের কথা জানিয়া বলিল : কাইল ঠিক এমন সময় শাড়ি নিয়া আমি এখানে আসমু, কেন দিমু সেকথাও কাল কয় । কাল সন্ধ্যায় আমার জন্ত এখানে অপেক্ষা করবা বলো ?

: আচ্ছা ।—শাহেরবাহু মাথা নিচু করিয়া মৃদুস্বরে তাহার সম্মতি জানাইল ।

মাজেদ দেখিল সন্ধ্যার আকাশের মতোই শাহেরবাহুর সমস্ত মুখখানা লালিম হইয়া উঠিয়াছে । চলিয়া যাইবার জন্ত সে পা বাড়াইতেই মাজেদ কি মনে করিয়া ডাকিল : শোনো ।

: কি ?

শাহেরবাহু পরিপূর্ণ চোখ মেলিয়া তাকাইল । চোখের কোণে যেন একটু শঙ্কা নাচিয়া উঠিল ।

বিব্রত মাজেদ দুই পা আগাইয়া আবার থামিয়া গেল ।

: থাউক, আজ না, কাইল কয় ।—বলিয়া মাজেদ দ্রুতপদে চলিয়া আসিল ।

ঘাটে আসিয়া নায়ের শিকল খুলিয়া শাহেরবাহুকে মনের কথা জানাইবার চেষ্টায় সে একটা গান ধরিয়াছিল :

শুন শুন সুন্দর কথা

দরদ যদি থাকে,

আমার লাইগ্যা ভাইবো। ক্ষণেক

চাইয়া গাঙের বাঁকে ।

সেকথা মনে করিয়া মাজেদের এখন হাসি পাইল ।

চলিতে চলিতে সে তখন শহরের পাকারাস্তায় পা দিয়াছে । এখান হইতে শুরু হইয়াছে কোম্পানীর আমলে লাগানো ঝাউ-গাছের সারি । খাল বাঁক ঘুরিয়া অন্তদিকে চলিয়া গিয়াছে । পথ ক্রমান্বয়ে নদীর নিকটবর্তী হইয়া চলিয়াছে । নদীর চরে ধানক্ষেত, তাহার কিনারায় চওড়া সোজা রাস্তা । মাজেদের সাড়া পাইয়া খালের উপরকার পুলের গোড়ায় ঝোপের পাশে বসা বক আর গাঙশালিকেরা সশব্দে কিছুদূর উড়িয়া যাইয়া আবার বসিল ।

ভোরের রৌদ্র তখন ক্রমান্বয়ে খরতর হইয়া উঠিতেছিল ।

আরো কিছুক্ষণ চলার পরে মাজেদ হাশেম মোল্লার দোকানে পৌঁছিয়া গেল ।

রাস্তার পশ্চিম পাশে ছোট্ট টিনের চালায় মুদীখানা, পিছনে পুকুর, আর আছে সেই পুকুর ঘিরিয়া কয়েকঘর বসতি ।

একটি বৎসর আটেকের মেয়ে রাস্তার তারের খুঁটির দিকে চাহিয়া বসিয়া-ছিল । দোকানে আর কেহ ছিল না । মাজেদকে এদিক ওদিক তাকাইতে দেখিয়া বিজ্ঞ দোকানীর ভঙ্গীতে সে শুধাইল : কী চায়েন ? মাজেদ কোঁতুকে তাহার দিকে তাকাইল : তুমিই দোকানদার ? বেশ, বেশ !

মেয়েটির ছোট্ট মুখে একটু সলজ্জ হাসি খেলিয়া গেল ।

মাজেদ বসিয়া গামছায় খানিকক্ষণ গায়ের ঘাম মুছিল, পরে চোখ তুলিয়া দেখিল, মেয়েটি তখনো তাহার দিকেই তাকাইয়া আছে । হাসিয়া কহিল : এটু পানি খাওয়াও তো মণি । মোল্লা কোথায় ?

মেয়েটি হাতবাক্সের কাছ হইতে উঠিয়া আসিল ; সলজ্জস্বরে বলিল : পাস্তা খাইতে গেছে । আপনে বসেন, আমি পানি নিয়া আসি ।

মাজেদ হাঁড়ি দুইটার ঢাকনি খুলিয়া মাছগুলোর অবস্থা পর্যবেক্ষণ করিয়া গামছা নাড়িয়া হাওয়া খাইতে খাইতে হাশেমের দোকানের চতুর্দিকে দৃষ্টি বুলাইতে লাগিল । যুদ্ধের বাজারে ফাঁপিয়া হাশেম দোকানখানাকে আরো বিস্তৃত করিয়া তুলিয়াছে । দুই বৎসর আগে দোকান কী ছিল, আর আজই বা কেমন হইয়াছে !

অকস্মাৎ মাজেদের সঞ্চরমান হাতখানা থামিয়া গেল । চোখের দৃষ্টি একাগ্রলক্ষ্যে উজ্জল হইয়া উঠিল ।

টাকার ভাবনা সে করিতেছে, ঐ হাতবাক্সের মধ্যেই হয়তো তাহার অন্ত নাই । কাছাকাছি কেহ কোথাও নাই, মেয়েটিও তাহাকে চেনে না । এই সুযোগে ওটা লইয়া সরিয়া পড়িলে কেমন হয় ?

টাকা ! শাহেরবানুকে একান্ত আপন করিয়া লইতে বিলম্ব হইবে না, তাহাকে হারাইবার দুশ্চিন্তা থাকিবে না, দারিদ্র্য ঘুচিবে, ধার-কৰ্জ শোধ করিয়া বন্ধক জমি ছাড়াইতে পারিবে, কাছারির পেয়াদা নালিশের ভয় দেখাইবে না, সম্পদ আসিবে, চাই কি হাশেমের মতো এই একটা দোকান—জাজ্জল্যমান ভবিষ্যৎ যেন তাহার চোখ ঝলসাইয়া দিল ; আর তাহারই আকর্ষণে মাজেদ এদিকওদিক চাহিয়া দ্রুতপদে হাত-

শাহেরবানু

বান্ধের কাছে আগাইয়া গেল। অজ্ঞপ্ত আছে হাশেমের, এই সামান্য অপহরণে কতোটুকু ক্ষতি হইবে তাহার !

পানি লইয়া মেয়েটি ফিরিয়া আসিল।

: বাঃ, হাতবান্ধ ধরছো কেন ? ওকি, বান্ধ নেও কেন ?

মাজেদের মতলব বুঝিয়া সে চিৎকার করিয়া উঠিল : বাজান, শিগ্গীর আসো, হাতবান্ধ চুরি করইয়া নিয়া যায়।

প্রথম চুরির উদ্বেগ এবং উহার চিৎকারে মাজেদ দিশেহারা হইয়া পড়িল। এইভাবে আজ এখানে ধরা পড়িলে কি অবস্থা হইবে ভাবিয়া মুহূর্তের মধ্যে তাহার বুদ্ধি লোপ পাইয়া গেল, মনে হইল চতুর্দিক হইতে যেন অপমান ও লাঞ্ছনার অন্ধকার তাহাকে ঘিরিয়া ছুটিয়া আসিতেছে। যেন উপায়হীন হইয়া ছুটিয়া আসিয়া সে পাল্লার একটা ভারি ওজন লইয়া, মেয়েটিকে নিবৃত্ত করিবার অক্ষম চেষ্টা করিয়া, অবশেষে এক প্রচণ্ড আঘাতে তাহার মাথায় বনাইয়া দিল।

মেয়েটি আর চিৎকার করিল না এবং আঘাতের সঙ্গে সঙ্গেই সে পড়িয়া গেল। ঘড় ঘড় শব্দে গলার কাছে কী এক ব্যাকুল আকুলতা নিঃশেষ হইয়া রক্তের স্রোত নামিয়া আসিল। ফিনকি দিয়া উষ্ণ রক্ত ছুটিয়া মাজেদের দেহ ভিজাইয়া দিল।

মাজেদের চক্ষু বিস্ফারিত হইয়া গেল ; বাঁ হাতের বগল হইতে হাতবান্ধটা সশব্দে নিচে পড়িয়া গেল। ও কে ছুটিয়া আসিতেছে, হাশেম মোল্লা ! ভয়ে ও আতঙ্কে মাজেদ হিম হইয়া গেল।

সম্মিৎ ফিরিয়া পাইয়া মাজেদ দিকবিদিকহারা হইয়া পিছনের দরজা ঠেলিয়া বাহির হইয়া জ্ঞানশূন্যের মতো পুকুরে ঝাঁপাইয়া পড়িল।

তখন হাশেম এবং আরো দুই একজন ছুটিয়া দোকানে আসিয়াছে,

তাহাদের ব্যাকুল প্রশ্নের কোনো জবাব কেহ দিতে পারিল না।
মেঝেতে মেয়ের নিষ্পন্দ দেহ রক্তে ভাসিতেছে, তাহার পায়ের কাছে
হাতবাক্স। ব্যাপারটা বুঝিয়া হাশেম ক্ষিপ্ত বাঘের মতো লাফাইয়া
উঠিল। ‘কোথায় গেলে সে শালা’—বাঘের মতোই গর্জন করিয়া
চালে গৌজা মোটা লোহার ফলকওয়ালা কোঁচটা টানিয়া সে দোকানের
বাহির হইয়া গেল।

: ঐ, ঐ পুকুরে ডুব দিয়া আছে।

শোরগোল উঠিল। হাশেম পুকুর পাড়ে ছুটিয়া আসিল; তাহার অশ্লীল
উন্মত্ত গালাগাল, বিলাপ এবং লাফালাফিতে সমস্ত পাড়া ভয়ঙ্করভাবে
মুখর হইয়া উঠিল। তাহার মাথায় যেন খুন চাপিয়া গিয়াছে।

: ওরে আমি মাছের মতো গাঁথমু।

পর পর দুইটা খুন হইতে চলিয়াছে দেখিয়াও কেহই তাহার
সেই উন্মত্ত হিংস্র মূর্তির কাছে আগাইয়া যাইতে সাহস করিল
না।

জলের মাছের প্রতি লক্ষ রাখিয়া ‘কোঁচ’ হাতে শিকারী যেমন
স্বযোগের প্রতীক্ষা করে, হাশেমও হিংস্রচোখে পাড়ে পাড়ে ঘুরিয়া
সেইমতো স্বযোগের প্রতীক্ষা করিতে লাগিল। কলমিলতার আন্তরণ
ঠেলিয়া ‘শালা’ কি শ্বাস লইবার জ্ঞাও মাথা তুলিবে না!

হয়তো তাহারই জ্ঞা একটা স্থানের কলমিলতা একটু নড়িয়া
উঠিয়াছিল। কিন্তু হাশেমের লক্ষ্য বার্থ হইবার নহে। পর মুহূর্তেই কাহার
ছটফটানিতে জল আলোড়িত হইয়া উঠিল; বলকে বলকে রঙীন রক্ত
চারিদিক ছড়াইয়া পড়িল, তাহারি এক বলক ছুটিয়া আসিল হাশেমের
মুখে। কিন্তু সেদিকে তাহার জ্রঞ্জেপ নাই। সে সেই রক্তরঙীন

শাহেরবাহু

মুখে, প্রচণ্ড উল্লাসে কৌচ ঠাসিয়া ধরিয়া, পাড়ে দাঁড়ানো জনতার
দিকে চাহিয়া হা হা করিয়া বুকফাটা হাসি হাসিয়া উঠিল। অবশেষে
মস্তকে কৌচবিদ্ধ দেহটা সে টানিয়া তুলিল।

মাজেদের কণ্ঠে স্বর ছিল না, প্রাণের কোনো কাকুতি ছিল না।
হাত পা আর দুইটি ঠোঁট থরথর করিয়া কাঁপিয়া ছড়াইয়া একসময়
নিখর হইয়া আসিল।

যে চক্ষু এই কিছুক্ষণ আগেও শাহেরবাহুর স্বপ্ন দেখিয়াছে তাহার
একটা কোটরাগত এবং অশ্রুটা একটা কৌচের ফলার মাথায় বসিয়া
যেন মাজেদেরই নিষ্পন্দ দেহটার দিকে জিজ্ঞাসার মতো তাকাইয়া
ছিল; এবং তাহারই গা বহিয়া বিন্দু বিন্দু রক্ত চুঁয়াইয়া পড়িতেছিল।
কাঁদিতেছিল কি?

ইতিকথা

আজকালকার এমন দিনে নীতিধর্মের শিকল প’রে ভালোমানুষী করা যে আত্মহত্যারই সামিল, সুতরাং বোকামি, একথা জরিনা হোসেনকে হাজারবার বোঝাতে চাইলেও সে স্বীকার করেনি ; তাছাড়া করিম খাঁর সঙ্গে তার তুলনা দেওয়াতেও সে অত্যন্ত ক্ষুব্ধ হয়ে পড়েছিলো ।

করিম এগ্রামের সর্বজনচেনা নিশাচর চোর । রোজরাত্রে গ্রামের বুকচিরে প্রবহমান খালে তার ছোটো ডিঙিখানা সন্তর্পণে নিশীথের অভিসারে বেরোয় । কোথায় যায় কী করে অন্ধকারে জানা না গেলেও, ভোরের বেলা আশেপাশের গ্রামের বাগানের মালিকেরা দেখে তাদের বাগানের নারকেল, সুপুরি সাফ হয়ে গেছে ; আর কচিং কেউ কখনো দেখে ফেলে যে, বন্দরের দিক থেকে করিম নিশ্চিন্তমনে নৌকো নিয়ে বাড়ি ফিরছে—নৌকোর মধ্যে হোগলাপাতায় ঢাকা হরেকরকম সওদা ।

চালের দর পৌঁছেচে চল্লিশে । গ্রামের অনেক পরিবার গাঁয়ের মাটির আকর্ষণ ছেড়ে খাওয়ার সন্ধানে এদিক-ওদিক চলে গেছে, কেউ কেউ অনন্তোপায় হয়ে সৈন্সদলে নাম লিখিয়েছে । এমন নিকরুণ অবস্থার মধ্যেও মাত্র কয়েক ‘কুড়া’ জমির মালিক করিম খ্রী পুত্র নিয়ে বেশ স্বচ্ছন্দে আছে দেখে জরিনা মুগ্ধবিস্ময়ে তার প্রশংসা করে । মনে মনে ভাবে যে, হ্যাঁ এইরকম লোকই আজকালকার স্বার্থপর জগতে বাঁচবার উপযুক্ত ।

সেদিন ভোরে রোজকার মতো পাশের খাল দিয়ে করিমের নৌকো

ছিপ ছিপ শব্দতুলে চলে যাবার পর সে শুয়ে শুয়ে হোসেনকে এই কথাটাই বলেছিলো। হোসেন অত্যন্ত ভালোমানুষ, (অবশি জরিনা মনে মনে তাকে বোকা ছাড়া অন্য কিছু ভাবে না) তার মতো সরল নিরীহ মানুষ যে সারা বাহাছরপুর গ্রামে আর দ্বিতীয়টি নেই, সে সম্বন্ধে যুনিয়ন বোর্ডের প্রেসিডেন্ট থেকে শুরু করে পাগল জয়নুল্লা পর্যন্ত সকলেই একমত। সাংসারিক অবস্থা তার খুবই খারাপ, কিন্তু তবুও খোদার দয়ার উপর অসীম বিশ্বাস রেখে খেয়ে না খেয়েও সে ঘোর দুর্দিনে বিপাকের মধ্যেও প্রাণধারণ করে আসছিলো। যে কাজে প্ররোচনা দিতে চাইছে জরিনা, তাতে ক্ষুব্ধ হবার যথেষ্ট কারণও ছিলো তার। না হয় একবেলা খুদের জাউ খেয়েই আজকাল তাদের দিন গুজরান হচ্ছে, হতে পারে ভবিষ্যতের দিনগুলো আসছে অনাহারের বিভীষিকা নিয়ে। কিন্তু তাই বলে কি সে বাপদাদার মুখে কালি লেপে চুরি করতে নামবে ছিঁচকে চোর করিমের মতো! খানিক চুপ করে থেকে গবিত গলায় বলেছিলো : বউ, খোদা বলইয়া কেউ নাই ভাবো? পাপপুণ্যের হিসাব কি একদিন হইবে না?

জরিনা যেন সমস্ত বিরুদ্ধ যুক্তিতর্ক ভ্রূ নাচিয়ে উড়িয়ে দিতে চেয়েছিলো। : ছনিয়াতে বাঁচার কথা আগে, তারপর তোমার পাপপুণ্যের কথা কইও। মুখপোড়া খোদা থাক বা না থাক, (হোসেন চমকে উঠেছিলো) দেখছ না, না খাইয়া মরইয়া থাকলেও তার এতোটুকু আসবে যাইবে না। তোমার অমন ধর্মপ্রাণা মা চিকিৎসার অভাবে কী যন্ত্রণা পাইয়া মরইয়া গেলেন। গাঁয়ের কতোলোক কতো দুঃখকষ্টে ব্যারামে উজাড় হইয়া যাইতে আছে, তবু খোদাতালা কতোটুকু দয়াবৃষ্টি করলেন?

হোসেন থতোমতো খেয়ে হতভম্ব হয়ে তার দিকে তাকিয়ে খোঁকেছে

কিছুসময়। তারপর উঠে তামাক সেজে গোটা দুই টান দিয়ে জোর গলায় বলেছিলো : কী যে কও, গরীবের ভরসাই তো খোদাতালা। : থাকো সেই ভরসায়, তার এইতো ফল ! হাতেনাতে পাইতে আছি। ঘরে চাউল নাই, পরনে কাপড় নাই, জমিজমা যাইতে আছে শত্রুরের পেটে—দুর্ভাগ্যের অসংখ্য নজীর দেখিয়ে জরিনা বলে : কোন্ দোষে তোমার এমন অবস্থা হইলে বলো ? উঠতে বইতে অষ্টপ্রহর দেখি খোদার নাম নেও।

হোসেন একথার কোনো জবাব দিতে পারেনি। সত্যি তার মাও গতভাঙ্গে বড়ো কষ্ট পেয়ে মারা গেছে। গ্রামে কারো কাছে একটা টাকাও ধার মেলেনি, চাইতেও সাহস করেনি। ঋণের বোঝা অনেক বাড়িয়েছিলো বলে, মানুষের দয়া তো মিললোই না, না খোদার করুণা। একুশ দিন ভুগে আল্লার নাম স্মরণ করতে করতে তিনি চোখ বুজলেন, কিন্তু তবু আল্লা তাকে এতোটুকু দয়াও কেন করলেন না কে তা বলবে ? হতে পারে হয়তো তারই কোনো দোষের জন্ম। মায়ের জোয়ান ছেলে সে, তারই তো উচিত ছিলো তাকে সবরকমে সুখেযত্নে রাখা। কিন্তু সে রকম ক্ষমতা কই তার ? খোদাতালা। যেরকম তার কপাল গড়েছেন—হোসেন অকস্মাৎ সে চিন্তা ছেড়ে দিয়েছিলো, হুঁকোয় কয়েকটা টান দিয়ে জরিনার দিকে তাকিয়ে আবার বলে উঠেছিলো : পাপের কড়িতে কোনোদিন আসান নাই। দেখো না মদন মাঝিগো অবস্থা ! ডাকাতি করইয়া জমিদার হইলে, দৌধি কাটাইলে, উঠাইলে পাকাবাড়ি। কিন্তু এখন ? সে বাড়িতে বাড়ি দেবার আছে কেউ ? পাপের ধনে কখনো আসান নাই। খোদার গজব একদিন পড়বেই।

এতো জ্বলন্ত উদাহরণ দেওয়ায় জরিনা সহসা উত্তর দিতে পারেনি। মদনমাঝির পোড়ো বাড়িটা তার চোখের সামনে ভেসে উঠেছিলো। তার বংশধরেরা এখন নাকি শহরের পথে পথে ভিক্ষা করে বেড়ায়— তা হোসেন স্বচক্ষে দেখে এসেচে। এ গ্রামের সেরা সুন্দরী ছিল মদনমাঝির এক নাতনী, কতো কাহিনী জড়িয়ে আছে তার নামের সঙ্গে। সেও নাকি পেটের দায়ে বেষ্টিত গুরু করেছে কাছের এক বন্দরে। কিন্তু এ ছরবস্থা যে মদনমাঝির পাপের ফল, একথা মনে নিতে জরিনার মন সায় দেয় না। খানিকপরে একটা গভীর নিঃশ্বাস ত্যাগ করে সে বলে উঠলো : করিম খাঁ তো বেশ আছে। আমাদের ভালোমানুষীতে মরণ ছাড়া গতি নাই।

হোসেন হুঁকোটা রেখে আবার শুয়েছে তখন। ভোরে একটু জ্বলো হাওয়া দিয়েছে সেদিনে ; বেশ শীত শীত লাগছিলো। জরিনার কথায় সে বিরক্তিভরে তার দিকে তাকালো। ওকথার অন্তরালে যেন করিম খাঁর স্মৃতি। আপন স্ত্রীর মুখে পরপুরুষের প্রশংসা, কোথায় যেন তার স্বামিভক খাটো করে তোলে। জরিনার সমস্ত কথা, কল্পনা-কাজ, ধ্যান-জ্ঞান একমাত্র তাকে ঘিরেই থাকুক, এই-ই তার কাম্য। এ তার এক দুর্বলতা। স্বামীর প্রতি একান্তভাবে মনোযোগকেই সে সাধ্বী স্ত্রীর একমাত্র মাপকাঠি বলে মনে করে। কিছুক্ষণ সে ক্ষুণ্ণমনে চুপ করে রইলো ; তারপর যেন জরিনাকে আঘাত দেবার ছলেই বললে : বউ, ছেলেমেয়ে কোলে থাকলে বুঝত। নইলে যে পাপ করলে বংশের বাতি নেভে, আমারে কক্ষনো সে কাজ করতে বলতান।

জরিনার মুখে আর কথা জোগালো না, আড়ষ্ট হয়ে সে শুয়ে রইলো। বিরক্তও হোলো খানিকটা। সে বক্ষ্যা। এজ্ঞা নিজেও সে কর্ম ঝুংখিত

নয়। তবু হোসেন একথাটা নিয়ে যখনতখন এভাবে খোঁটা দেয়। দুঃখ দেবার জগুই কি ?

কিছু সময় দুজনেই চুপ করে থাকার পরে জরিনা গজ গজ করতে করতে বিছানা ছেড়ে উঠে গেল : করো শুইয়া শুইয়া পাপপুণ্যের হিসাব, ফসলের এখনো দুমাস দেরি। এতোদিন যদি কাইল্কার স্পারি বেচা ছটাকা সাত আনায় চলে তবে আর ল্যাঠা কি ?

হোসেন তার রাগ দেখে অক্ষুট কণ্ঠে বললে : উঃ ! কী সাংঘাতিক মানুষ তুমি, বউ ! আমারে চুরি করতে কও। যদি জ্বলে যাই ?

: তবু খাইয়া বাঁচবা।—আস্তে কথাটি বলে জরিনা উঠোনে নেমে গেল।

হোসেন রাগে দুঃখে কাঁদবে না চিৎকার করবে ভেবে পেল না। অবাক হয়ে তার দিকে চেয়ে রইলো।

তখন আশ্বিনের শেষ। ক্ষেতে ক্ষেতে ধানের গোছা সবে সবুজ হয়ে উঠেছে। হোসেনের অবশিষ্ট ক্ষেতখানার ধানের শিষে সবুজ কুঁড়ি চোখ মেলেছে। প্রতিদিন অধীরচিন্তে হোসেন তাদের বেড়ে ওঠা লক্ষ করে। কিন্তু ফসল আগের মতো জোরাল হয়ে উঠেনি এবার। তাছাড়া আরো আশঙ্কার কথা, ক্ষেতের জল এখনো নামেনি। বিলেন জমি তার। কখনো কখনো পৌষমাস পর্যন্ত এসব ক্ষেতে জল জমে থাকে। ক্ষেতের ধান জলে কাদাতেই অধিক নষ্ট হয়ে যায়। হোসেনের দুশ্চিন্তার অবধি রইলো না। সেদিন বাড়ি ফিরে জরিনাকে বললে : ফসল এবার কিছু হয় না বউ—

দাওয়ায় বসে জরিনা খাবার জগু শাপলার আঁশ ছাড়াছিলো ; তার দিকে না তাকিয়েই ব্যঙ্গের সুরে বললে : খোদাতালার দয়া !

হোসেন বিস্মিত হয়ে তার দিকে তাকিয়ে রইলো ; ঘৃণা, রোষ এবং আতঙ্ক একসঙ্গে মিশে তার মুখচোখ অন্ধুত হয়ে উঠলো। জরিনার মুখে এতটুকু হুশিচস্তা যেন নেই। ঠাণ্ডা নিঃস্প ব্যঞ্জে শুধু ঠোঁটের কোণটা যেন একটু কুঁচকে উঠেছিলো।

দুপুররাত্রে করিমের ডিঙির সাড়া পাওয়া গেল। নিশীথের অভিযানে হয়তো গ্রামান্তরে চলেছে। হোসেনের চোখে ঘুম ছিলো না। একে সেদিন গেছে একরকম উপোস, তার ওপর ভবিষ্যৎ হুশিচস্তা এবং জরিনার তচ্ছিল্য মাথা বাঁ বাঁ করে তুলেছিলো। সে একহাতে ভর দিয়ে উঠে পাশে শোয়া জরিনাকে একবার দে'খে, তার নিশ্বাসের শব্দ পরীক্ষা ক'রে, আস্তে আস্তে বিছানা ছেড়ে উঠে পড়লো। জরিনা স্তম্ভিত।—চুরি করা এমন কিছু কঠিন কাজ নয়, যার জ্ঞাত করিমের সঙ্গে তুলিত হয়ে জরিনার কাছে খাটো হয়ে থাকবে। যখন খুশিই হবে এতে—হোসেন আজ জরিনাকে দেখিয়ে দেবে যে, সেও ইচ্ছে করলে ওসব কাজ পারে, কিন্তু মন সায় দেয় না এই যা। চুপি চুপি বেরিয়ে আড়া থেকে একগাছা দড়ি খুলে নিয়ে, চালে গৌজা বৈঠাখানা নামিয়ে সে উঠানের অন্ধকারে মিশে গেল।

শেষরাত্রে এসে জরিনাকে আস্তে আস্তে জাগাল হোসেন : বউ আয় এদিক—তার কণ্ঠে যেন মহাকীর্তির সুর। বিস্মিত জরিনা তার পিছু পিছু খাল পাড়ে গিয়ে দেখলো, খালের ওপর নুয়ে পড়া কাঁঠাল গাছটার কোলে হোসেনের ডিঙিখানা সামনের ঘাট জুড়ে নারকেল বোকাই হয়ে ভাসছে। স্বল্প জ্যোৎস্নায় হোসেন দেখলো জরিনার সমস্ত মুখখানা খুশিতে বলোমলো হয়ে উঠেছে : কোথা থেকুইয়া আনলা ? ছেলেমানুষকে অগ্নায় কোঁতুহলে নিরস্ত করবার মত ভারিকীঢালে

হোসেন জবাব দিল : তাতে তোমার কাজ কী ? এখন আসো দেখি এগুলো তুলে রাখি, কাইল হাটে বিক্রী করা যাইবে ।

কিন্তু পরদিন আলো ফুটবার সঙ্গে সঙ্গে হোসেনের কাছে গত রাত্রির ব্যাপারটা অত্যন্ত বিস্তী মনে হতে লাগলো । এমন কি নারকেলগুলো বিক্রী করে সে চাল কিনে এনেও মুখ ভারী করে বসে রইলো । তারপর ভাতের খালা সামনে নিয়ে অত্যন্ত অদ্বুতভাবে ইতস্তত করতে লাগলো সে । এক সময় করুণ গলায় বলে উঠলো : বউ, পাপের ভাত যে মুখে উঠতে চায় না, কোনো অমঙ্গল হইবে নাতো, অ্যা ?

জবাবে জরিনার লঘু হাসিতে তার ব্যাকুলতা খানিকটা হালকা হোলো সত্যি, কিন্তু কেবলই তার মনে হতে লাগলো যে, ভাত নয়, সে সম্ভ্রানে এক এক গ্রাস পাপই মুখে পুরে দিচ্ছে । তার ঐ করুণ অবস্থা দেখে জরিনা অকস্মাৎ মায়া অনুভব করলো । কাছে এসে কাঁধে হাত রেখে হেসে বললে : আরে ছাৎ, এতো ভাবো কী ? এরকম একটু আধটু আজকাল না করে কে ?

সেদিন সারাটা দিনমান ধরে জোর বৃষ্টি । সন্ধ্যার দিকেও ছিটে-ফোঁটা বরতে লাগলো ; সঙ্গে শৌঁ শৌঁ করে দম্কা বাতাস । দক্ষিণ দিক থেকে একটা দৈতা যেন বারবার ফুঁসে আসতে চাইছে । সর্বত্রই যেন ছিলো আসন্ন বন্যার সংবাদ ।

সন্ধ্যার সময় করিমকে তাদের বাড়িতে আসতে দেখে হোসেন একটু বিস্মিতই হলো । যথারীতি অভ্যর্থনার চেষ্টা করে করিমকে দাওয়ায় বসালে । করিম মিটি মিটি হেসে বললে : কাল আমার চোখরে কিন্তু ফাঁকি দিতে পারো নাই মিঞা !—বলে, ভাঙা গলায় হো হো

করে খানিকটা হেসে গলা নামিয়ে আবার বললে : তা নামছোই যখন ইদিকে, পুঁটি খলসে মারইয়া কি হইবে ? তার চাইয়া বরং আসো রুই-কাতলা মারবার চেষ্টাই করি ।

প্রথমটা বিব্রতলজ্জায় গোপনের একটু হাঁ-না চেষ্টা করে, অবশেষে চোখ নিচু করে হোসেন গুধালো : কি রকম ?

: বড়ো কাজের কথা কইতে আছি । না খাইয়া মরতে আছি আমরা, অথচ আতাহার মুন্সীর ঘরে কত চাউল আছে জানো ? একসের চাউলও তার কাছে ধার পাওয়া যায় না^১ যাবা আজ আমার সঙ্গে তার কিছু নামাইয়া আনতে ?

: ডাকাতি !—চমকে উঠলো হোসেন ।

: না না, ডাকাতি কেন, সিঁধ কাটাইয়া কিছু নামাইয়া আনমু । মুন্সীর ঘরের পিছন দিকেই গোলা, কী করতে হইবে না হইবে সব আমি ঠিক করইয়া রাখছি । কিন্তু একজন সাথী না হইলে ভারি মুশ্কিল । করিমের মুখের ভাবটা—যেন একাজে বেশ গৌরব আছে এবং না করলেই নয় । হোসেন আড়চোখে একটুকাল তাকে দেখে ভাবতে লাগলো, কী বলবে ? অসম্ভব, চুরি করা অসম্ভব তার পক্ষে । চোর—সমাজে সবাই যাকে নিন্দা করে, আঙুল দেখিয়ে হো হো করে হেসে টিটকারী দেয়, কাঁধের ফেরেশতা যার অগ্নায়ের ফিরিস্তী লিখে লিখে খোদার দরবারে ছঃসহ শাস্তির ব্যবস্থা করায়, কিছুতেই সে পাপে আর নামবে না হোসেন । ছিঁচকে চোর করিম, গাঁয়ের আবাল-বৃদ্ধ-বনিতা যাকে করিমচোরা বলে জানে, তার স্তরে কিছুতেই সে নিজেকে আর নামাতে পারবে না । একটু ইতস্তত করে বলুলে : না ভাই, আমার সাহস হয় না ।

: বাঃ, ভয় কিসের ! এমন কৌশল শিখানু তোমারে যে ধরাপড়ার কোনো ভয়ই থাকবে না ।

: না, তার চাইতেও বড়ো কথা যে খোদার চোথকে ফাঁকি দেওয়া যাইবে না । 'পাপে পাপে একে মরছি, তার উপরে আরো বোঝা বাড়ানু না ।

করিম সহসা কোনো কথা বলতে পারলো না । হোসেনকে খানিকক্ষণ পর্যবেক্ষণ করে কেমন অদ্ভুতভাবে বললে : পাপ ?—অঁ্যা ?

হোসেনের অটল সংকল্প দেখে করিম অবশেষে চলে গেল ।

জরিনা এতোক্ষণ ঘরের মধ্যে ছিলো, বাইরে এলো এবার : কী বলছিলো করিম ? কান পাতইয়া এতো শোনবার চেষ্টা করলাম, কিন্তু তোমাদের যে ফিসফিসে কথা !

হোসেন তীক্ষ্ণচোখে একবার তার দিকে তাকিয়ে আবার উঠানের দিকে চোখ ফিরিয়ে নিলো । মুখচোখ তার চিন্তামাখা হয়েই রইলো ।

: বাপরে বাপ, ঘরের মধ্যে শব্দ করইয়া বারংবার তোমারে এতো ইশারা করলাম, তুমি খেয়ালই করল না । আমি কতো কষ্ট করইয়া বনবাদাড় ভাঙইয়া ওবাড়ি থেকইয়া পান আনলাম, কিন্তু দেওয়াই হইল না ।

হোসেন চকিত চোখে আর একবার তাকালো জরিনার দিকে, কিছু বললো না ।

ঘুম এলো না চোখে সেইরাত্রে । মাথায় নানা চিন্তা । কী করবে সে, কী করবে ? উপবাস আসন্ন—আসন্ন মৃত্যু । এ অবস্থা থেকে উদ্ধার পাবার উপায় কী তার ! ভেবে ভেবে হোসেনের মাথা গুলিয়ে যেতে থাকে ।

বাইরের ডোবায় ব্যাঙ আর পোকামাকড়ের একঘেয়ে ডাকাডাকি।
 অন্ধকার আর মাঝে মাঝে বন্যার জোলো হাওয়া। বন্যা হলে ফসল
 মারা পড়বে। মারা পড়বে সেও। উপায় আছে পরবাসী হয়ে 'ভাঁটি'তে
 যাবার। কিন্তু অতো দূরে নিরাল। সমুদ্র কিনারার ক্ষেতে সে কেমন
 করে দিন কাটাবে? খেলো কি খেলো না, না অসুখেই পড়ে রইল
 —কে তার খোঁজখবর নেবে? ভাঁটির অধিকাংশ জমিরই মালিক
 মগেরা। পরবাসী রেখে মজুর খাটানো ছাড়া আর কোন সংশ্রবই
 তারা রাখে না। জরিনার স্নেহস্পর্শ-ব্যাकुल হোসেন কেমন করে দিন
 কাটাবে সেখানে! কিন্তু এখানে থেকেই বা উপায় কী! জরিনা
 তার চাইতে হয়তো আজই বেশী শ্রদ্ধা করে করিমকে, করিমের
 কথা বলতে বলতে ভাবে যেন ডগমগ করে তার সারামুখ—

জরিনা পাশে শুয়েছিলো, একটু উসখুস করে হোসেনকে ঠেলা দিয়ে
 বললে : ঘুমাইছ নাকি?

: না।

: ঐ সমস্ত আজ্ঞে বাজে চিন্তা করইও না। বন্যা হইবে না
 দেইখো। বর্গা ক্ষেত আর নিজেদের জমি থেকইয়া যা পাবে তাতে
 বছর একরকম চলইয়া যাইবে। আর যদি ভাঁটিতে যাবার একান্তই দরকার
 পড়ে, সে সময় ভাবইয়া চিইন্তা যাহোক একট' উপায় করা যাইবে।
 কিন্তু তা গেলেও না হয় যাব! অত্যাণ মাসে; কিন্তু এখন করবা
 কী?

: তাইতো ভাবছি।

: তাইলে আমি যা বলি শোনো। আজ রাত্রে যাও না আর একবার।

এই রকম রাত্রেই তো সুবিধা।

হোসেন নীরব থেকে নড়েচড়ে শুলো : না বউ, শরীরটা ভালো নাই। এই শীত, তার উপর গাছগাছালি বৃষ্টিতে পিছল ; আইজ বাইর হওন যাইবেনা।

: না পারলে উপায় কী শুনি ? এরকম ফ্যান খুদ খাইয়া কয়দিন আর জ্ঞান রাখতে পারবা ?

: যে কয়দিন পারি। বৃষ্টিতে গাছ পিছল ; বাইতেই পারমু না।

: পোলাপানের মত কথা কইও না, যাও; নাওডা নিয়ে এটু ঘুরইয়া আসো। এ রকম না খাইয়া আর কয়দিন থাকবু ? করিম খাঁ তো গাছ পিছল বলইয়া বসইয়া নাই, সে কখন সেই বাইর হইছে।

আবার হোসেনকে সেই চরমতম আঘাত। এবার সে আর চুপ করে থাকতে পারলো না : ছাখ্ বউ, রোজ রোজ করিম চোরার নাম লইয়া কানের কাছে এমন ব্যাজোর ব্যাজোর করবি না। শরীরটা ভালো নাই, সহ্য করতে পারমু না।

: চোর কে না ? শুধু করিমের নাম কেন ? গু খায় সব মাছে, নাম পড়ে পাঙ্গাশের। গ্রামের মাতব্বরেরা কী করে ? জবান খাঁ কী শয়তানী করইয়া তোমার ছুকুড়া জায়গা নিয়ে নিলে ; কিন্তু সেজন্য তাকে চোর বলার সাহস আছে তোমার ? এখন তো লুইয়া পড়ইয়া সালাম দাও। করিম চোরাও যে অমন—

: থাম্। তোর এতো সাধ হইয়া থাকলে নিকা কর গিয়া তারে।

জরিনা এতোবড়ো জবাব প্রত্যাশা করেনি। খানিকক্ষণ বিস্ময়ে গুম হয়ে থেকে বললে : ছিঃ ছিঃ, তোমার জবানডা এমন খারাপ হইলে শেষে ! পাগলের মতো যা ইচ্ছা তাই কও !

হোসেন তার কথায় বাধা দিয়ে পাগলের মতোই তার চুলের মুঠ

ধরে গালে একচড় কশিয়ে দিলো : এই হারামজাদী, কারে পাগল কইলি তুই ? যা, তুই করিম খাঁর লগে নিকা বস গিয়া যা। আমি চুরি করইয়া তোরে খাওয়াইতে পারমু না।

জরিনা তো হতভম্ব ; যে বিস্ত্রী ব্যাপার হোসেন কল্পনা করেছে তা ওর মন থেকে কেমন করে ঘুচিয়ে দেবে ভেবে না পেয়ে ছুঃখে অভিমানে তার ছুচোখ ফেটে ধারা নামলো। বিছানার একপাশে সরে সে চুপচাপ শুয়ে শুয়ে কাঁদতে লাগলো। গায়ে দেবার একখানা মাত্র পুরু কাঁথা, সেখানা রইলো হোসেনের গায়ে।

ঝোড়ো বাতাস যেন সমস্ত অন্ধকারকে টেনে নিয়ে এসে গ্রামের বুকে জড়ো করেছিলো সেইরাত্রে। অনেক রাত পর্যন্ত হোসেনের চোখে ঘুম এলোনা। জরিনার উপর এই দ্বিতীয়বার হাত তুললে সে। আর একবার তাকে মেরেছিলো বহুদিন আগে। তখন কেবলমাত্র বিয়ে হয়েছে তাদের, হোসেনের মা তখন জীবিত। কী এক ঝগড়া-ঝাঁটি উপলক্ষ করে সে ছুম ছুম করে কিশোরী জরিনার পিঠে কয়েকটা কিল বসিয়ে দিয়েছিলো। জরিনা তো সেজ্ঞা তিনদিন পর্যন্ত তার সঙ্গে কোনো কথাই বললে না। অবশেষে হাট থেকে রঙীন ডুরে শাড়ি কিনে তার মানভঞ্জন করতে হয়েছিলো। আজো হোসেনের অনুতাপ হোলো। খানিক পরে নরম গলায় ডাকলে : বউ !

জরিনা নীরব। হোসেন আবার ডাকলো : বউ, দোহাই তোয়, রাগ করিস না। মনটা ভালো নাই।

তবু জরিনার দিক থেকে কোনো সাড়া এলো না। হোসেন তার কাছে সরে কনুয়ে ভর করে গালে হাত বুলিয়ে বললে : দোহাই খোদার, কথা বল্ বউ। খুব ব্যথা পাইছো, না ?

জরিনা ষট্কা দিয়ে হাতখানা সরিয়ে দিলো।

আহতমনে আবার সরে এলো হোসেন।

অনেকক্ষণ বাদে উঠে যখন সে বৈঠা হাতে দাওয়ায় নামলো, তখনো তার মনে মনে আশা—এবার জরিনা তাকে পিছু ডেকে বলবে : থাক, আজকের রাতটা সত্যি খারাপ, বেরিয়ে কাজ নেই।

কিন্তু অনেকক্ষণ প্রতীক্ষা করেও যখন কোনো ডাক এলো না পেছন থেকে, হোসেন একটা দীর্ঘনিশ্বাস ফেলে উঠোন পেরিয়ে খাল পাড়ে বাঁধা তার নৌকোর শিকল খুললে। কোথায় কোন্ দিকে যাবে, কিছুই সে স্থির করেনি। কেমন একটা আচ্ছন্নভাবে সে ডিঙি ভাসিয়ে দিলে।

সত্যিই তো, কে কার! আর কীই বা পুণ্য-পাপ! অসৎ নয় কে? সবাই যাকে মাথায় তুলে নাচে সেই জবান খাঁই বা কী? এই জগতে বাঁচাটা বড়ো কথা, না খোদার ওপর নির্ভর করে থাকা? নির্ভর করে করে সে তো আজ মরণের মুখে এসে পৌঁছুচ্ছে। জীবী পর্যন্ত আজ হেলা করে। অথচ জরিনা কি একদিন কম ভালোবাসত তাকে! তাকে কাছে পেয়ে তারো মুখ কি একদিন ডগমগ করে উঠত না? এই গাঁয়ের লোক, তারা তো আজ তাকে মনিষ্টির মধ্যেই গণ্য করে না। কিন্তু দিনকাল যখন ভালো ছিল, সেও কি খাতির কম পেয়েছে? আজ তবে কেন এমন হোলো? কেন সে এমনভাবে মরবে? আতাহার মুন্সীর কেন করবে না দয়া? অসংলগ্ন ভাবনা হোসেনের মাথাটাকে যেন আরো ঘোলাটে করে আনে। সে যদি আজ এমনি করে না খেয়ে মরে, তবু কারো বুকে ব্যথা লাগবে না। জরিনাও হয়তো হাঁফ ছেড়ে করিমের ঘর করতে যাবে।

খোদা চিরকালেরই মতো মূক থাকবে।

শাহেরবাহু

কেউ কাঁদবে না হোসেনের জন্তু ।

হঠাৎ হোসেনের কান্না পায় । কী রকম একটা রুদ্ধ উষ্ণ অনুভূতি
বুকটাকে তোলপাড় করতে থাকে ।

জোয়ারের টানে নৌকো তখন সামনে ভেসে চলেছে । আশেপাশে
বেতঝোপ, হোগলাবন । চারিদিকে আল্কাতির মতো অন্ধকার ।
অন্ধকার যেন হোসেনের মাথার মধ্যেও । ঠোঁটের ওপরকার নোনা জল
চেটে হোসেন কঠিনমুখে প্রতিজ্ঞা করলো, যার অভাবে সে আজ
এতো রিক্ত । যার জন্তু প্রিয়তমা পত্নীর ভালোবাসাটুকুও সে হারাতে
বসেছে, যে করে হোক এবার সে তা যোগাড় করবেই । দয়া
করবে না ঈশ্বর, দয়া করবে না মানুষ । যে করে হোক বাঁচতে তাকে
হবেই ।

চোখের জল মুছে, বৈঠকে শক্ত হাতে ধরে সে নৌকোর মুখ
আতাহার মুন্সীর বাড়ির দিকে ঘুরিয়ে দিলো ।

জাহাজঘাটের কুলি

ভিথিরি কুলির মতো ঘাটে খেটে আর সুখ ছিলোনা।

শরতের শিউলি মাজা সকাল। চার নম্বর ঘাটের আড়ালে খুলনা এক্সপ্রেস স্টিমারের আগমনী সিটি বেজে উঠেছে। সাড়া পড়ে গেছে প্রকাণ্ড ষ্টেশনে, কুলিরা ছুটেছে, প্রতীক্ষমান বিচ্ছিন্ন জনপুঞ্জ মিলিত স্রোতে তিননম্বর ঘাটের দিকে এগিয়েছে। তখনো শফিক একটা সোনালি গাছের বাঁধানো বেদীর ওপর শুয়ে বিড়ি ফুঁকছিলো।

রাতজাগা দেহে অবসাদ প্রলেপের মতো জড়িয়ে আছে কাল। সারারাত কোম্পানির কুলিদের সঙ্গে বাধ্য হয়ে মেইলে মাল ভর্তি করে দিয়েছে। এখন শরীরে এতো ক্লান্তি যে, এগিয়ে গিয়ে ঘাটে দাঁড়াতে একেবারেই সে উৎসাহ পাচ্ছে না। তাছাড়া কালকের রোজগারি ন' আনা পয়সা ট্যাঁকে রেখে ঘুমিয়েছিলো। ভোরে চা খাবে মনে করে পয়সা খুঁজতেই দেখে ট্যাঁক শূন্য। পাশে শুয়েছিলো ইয়াসিন, হয়তো সে-ই মেরে দিয়েছে। মনটা তাতে আরো দমে পড়েছে। সকালে আজ আর কিছু পেটে পড়ার সম্ভাবনা নেই। অথচ এদিকে পেটেও পাক দিয়ে উঠেছে।

ঘাটে কুলিদের তখন কলরব। লম্বা ফ্লাটের পাশে ষ্টিমার ভিড়েছে। ধূমায়মান চোঙটা কালো করে দিচ্ছে পরিষ্কার আকাশ। ফ্লাট আর পাড়ের মাঝেকার পুলের এপাশে সারি বেঁধে বসে গেছে কালো জামা-পরা তকমাওয়ালা কোম্পানীর কুলিরা। তারপরে দাঁড়িয়েছে ইয়াসিন, নিতাই, গফুর, মাধব—তাদের মতো অচিহ্নিত আরো অনেক ছোকরা

শাহেরবাহু

কুলি, ভিথিরির ছেলে। একসময় বিড়িটা ছুঁড়ে ফেলে শফিকও সেদিকে পা বাড়ালো।

বরাবর এমনি পিছনেই এককোণে ভিড় ক'রে ওরা দাঁড়ায়। সামনে যাবার চেষ্টা করে না, পারেও না। একে ওদের চোখ রাঙানি, ধাক্কা, তার ওপর সবচেয়ে ভয়ানক সর্দারের সেই লিকলিকে সাপের জিভের মতো বেতের ঝলক। বন্ধ গেটের এপাশে ঠেলাঠেলি আর কোলাহল ক'রে ওরা দাঁড়ায়। সর্দারকে দে'খে সন্ধাই পথ করে দেয়। যেতে যেতে সর্দার তাকায় ডাইনে-বাঁয়ে, গম্ভীর চোখে। খাটো হাফশাটে ঢাকা পাতলা একটি মানুষ, কপালে ফোঁটা, মুণ্ডে উৎকলি টিকি, কোটরে চোকা পিটপিটে ছুটি চোখ। ওকে সর্দার বলতে বাধে; কিন্তু ওরই ঐ চোখ দুটো এক সময় ভাঁটার মতো বেরিয়ে এসে হিংস্র জ্বালা বিচ্ছুরণ করে। শীর্ণ হাতের ঐ সরু বেতখানাই অতি বিষাক্ত সরীসৃপের ছোবল থেকেও মারাত্মক হয়ে ওঠে।

ঃ সেলাম।

যেতে যেতে এক লহমা তাকালো সর্দার : আবার আইছি' তুই ? বললে শুনবিনে, তোদের জন্তু কোম্পানির কুলিরাও—বিড়বিড়িয়ে গেট খুলে সে ওপাশে গিয়ে দাঁড়ালো।

শফিক-এর 'সেলামে' ইয়াসিন, নিতাই ওরা হাসছিলো। শুধু সেলাম দিয়ে সর্দারকে খুশি করা যে সম্ভব নয় সে ওরা দীর্ঘদিন এখানে থেকে বুঝেছে। ঐ চোখে ঝরবে কুপাদৃষ্টি ! মরাগাছে সবুজ ফলের দোলানির মতোই অসম্ভব।

ইয়াসিন বললে : তোমার এমন ভালোমানুষী মর্দ, ঘাটে কাজ করতে আসা তোমার উচিত হয় নাই।

শফিক কুণ্ঠিতভাবে ছোট্ট একটু হেসে জবাব দিলো। তার চরিত্র যে এক নিতাই ছাড়া আর ওদের কারু সঙ্গে মিল খায় না, তা সে জানে। বেশ একটু অহত মনেই তাই দূরে দূরে থাকে। স্বল্পমোটের যাত্রীরা একে একে নেমে যাচ্ছিলো, ছোকরা কুলিগুলো যথারীতি হাত বাড়িয়ে হাঁকতে লাগলো : কুলি, কুলি লাগবে বাবু ?

এসব যাত্রীরা বড়োজোর রিস্তাস্টিয়াও পর্যন্ত যায়, কেউ কেউ বাড়ি পর্যন্তও নিয়ে যায় ; ছোটো চারটে পয়সা দিয়ে ছোকরাদের খুশি করে দেয়। তারা ছাড়া ওসব ছোটখাটো মোট কেউ হৌয়ও না।

সর্দারের হুকুম হতেই কোম্পানির কুলিরা ছদ্দাড় করে ছুটলো। এলোমেলো জীবনযুদ্ধের পদাতিকেরা। কার কন্হুয়ের ঠেলায় রেলিংএর পিছনে হিটকে পড়ল একজন যাত্রী। সর্দার ক্ষেপে গেল। হাতের চক্চকে বেতখানা বারবার কচিরোদে ঝলসে উঠতে লাগলো—সপাসপ্-সপাসপ্। বেত আর খামে না। ওরা একটু হটে আবার সে-বিদ্যাত্মক উপেক্ষা করেই ছুটলো। কে শোনে সর্দারের গালি, আর কে-ই বা দেখে তার বেতের ঝলক !

: মাগো!—আর্তনাদ করে বসে পড়লো রোগা উড়ে-কুলি মাধব। শফিকও ছুটতে ছুটতে থমকে দেখলো, আহত অঙ্গে হাত বুলাতে বুলাতে মাধব কেঁপে কেঁপে বসে পড়েছে। রক্তশূন্য গালে নীল ছোটো দাগ বসে গেছে। দেখার সময় ছিলো না, মাধবকে টেনে তুলে শফিকও ছুটলো।

স্টেশনের বিস্তৃত প্রাঙ্গনটুকু তখন কোলাহলে ভরে উঠেছে। রিস্তা ঘোড়ার গাড়িওয়ালা শহরের যাত্রী খুঁজছে ; স্টিমার থেকে খবরের কাগজের বাণ্ডিল নামিয়ে হকারেরা পূজাসংখ্যার আগমন ঘোষণায়

শাহেরবাহু

তৎপর। স্বজনের অপেক্ষা-অধীর জনতা ফ্লাট-নির্গত প্রতিটি যাত্রীর মুখের ওপর দৃষ্টি বুলিয়ে যাচ্ছে।

শফিক ভিতরে চেয়ে দেখে, প্রায় সব মোট ধরেই একজন না একজন কোম্পানির কুলি দাঁড়িয়ে পড়েছে। ছুটোছুটি করে হয়তো সেও একটা মোট ছুঁয়ে দাঁড়াতে পারে, কিন্তু শেষ পর্যন্ত ওদের ধমকে সরে আসতেই হবে। তারা পাবে ওদের উচ্ছিষ্ট বা অতিরিক্ত মোট। সেদিন যাত্রী ছিলো প্রচুর, স্মতরাং তার নিরাশ হবার কারণ ছিলো না। ঘুরে খুঁজতে লাগলো শফিক।

এককোণে এক অল্পবয়সী বাবুর সঙ্গে ঝগড়া বেধেছে পাশের কুলি নাথুর।

: ওয়েটিংরুমে নিতে আট আনা দিতে হবে? এইটুকু জায়গা ছু আনায়?

: সেদিন নাই বাবু, জিগ্‌গাস করে দেখেন ওদের, আট আনার কম কেউ নেবে না।—বলতে বলতে রেলিং‌এর সঙ্গে দেহ হেলিয়ে দাঁড়িয়েছে নাথু।

: আচ্ছা তুমি যাও।—অন্য একজনকে ডাকলেন ভদ্রলোক। কিন্তু নাথুকে দেখে সে নিরুত্তরে অন্ত্র ছুটল।

শফিকের ডাক পড়লো : কতো নেবে এই মোট ওয়েটিংরুমে নিয়ে যেতে? ধূর্ত নাথুর দিকে তাকালো শফিক। এর মধ্যেই নাথুর চোখে খবরদারী ফুটে উঠেছে। কিছু একটা হয়তো বলে বসতো শফিক, কিন্তু সামলে নিলো। এ ঘাটের পাট তাহলে ফুরোবে। শুধু ওর ওই পেশীবহুল হাতের মার নয়, সর্দারের কানেও সে খবর পৌঁছে যাবে, যার অর্থুতার পাসের কুলি হবার সমস্ত সম্ভাবনা চুরমার হয়ে যাওয়া।

ঃ আমি পারমু না বাবু ।

আরেকটা মোটের কাছে এসে দাঁড়ালো সে । সেটা ধরে দাঁড়িয়েছে ইয়াসিন । দেখেই শফিক ফিরছিলো, হেনকালে মালিক ডাকলেন : এই তুই পারবি যেতে ?

এ ক্ষেত্রেও মারের ভয় আছে সত্যি, কিন্তু তবু কি খেয়াল করে জিজ্ঞাসা করলো : কোথায় যাবেন ?

ঃ আলেকান্দা, কতো নিবি ?

মোট দেখে শফিক বললে : কুলি যে ছুজন লাগবে । আট আনা করে দেবেন ।

ইয়াসিন সামনে এগিয়ে এলো : দেখলেন, অতায় চেয়েছি আমি ?

ঃ ছ' আনায় যাবি তো চল ।

ঃ পারবো না বাবু ।—কেবিনের দেয়ালে ইয়াসিন ঠেস দিয়ে দাঁড়ালো ।

এমন সময় নিতাই কোথা থেকে ছুটে এলো : কোথায় যাবেন বাবু ?

ঃ আলেকান্দা, ছ'আনায় যাবি ?

নিতাই ইয়াসিনের দিকে এক লহমা তাকিয়ে বাবুর মুখচেয়ে বলে উঠলো : ঐ সাত আনা করেই দিন বাবু । আয় শফিক, তোল ।

বাবু কোনো বাধা দেবার আগেই নিতাই শফিক-এর মাথায় একটা বাক্স তুলে দিলো । ডেক প্রায় খালি হয়ে গেছে তখন, ভালমানুষী করে মোট ছাড়া চলে না ।

ইয়াসিন প্রথমটা একটু অবাক হয়ে গেল । ওরা দুজনেই ততোক্ষণে মোট তুলে নিয়েছে ।

ঃ আচ্ছা শালা, পরে দেখা যাবে ।—নিতাইকে শাসিয়ে ইয়াসিন অগ্নি দিকে ছুটে গেল ।

শাহেরবাহু

শফিক কিন্তু মনে মনে খুশি হয়ে উঠলো—আচ্ছা জব্দ হয়েছে ইয়াসিন ।
নিতাইয়ের দিকে চেয়ে হেসে বললে : ভাবিসনে নিতাই, চল ।

: আরে দূর, ভাবাভাবি আবার কী ? সেদিন ঢাকা মেলের একটা
মোট এমনি করে ছিনিয়ে নেয়নি ইয়াসিন ?—বাবুকে আগে যেতে
বলে নিতাই অনুসরণ করলো : পয়সার কারবার ! চল, এগো তুই ।
যাত্রীরা প্রায় সবাই তখন নেমে যাচ্ছে, ইয়াসিনের আর মোটের
আশা নেই । তার অবস্থা কল্পনা করে শফিক নিতাইয়ের ওপর খুব
খুশি হয়ে উঠলো ।

দশটার মধ্যে অণ্ড কোনো স্টিমার নেই । দুজনে পাড়ার মধ্যে
এদিক ওদিক আরো আনা দুই রোজগার করলে । তবু খাওয়ার জন্ত
নিতাইয়ের কাছ থেকে শফিককে ধার করতে হোলো । খেয়ে দেয়ে
ভাবছিলো, পাসের কথাটা সর্দারকে আর একবার মনে করিয়ে দেবে
কি না । নিতাই বলছে, পকেটে কিছু দিতে না পারলে গুধু গুধু
বলা বৃথা । কিছু হাতে থাকলে দিতে তার আপত্তি ছিলো না, কিন্তু
গত দুটি মাস যাবৎ এই স্টেশনে খেটেও কিছুই সে জমাতে পারেনি ।
কী করবে তবে ?—ভাবতে ভাবতে লোকারণ্য বিশ্রাম-কক্ষে ঢুকে এক
কোণে বসার উপক্রম করতেই দেখতে পেলো নাথুর সেই যাত্রী-
বাবুটি স্লটকেশের ওপর বসে তারই দিকে তাকিয়ে আছেন ;
চোখাচোখি হতেই তাকে ইঙ্গিতে কাছে ডাকলেন ।

: কুলি নও তুমি ?

শফিক ঘাড় নাড়লে ।

ভদ্রলোক হেসে জিজ্ঞাসা করলেন : তবে আমার মোট নিলেন না
কেন ?

: কম বললে ও পরে মারত বাবু। তা ছাড়া আমি তো কোম্পানীর কুলি নই। ওরা থাকতে কোনো মোট আমরা ধরতে পারি না। এমনি ছোটখাটো ওদের না ধরা মোট বই।

: ও!—খানিক পরে ভদ্রলোক আবার প্রশ্ন করলেন : আজকাল স্টিমার কমিয়ে দেওয়ায় তোমাদের রোজগার তো অনেক কমে গেছে, না ?

শফিক স্নান মুখে হাসল, বললে : ছবেলা খাবার পয়সাও জোটা ভার।—বলতে বলতে মনে পড়ল তার সেদিন আর মাদারীপুরের স্টিমার নেই। দশটা বারোটোর আশা গেল। বিকেল পাঁচটায় ভবানীগঞ্জ, আর রাত্রে আছে খুলনা মেল। রাত্রের খাওয়ার পয়সাও নিতাইয়ের কাছ থেকে ধার নেওয়া ছাড়া উপায় নেই।

: কোম্পানীর পাস না পাইলে আর এ কাজ করইয়া স্থখ নাই বাবু।

: কেন, এই তো দিবি আছো, তকমা বেঁধে কুলি নাম নাই বা কিনলে !

তার কথায় সন্তুষ্ট হোলো না শফিক। মুখ ফিরিয়ে পাশের পুকুরটার দিকে তাকিয়ে রইলো।

বিলম্বিত করে জলের ওপর রোদ নাচছে, যেন জল নয়—গলন্ত রূপো। ওপারের ঘাটে বাসন মাজতে নেমেছে কে একটি মেয়ে। তার আশেপাশে নানা গলার কলরব। অকস্মাৎ একটা কথা মনে পড়লো শফিকের—নিতাই তো ঠিকেন্দারবাবুর বাড়ি যাবার কথা বলেছিলো। তাকে খুঁজে নেওয়া দরকার। উঠে যাচ্ছিলো সে, ভদ্রলোকের ডাকে ফিরে দাঁড়ালো।

: এখানে কাছাকাছি কোনো হিন্দু হোটেল আছে বলতে পারো ?

: ঐ তো পাশেই। আপনি নতুন আইলেন বুঝি এখানে? ঢাকার জন্তু স্টিমারে যাইবেন তো? বেশতো, নাওয়া খাওয়া সারইয়া হোটেলেরেই বিশ্রাম নিতে পারবেন, যাবেন?

: চল। ব্যাপার কী জানো, নতুন এসেছি এখানে। ভবানীগঞ্জ স্টিমারে আমার কয়েকজন আত্মীয়, মানে আমার কাকারা আসবেন। তাঁদের সঙ্গে একত্র হয়ে আবার ঢাকা যাবো। অসুবিধার ভয়ে আমি বরগুনা থেকে একটু আগেই এসে পড়েছি—যেতে যেতে বলতে লাগলেন ভদ্রলোক—ভবানীগঞ্জ এলে তুমি আমাকে খবর দিও; আরো একজন লোক ঠিক রেখে, মোট তোমাদের দিয়েই নামাবো। আমার নাম অজিতবাবু, স্টিমার এলেই আমার খোঁজ করো।

অজিতবাবুকে হোটেল বন্দোবস্ত করে দিয়ে চেনা পানবিড়ির দোকান থেকে একটা বিড়ি জ্বালিয়ে নিতাইকে এদিক ওদিক কয়েকবার খুঁজে এলো। স্টিমার আপিসের পাশ দিয়ে যেতে যেতে ভাবলো, ঢুকে ঠিকদারবাবুর কাছে তার নিবেদনটা জানিয়ে আসবে নাকি? কতোদিন সে আপিসের সিঁড়িতে কয়েক পা উঠে আবার নেমে এসেছে। ভেবে ভয় পেয়েছে যে, উপরে উঠেই হয়তো দেখবে কয়েকটা লালমুখো সাহেব চোখ কটমট করে তার দিকে তাকিয়েছে। ছটমুট করে কী বলে উঠবে কে জানে! ঘাড় খাঁকা দিয়ে হয়তো চাপরাসী দিয়ে নামিয়ে দেবে। রোজই স্টিমার আপিসের দিকে শফিক এই কথাটি ভাবে আর সাহস হারায়। বাড়ি ছাড়া ঠিকদারবাবুকে আর অন্য কোথাও পাবার উপায় নেই। সর্দার সর্বদা তাকে ছায়ার মতো আগলে থাকে।

নিতাইকে খুঁজতে খুঁজতে হৃৎস্বর ফ্লাটে উঠে এলো শফিক। বস্তা বস্তা

চালডালে তার পেট ঠাসা। এখানে আসা অবধি শফিক এই ফ্লার্টিটাকে এই ভাবে দেখে আসছে। এতো রয়েছে, তবু বারো আনার কমে কোনো হোটেলে খাওয়া নেই। একটা বস্তার উপর সে আরাম করে বসলো। ঘাটে কোনো স্টিমার নেই, সামনের কবার্টিটা খোলা। চিকচিক করে ভাঁটায় নেমে যাচ্ছে কীর্তন-খোলা। ওধারে পাল তুলে তর তর করে এগিয়ে যাচ্ছে কয়েকখানা মহাজনী নৌকো। খেয়া নৌকো ওপারে পৌঁছে পুলের কাছে যাত্রীদের উজাড় করে দিচ্ছে। চর কাউয়া মাদ্রাসার বারান্দায় আনাগোনা করছে ছ'একটি ছাত্র। তাকিয়ে থাকতে চোখে কেমন লাগে। চোখ ফেরাতেই দেখলো একটা বস্তার নিচে গামছা পেতে দাঁড়িয়ে আছে ইয়াসিন; ডানহাতের লোহাটা সম্ভরণে খোঁচা দিচ্ছে এক একটা বস্তার গায়ে, সঙ্গে সঙ্গে ফুটো দিয়ে তার গামছার ওপর স্রর স্রর করে চাল ঝরে পড়ছে। কাছাকাছি কেউ দেখছে না তার চুরি। শফিক চোখ ফিরিয়ে নিলো।

ফ্লার্টির গা ঘেসে একটা পানসী চলে গেল। ভিতরে বসা একটি মেয়ে, হয়তো কোনো বৌ, পর্দার আড়াল থেকে উঁকি দিয়ে ফ্লার্টির দিকে বড়ো বড়ো চোখ মেলে তাকিয়ে আছে।

ভান্নুর কথা মনে পড়ে গেল শফিকের। চার নম্বর ঘাটের কাছে মাঠের পাশে ডেরা বেঁধেছে তারা। তিনটি লোক, বুড়োবুড়ি আর ওই তেরো বছরের নাতনী ভান্নু। আকালের সময় ওরা দেশ ছেড়ে শহরে এসেছিলো। কিছুদিন লঙ্গরখানায় খেয়ে তারপর বুড়ো গুরু করেছিলো ঘরামির কাজ। এখনো তাই করছে। মাঝে মাঝে মোট বয়। একদিন তাকে সাহায্য করার সূত্রে তার সঙ্গে আলাপ। বুড়োর নিমন্ত্রণে

তাদের ওখানে গিয়ে ভানুকে দেখেছিলো। দেখে মুগ্ধ হলো। অমন বুদ্ধিমতী স্ত্রন্দর মেয়ে আর তার চোখে পড়েনি। আশ্চর্য স্ত্রন্দর তার ছুটি বড়ো বড়ো চোখ। মনটা যেন সেইদিনই ওখানে বাঁধা পড়ে গেল। কিন্তু তার পরিচয় জানবার পর ভানু ঠোট উল্টে তাকে করলো অবজ্ঞা। ভিক্ষে করে খায় বটে, কিন্তু দেমাক ভারি তার। শফিককে ভেবেছে তাদেরই মতো ছন্নছাড়া ভিখিরি। শফিক সত্যি তাতে দুঃখ পেয়েছে। আজ না হয় ছন্নছাড়া, কিন্তু কোম্পানীর পাস পেলে সে কি শ্রীমন্ত হয়ে উঠতে পারবে না ?

কাঁচ কাঁচ শব্দে দাঁড় ফেলে জেলে নৌকোগুলি ফ্লাট ঘেঁসে চলে যাচ্ছে। সারা ছুনিয়া ঝলমলাচ্ছে রোদে। ঘন নীল আকাশে ছড়ানো কয়েক টুকরো শাদা মেঘ। চর কাউয়ার সবুজ বনানীর ওপর চক্রাকারে কতগুলো শকুন উড়ছে, হয়তো কোথাও ভোজ বা মড়ক দেখেছে। প্রবাহমান কীর্তনখোলা ছল ছলাৎ শব্দ তুলছে ফ্লাটের গায়ে, তার জলের দিকে তাকিয়ে থেকে শফিকের চোখ এক সময় তন্দ্রালু হয়ে এলো। কতোটা গহীন এই নদী ? ছেলেবেলায় গল্প শুনেছে নদীর গর্ভে ঐশ্বর্যের অন্ত নেই ; স্মরণাতীতকাল থেকে কতো নিমজ্জিত ধনসম্পদ ওর মাঝে সঞ্চিত হয়ে আছে, তলায় পৌঁছে আজ পর্যন্ত কেউ তার নাগাল পায়নি। শফিকের মনে হোলো, সে অতি নিচে বহুদূর নদীর তলায় চলে গেছে, যেখানে শ্রোত নেই, কাদা নেই, চারদিকে ধবধবে নরম বালি। আর তারই ওপরে—ও কি !—ছড়িয়ে আছে অপূর্ব হ্রাসিময় কতো নাম-না-জানা জিনিস, কোনটা ছেড়ে কোনটা নেবে ভেবে সে অস্থির হয়ে উঠেছে। এমন সময় হঠাৎ দেখে সেই নাম-না-জানা জিনিসগুলো আর কিছুই নয়, অজস্র কোম্পানীর ‘পাস’।

হ্যাঁ, পাসই বটে, তেমনি লম্বাটে গোল কোম্পানীর নাম লেখা নম্বর দেওয়া লোহার পাস। ব্যাকুল আনন্দে তারই একখানা নিয়ে সে উপরে উঠছে। মনে পড়লো নিতাইয়ের কথা, আবার নেমে আরো বেশি কয়েকখানা নিয়ে উপরে উঠবে, কিন্তু একি! তার উপরে ওঠার সমস্ত চেষ্টাকে কে যেন ঠেসে ধরেছে। দম ফুরিয়ে যাচ্ছে তার, কতো চেষ্টা করছে সে সেই অজ্ঞাত হাত থেকে নিজেকে ছাড়িয়ে নিতে—এমন সময় তার ঘুম ভেঙে গেল, দেখল ইয়াসিন পাশে দাঁড়িয়ে তাকে ঠেলছে।

: কী রে শালা, তখন যে বড়ো উড়ে এসে আমার মোটটা লইয়া গেলি?

ঘামে ভিজ্জে গেছে শফিকের দেহ, ইয়াসিনের হাতটা সরিয়ে সে উঠে বসলো। কিছু মতলব করে এসেছে নাকি ইয়াসিন?

: কীরে জবাব দেস্ না যে?

হঠাৎ কোথা থেকে নিতাই এসে পড়লো : আরে, তুই এখানে, আর আমি ওদিকে সারা স্টেশন খুঁজে হইরান! ঘুমাতেছিলি বুঝি?—

বলেই সে ইয়াসিনের দিকে তাকালো : কী কইতে আছে ও?

ইয়াসিন সরে পড়লো : আবার আমার হোঁয়া মোট ধরবি তো মজা দেখামু।

: কী রে, গায়ে হাত তুলেছে নাকি?—নিতাইয়ের চোখ জলে উঠলো।

: না। গজরাইতে আছে।

: আচ্ছা, আচ্ছা, দেখাইস, যখন দেখাবি—এখন ভাগ!—তাড়া দিলো নিতাই। শফিককে বললে : ঠিকদারবাবুর বাড়ি যাবি?

: চল্ না, যাইতো একবার।

কিন্তু তার কাছ থেকে ওরা ইতাম্ব হয়ে ফিরে এলো। বর্তমানে কুলির সংখ্যা বাড়াবার কোনো প্রয়োজন নেই, হলে সর্দারের সুপারিশ বিবেচনা করে দেখা যাবে। তাছাড়া তারাই বা এখানে থেকে পাসের কুলিদের অসুবিধে জন্মাচ্ছে কেন? কতোদিকে কতোকাজ পড়ে রয়েছে। অনেক রিপোর্ট তার কাছে এসেছে। ভালোয় ভালোয় তারা সরে পড়ুক, নয়তো বাধ্য হয়ে তাদের তাড়াবার ব্যবস্থা করবেন।

উলটো হুমকি! বিমর্ষ মনে ওরা ফিরে এলো। এক যুদ্ধে যাওয়া ছাড়া কোথায় আছে কাজ?

বেশি ভাববার সময় ছিলো না; ভবানীগঞ্জ এসে পড়েছে। অজিত বাবুকে সঙ্গে নিয়ে ওরা ঘাটে গেল।

তারা বিশ্রাম-কক্ষে এসে উঠলেন। অজিতবাবুর কাকা, এক পোড়া বিধবা, অজিতবাবুর কাকীমা আর বছর ছয়েকের ছোট্ট একটি মেয়ে। প্রথম শ্রেণীর কক্ষ বন্ধ ছিল। চাপরাসীকে খবর দিতে সে সেলাম ঠুকে দরজা খুলে দিলো। তার ব্যবহারে বোঝা গেল, সে অজিতবাবুর কাকার পূর্ব-পরিচিত এবং তিনি নিঃসন্দেহে কোনো উচ্চপদস্থ সম্ভ্রান্ত ব্যক্তি।

মেল দেবে রাত ছটোয়। স্ত্ররাং বিছানা-টিছানা খুলে একটু ভালো করে বিশ্রাম নিতে কোনো বাধ্য নেই। শফিক আর নিতাই তাঁদের বিছানা পেতে দিয়ে সম্ব্রমের সঙ্গে দূরে সরে দাঁড়ালো। ছোট্ট ফুলের মতো মেয়েটির দিকে একবার তাকিয়ে শফিক আর যেন চোখ ফেরাতে পারে না। এতো সুন্দর হয় শিশু! রোগা কাঠি কাঠি হাত পা অথচ পিলে পেটুক, খ্যাংরার মতো চুল আর পিঁচুটিময় ডাবডেবে চোখওয়ালা, গ্যাংটো, কিলবিলে সেই সব শিশুদের দেখে শফিক এতোদিন শুধু

সভয়ে চোখ ফিরিয়ে নিয়েছে। কিন্তু ফুটন্ত পদ্মের মতো সুন্দর সুসজ্জিতা মেয়েটিকে কোলে নিয়ে আদর করতে ইচ্ছে করে। সারা ঘরময় সে ছুটে বেড়াচ্ছে—কখনো বা বাইরের বারান্দায় গিয়ে রেলিং ধরে রাস্তার দিকে তাকাচ্ছে, মাকে ডেকে আধো আধো স্বরে বলছে কী সব কথা। সাবধান করে সরিয়ে আনতে গেলে ছুটে পালাচ্ছে আরেকদিকে। পরক্ষণেই রাস্তায় সাইকেল রিক্সার বেলের টুং টাং আওয়াজ শুনে রেলিং ধরে নিচে উকি দিয়ে পা নাচিয়ে হেসে উঠছে। শফিক মুঞ্চচোখে তাকিয়ে রইলো।

পাখা নিয়ে বিশ্রাম-কক্ষের মাঝ দিয়ে যেতে যেতে নিতাই বললে : কী ভীড় দেখেছিস! সবই বোধ হয় ঢাকা মেলের যাত্রী। খুলনা মেল আসামাত্রই অজিতবাবুদের তুলইয়া দিতে হইবে, নইলে জায়গা পাবেন না।

: পূজো আর ঈদ এক সঙ্গে পড়েছে এবার। তার ওপর স্টিমার কমাইয়া দেছে।

ঢাকা থেকে সেদিন আর কোনো স্টিমার এলো না, রাত এগারোটায় এলো খুলনা মেল। তার একটা মোট জুটলো। খেয়ে শফিক বিশ্রাম কক্ষে এলো।

: এই যে শফিক। নিতাই কোথায়, তুলে দেবে না আমাদের ?

বিছানা বেঁধে ওরা সবাই প্রস্তুত হয়েছেন।

: এখন তো নয় বাবু, মেল কয়লাঘাট থেকে আইলে তবে লোক উঠবে।

অজিতবাবু শান্ত হলেন। তাঁর কাকা একটা ইজিচেয়ারে শুয়ে চুরুট ফুঁকতে লাগলেন। তাঁর স্ত্রী আর প্রৌঢ়া ওধারে শুয়ে পড়েছেন একটা

শাহেরবাগু

সুজনি বিছিয়ে। খুকু বিনু তাঁদের হুজনের মাঝে শান্ত হয়ে ঘুমিয়ে রয়েছে। কে বলবে ও অতো চঞ্চল আর হুঁপু!

: ভিড় হবে কেমন আজ ?

অজিতবাবুর সঙ্গে এটা ওটা কথায় শফিক জমে গেল।

বাইরের স্টেশনের কোলাহল তখন কিছুটা কমে গেছে। অন্ধকার বট গাছের তলায় নিভে এসেছে ফকিরের আগুন। রাস্তায় গাড়ি ঘোড়ার ভিড় নেই। মাঝে মাঝে কানে আসে কারো কোন উচ্চতর কথা, নিচের যাত্রীদের আলাপ-গুঞ্জন ছাপিয়ে। স্টিমারের ডাইনামো চলছে ঠক ঠক শব্দ তুলে।

এক সময় ঘড়িতে বারোটা শব্দ বেজে উঠলো। এক নম্বর ঘাটে স্টিমার লাগার শব্দ পাওয়া গেল।

নিতাই ছুটে এলো : স্টিমার দিয়েছে, তাড়াতাড়ি করুন বাবু।

ঘাটের ভিড় দেখে প্রৌঢ়া বিস্ময়োক্তি করে উঠলেন : এ ভিড় ঠেলে এগোবে কেমন করে ?

নিতাই আগে এগিয়ে গেল : না পারলে বসেও যেতে পারবেন না। আমার পিছনে আসেন।

তৃতীয় কুলিসহ সবাই তার অনুসরণ করলে। অজিতবাবু আর শফিক রইলো সবার পিছনে।

বিরট জনতা ঠেলাঠেলি করে একে অন্নের আগে ঢুকতে চাচ্ছে—কারো দিকে কারো কোনো দৃকপাত নেই।

: আস্তে আস্তে, সঙ্গে মেয়েছেলে রয়েছে। করছেন কী মশাই !

অজিতবাবুর কাকা চাপের মধ্যে পড়ে ধমকে উঠলেন। কিন্তু চাপের কোনো পরিবর্তন ঘটলো না।

পুলের ওপর পা ফেলারও স্থান নেই। অবকাশ থাকে না। পিছনের চাপ সামনে ঠেলে নিয়ে যায়। প্রৌঢ়ার পায়ে কার জুতোর চাপ পড়লো, তিনি অস্ফুট চিৎকার করে উঠলেন। কার স্ট্রটকেশের কোণার খোঁচায় আহত মাথায় হাত বুলোলেন অজিতবাবুর কাকা। মহিলাটি বিনুকে কোলে করে সামনে থাকার চেষ্টা করছেন। অজিতবাবুর কাকা পিছনে ফিরে তাকালেন, বেরিয়ে পিছিয়ে যাওয়ারও তখন উপায় নেই। যাত্রীজনতা যেন বাঁধ-ভাঙা জোয়ারের মতো উন্মাদ হয়ে গেছে। মাথার মোট সামলে রাখতে শফিকের গায়ে ঘাম ছেড়েছে। পাঁজরে করে কনুইয়ের খাঁকায় রেলিংএর দিকে পড়তে পড়তে অতিকষ্টে সামলে নিলো।

ঃ আহা-হা—সম্মুখ থেকে একটা চিৎকার উঠলো। বিনুর মা আর্তনাদ করে উঠেছেন। রূপ করে নিচের স্রোতমান জলে কী একটা শব্দ উঠলো।

ঃ কী, কী হোলো কাকিমা ?—অজিতবাবু শাগলের মতো সামনে এগিয়ে গেলেন।

ঃ বিনু পড়ে গেছে।

ঃ বিনু পড়ে গেছে !—শফিক এক মুহূর্ত বিমূঢ় হয়ে ছিলো, তার পরে ‘অজিতবাবু মোট দেখুন’ বলে ভিড়কে প্রায় পায়ে দলে সে বিনুর মার কাছে এগিয়ে গেল : কোথায়, কোন্‌খানে ?

ভিড়ের চাপ তখন কিছুটা শিথিল হয়ে এসেছিলো, তাদেরই কয়েকজন আঙ্গুল দিয়ে স্থানটা দেখিয়ে দিলো।

বিনুর মা নিথর। ফ্যাল ফ্যাল করে জলের দিকে তাকিয়ে রইলেন।

শাহেরবাহু

ঃ কেমন করে ধরেছিলে তুমি ?—ক্ষিপ্ত ক্ষোভে বিকৃত শোনালো বিহুর বাবার স্বর ।

প্রোটা বিলাপে মুখর ।

শফিক কালবিলম্ব না করে জলে লাফিয়ে পড়লো ।

জোয়ারের স্রোত ফ্লাট আর স্টিমারে বাধা পেয়ে ঘূর্ণী রচেছে সে স্থানটাতে । স্বল্পজ্যোৎস্নায় চোখে পড়ে শুধু কালো জল । ছুটন্ত কলকল ছলছল ধ্বনি এবার সমস্ত যাত্রীদের কোলাহল ছাপিয়ে কতোগুলি ব্যগ্র মুহূর্ত নিয়ে এল । এক দুই—পাঁচ-সাত মিনিট কেটে গেল ।

সেই যে শফিক ডুব দিয়েছে আর জাগছে না । গোটা কয়েক টর্চের আলো কালো জলের ওপর সন্ধানে লাগলো । ঐ বুঝি ভেসে উঠলো কোন মাথা ফ্লাটের আড়ালে বা নোঙর দেওয়া শিকলের গোড়ায় । কিন্তু সব আশা ব্যর্থ করে ছুটে যাচ্ছে অথৈ জল কালো কালো কচুরীপানা ঘোরাতে ঘোরাতে ।

ঃ আর উঠতে হবে না । ফ্লাটের নিচে আটকে গেছে নিশ্চয় । গতবার এমনি করে মরলো না একজন !

ঃ এখনো উঠছে না দেখে সন্দেহ হয় ।

যাত্রীদের মাঝ থেকে নানা কণ্ঠ মন্তব্য করে ।

এমন সময় পাড়ের দিক থেকে রব উঠলো—উঠেছে ! পেরেছে !

টর্চের আলোগুলো বিছাৎবেগে সেদিকপানে ঘুরে গেল—খাড়া পাড় বেয়ে উঠে আসার শক্তি পাচ্ছে না শফিক । তার কোলে সংজ্ঞাহারা বিহু ।

বিহুর মা উল্লাসে চিৎকার করে ভিড় ঠেলে ছুটে গেলেন ।

স্টিমার কোম্পানীর জনৈক সাহেব দুর্ঘটনার খবর পেয়ে ছুটে

এসেছিলেন। অচৈতন্য শফিক জ্ঞান পেয়ে দেখল, তিনি তার সামনে উবু হয়ে বসে আছেন। সে সমস্ত্রমে উঠে বসার চেষ্টা করতেই তিনি ওর ঠোঁটের কাছে একটা ছোট গ্লাস তুলে ধরলেন : এইটুকু খেয়ে ফেলো।

কতোকটা ভয়ে ভয়েই যেন শফিক সে পদার্থটুকু গলাধঃকরণ করলো। তারপর তাকালো নিজের চতুর্দিকে। সাহেবের পেছনে বিস্তারিত চোখে তার দিকে তাকিয়ে রয়েছে সর্দার। শিয়রের আছে বসে আছেন স্নেহময় চোখে অজিতবাবুর কাকা। নিতাই, গফুর, ইয়াসিন এবং আরো অনেকে নন্দিত দৃষ্টিতে তার দিকে তাকিয়ে রয়েছে। শফিক কেমন সংকুচিত মনে করল নিজেকে। অতো দূরে সরে দাঁড়িয়েছে কেন ওরা? চুপি চুপি ডাকলে : নিতাই।

নিতাই একটু এগিয়ে এলো।

: কীরে, স্নস্খ বোধ করস্ এখন?

: বিনু কোথায় রে?

: তার মায়ের কাছে। ভালো আছে। সবাই কী যে সুখ্যাতি করছে তোর।—উৎসাহের আবেগে শফিকের হাতখানা চেপে ধরে নিতাই। সাহেব আর বিনুর বাবা কী কথা বলছেন। শফিক আবার শুধালো : মোটগুলো ঠিক আছে তো?

: হ্যাঁ, বিছানাও পাতা হইছে। তুই এক কাজ কর, বাবুর সঙ্গে সাহেবের চেনা আছে, এই সুযোগে কথাটা পাড়। সাহেব বাবুর কাছে তোর সাংঘাতিক সুখ্যাতি করছেন রে!

বলবে কি বলবে না, ভাবতে লাগলো শফিক। জাহাজঘাটের পাস পাওয়া কুলি এবার সে হবেই। ভিথিরি বলে ভান্ন আর অবজ্ঞা করতে

পারবে না। এবার সাহেবের কানে তার নিবেদনটা পৌঁছুলে তাকে যে নিরাশ হতে হবে না, তাতে সে নিশ্চিত। কিন্তু পাস পেলেও সে খুশি হবে কি? ঐ নিতাই, ইয়াসিন—ওদের কাছ থেকে সে যাবে দূরে সরে। ইয়াসিন, হোক তার প্রতি বিরূপ বা হলোই না হয় তার স্বভাব খারাপ, কিন্তু সে তো জানে কতো কষ্ট করে আজ পর্যন্ত সে তার বুড়ি মাকে বাঁচিয়ে রেখেছে। একলা পাস পেলে সত্যিই কি সে আনন্দ পাবে? তার চাইতে ওদের কথাও সাহেবের কাছে বললে কেমন হয়? ক্ষমতার মানুষ ওরা, ইচ্ছে করলে সব ছন্নছাড়াদের ভাগ্য বদলে দিতে পারে।

কেরায়া নায়ের মাঝি

বিলের ফুরফুরে বাতাসে অতি ভোরেই জমিলার ঘুম ভাঙলো। শিয়রের দিকের ছয়ারটা খোলা। ছুই ছেলে আর শিশু মেয়ে তখনো ঘুমন্ত; শুধু আজাহার বিছানায় নেই, পুরু কাঁথাটা পায়ের কাছে সরিয়ে দিয়ে কখন উঠে গেছে। গত সপ্তাহখানিক ধরে আমাশয়-ভোগা কাহিল শরীরে সে বিছানা ছেড়েই উঠতে অক্ষম, তবু এই এতো ভোরে কোথায় বেরিয়ে গেল? এদিক ওদিক সম্ভাব্য স্থানে উকি ঝুঁকি দিয়ে বিস্ময়বিমূঢ় মনে সে পুকুরপাড়ে এসে দাঁড়ালো।

ঘাটে নৌকাখানাও নেই। জমিলা যেন হঠাৎ আঘাত পেয়ে নিশ্চল হয়ে পড়লো। ঐ শরীরে আজাহার তাকে না জানিয়েই কেরায়া বাইতে বেরিয়ে গেল! হতে পারে, ভাঙা বুরুবুরু সংসারের অভাব-অনটন নিয়ে কাল তার সঙ্গে খিটিমিটি করেছিলো বা অনেক যা-তা কথা বলেছিলো। তখন কি মেজাজ ঠিক ছিলো জামিলার! তবু স্নস্হ হলে কথা ছিলো না। কিন্তু এমন অসুখ-কাঁপা স্বাস্থ্যও সে বেরিয়ে যায় কেমন করে?

খালের ঘাটে মুখ ধুতে বসে গত বিকেলের ঘটনাটা একবার পর্যালোচনা করে নিলো জমিলা। ছোটছেলে কাসেম কাল মুন্সীবাড়ির দিক থেকে কাঁদতে কাঁদতে ফিরে এলো। জমিলা প্রশ্ন করে জানে, তাদের কাছারির সামনে শশার মাচা থেকে সে একটা ছোট শশা ছিঁড়েছে দেখে ছোটমিয়া তার গালে চুরির অভিযোগে এক চড় কশিয়ে দিয়েছে। সে কী চড়! পাঁচ পাঁচটা আঙ্গুল রক্তশূন্য হলদে গালে কালো হয়ে

ফুটে উঠেছিলো। সামান্য একটা কচিশশার জুতা এই শান্তি জমিলাকে প্রায় ক্ষিপ্ত করে তোলে ; এমন গালাগাল ছিলো না যা সে নেপথ্যবাসী ছোটমিয়ার উদ্দেশে পাড়েনি। আজাহার হৈ হৈ করে ধমক দিয়ে ওঠে—ওরে চুপ, চুপ হারামজাদী, হেরা হোনলে আর রক্ষা থাকবে না। হুণ্ডায় হুণ্ডায় মুনীবাড়ির কেয়াডা পাই দেইখাই মাঝে মাঝে খাওয়ানডা জোড়ে, হেয়া মনে রাহিস।

: বাও ক্যা অমন চাড়ালের কেয়া ? ছুইয়াইতে আর চড়নদার নাই ? বড়ো আঠো আনা এক টাহা দে, হেইর পানহে একবারে কেনা গোলাম অইয়া থাকমু ! ক্যা, ছুইয়াইতে আর মান্ন নাই ?

: থাকলে দেহোনা ! বিনা ওষুধে পথো পড়ইয়া রইছি, জিগাইতে আইছে কেউ ? বোলে, ম্যাভাই কী আইছে তোমার ?—বলতে বলতে আজাহারের ঠোঁট দুটি কেঁপে উঠেছিলো।

কিন্তু জমিলার তখন মত্ত মেজাজ, বলেছে : তুমি চোপো, তোমার নাহান অতো ভিজা বিলই আমি না যে, এতো অন্ডায় সহিয়াও চুপ করইয়া থাকমু। আমার পোলারা চোর একথা কইবে কেউ ? খিদার চোডে এউক্ক শশাই যদি নিয়া থাকে হেতে—

: আমি ভিজা বিলই ?—আজাহার তার খিটখিটে মেজাজ সবেও নিজেকে সংবরণ করেছে। ছেলেমানুষের মতো অভিমান আর বদ্মেজাজীর উয়া ছুই-ই তাতে মেশানো। সে মুহূর্তটি মনে পড়লে জমিলার এখনো হাসি পায়, অথচ এরি জবাবে সে বলে ফেললো—
ভিজা বিলই না ? পোলাগো খাওয়াইতে পারবা না, হেরা এরডা ওরডা যাইয়া ধরবে, এর ছুয়ারে চাইবে ফ্যান, ওর ছুয়ারে ক্ষুদ, কেউ কিছু না দেলে খাওনইয়া জিনিস পাইলে খাইবে, আবাবু হুইয়ার

উপরে যদি খায় অন্ডায় মাইর, তউ তুমি কিছু কইতে পারবা না ?

: না, পারমু না । গেছেলে ক্যা রাফুসইয়া হেয়ানে ?

: রাফুসইয়া ! কয়দিন ধইর্যা পেটে ভাত পড়ে না খেয়াল আছে ?

ঢ়াহো, তোমার ব্যারামইয়া শরীল, তুমি বাজে প্যাচাল পুইডোনা ।

খিদায় যদি একটা কচি হোয়া ছিড়ইয়াই খাছে, হেতে এমন অন্ডায়ডা

কী অইছে হুনি ? মুন্সিগো দৌলত হের জন্তে কতোহানি কমছে ?

: হেরা শখ কইর্যা লাগাইছে । না কইয়া ও ছেড়তে গেলো ক্যান ?

: জানি জানি, হেগো চিন্তাডা কেমন জানি । এউক্কা শশার লাইগ্যা

বাছারে আমার এমন চোপাড় দেছে যে, ভিরমী খাইয়া পড়লে,

বড়োগ্যাদা কোলে কইর্যা কাঁদতে কাঁদতে ছুইট্যা আইছে ।

চড় খেয়ে ছেলেটা ভারি নির্জীব হয়ে পড়েছিলো । ক্ষুধায় পেটেপিঠে

এক, চোখ দুটো কোটরাগত, তার ওপর চড়ের ধাক্কায় সে সেখানেই

মাথা ঘুরে পড়ে গিয়েছিলো ।

: বেশ করছে, গ্যাছেলে ক্যা হারামজাদা ?

: তউ তুমি কবা গ্যাছেলে ক্যা ? কিছু কইতে পারবা না, খাইতেও

দেতে পারবা না, তয় জন্ম দেছেলা ক্যা ?

এর পর আজাহার আর একটি কথাও উচ্চারণ করেনি, অকস্মাৎ চূপ

করে গেছে । তারপর গভীর রাত্রে জমিলা ঘুম ভেঙে দেখে, কাসেমের

আহত গালে বীতনিদ্র আজাহার শুয়ে শুয়ে হাত বুলোচ্ছে আর বলছে

: খুউব খিদা লাগছেলে তোর, না ?

: হুঁউ ।

খালের ওমুখে একটা অগ্রসরমান নৌকা দেখা যেতেই জমিলা পাড়ে

উঠে এলো। নৌকাখানা করিম মাঝির। তার বাড়িও এই গ্রামে, আজাহারের সঙ্গে দূর সম্পর্কের আত্মীয়তা আছে। যেতে যেতে সে জমিলাকে দেখে প্রশ্ন করলো : আজাহার আছে কেমন, ভাবিছাব ? ঘোমটা টানার চেষ্টা করে তাড়াতাড়ি জবাব দিলো জমিলা : অশ্লুক হেই রহমই, তউ আইজ আবার কেয়ায় গেছে। কিছু কইয়াও যায় নায়। আপনে হেরে দেখলে যেভাবে পারেন বাড়ি পাঠাইয়া দিয়েন।

: কেয়ায় বাইর অইছে !—করিম বৈঠা থামিয়ে বিস্ময়ধ্বনি করলো—
ও শরীলে যাইতে দেলা ক্যামনতারা ?

: কই যে, রাইতে না জানাইয়া গেছে।

: ওঃ ! আচ্ছা, কাইল ফিরমু আমি, এয়ার মধ্যে দেহা অইলে অবশ্যই পাঠাইয়া দিমু।

করিম চলে যেতে আবার ঘাটে নামলো জমিলা। ওপারের ঘাটে সেই সময়ে মুখ ধুতে এলো সালেহা।

: জানো সালেহা, হাসেমের বাপে আইজ ব্যানে রাগ অইয়া নাও লইয়া বাইর অইছে।

: রাগ অইয়া ! ক্যা, ঝগড়া হরছিলি বুঝি ?

সংক্ষেপে ঘটনাটি জানালো জমিলা।

সালেহা হেসে উঠলো : ভিজা বিলই কইলে রাগ অইবে না ? স্তম্ভ মর্দ হোনলেও তো চ্যাতে। তায়, একে হে ব্যারামইয়া, হেয়ার উপরে তোর আদরের—

তার সহাস্ত মস্তব্যো জমিলা ধমক দিয়ে উঠলো : দূর মুখপুড়া, দিন দিন তোর বয়স কমে না বাড়ে ?

নাগেহা হাসতে হাসতে পাড়ে উঠে গেল কুলি ছিটিয়ে ; যেতে যেতে বলে গেল : ভাবিস না, দেহিস আনে হাঁঘের আগেই আবার কোলে ফিরইয়া আইচে ।

ঃ ধ্যেৎ !—তামাসা উপভোগ করার মতো মনের অবস্থা জমিলার নেই । ছেলেরা নাচনমহল হাটে শাপলা বিক্রী করতে যাবে বলে ডাকাডাকি শুরু করেছিলো । জমিলা ঘাট থেকে উঠে এলো ।

ছুটি ছেলে, হাসেম আর কাসেম, শাপলা নিয়ে হাটে রওনা হলো । ছোটো মেয়ের ঘুম ভেঙেছে ; তাকে মাই দিয়ে ঠাণ্ডা করে, তার নষ্টকরা কাঁথা কাপড় ধুয়ে, স্নান করে আবার দাওয়ায় পা ছড়িয়ে বসার সময় জমিলা লক্ষ করল, সূর্য এরই মধ্যে মাথার উপর উঠে এসেছে । ক্ষুধা লেগেছে তার, কিন্তু ঘরে খাবার নেই । কিছুই । কালকের কোথা থেকে আনা একটা নারকেলের অর্ধেকটা ছেলেরা খেয়ে গেছে, বাকি অর্ধেকটা শিকেয় ঝুলছে, হয়তো ওরা ফিরে এসে খাবে । জমিলা কিছুক্ষণ ইতস্তত ক'রে সেটা নামিয়ে এনে কামড়ে কামড়ে খেল খানিকটা ।

হাওয়ায় কেমন একটা গুমোট শুকনো ভাব । সারা গায়ে ঘাম ছেড়েছে । জমিলা একটা পাটি বিছিয়ে দক্ষিণের ছয়ারটার কাছে শুয়ে পড়ে ।

চোখে পড়ে বিলের বুক চিরে জেলাবোর্ডের নতুন গড়া পথ—সোজা চামটা হাট পর্যন্ত চলে গেছে । ছাতা মাথায় একটি লোক সেদিকে যাচ্ছে, রোদে ঝিলমিল করছে তার দেহ । রাস্তায় চামটা হাটের দূরত্ব চার মাইল অথচ আগে এই নদীনালা খালবিলের দেশে সেখানে যেতে সকাল সন্ধ্যা লাগতো । বিয়ের ছবছর পরে আজাহারের

সাথে সে একদিন জারীগান শুনতে চামটা গিয়েছিলো। আঁকা বাঁকা খালবিলের পথটা ভারি ভালো লেগেছিলো! তখন—হ্যাঁ আশ্বিন মাসই, সকালে রাঁধা-ভাত নিয়ে তারা রওনা হোলো। সে ছিলো ছইয়ের মধ্যে বসা, সামনে পর্দা টাঙানো। আজাহার গলুইতে বৈঠা হাতে বসে নির্দেশ দিয়েছে শাস্ত শিষ্ট কলাবউয়ের মতো বসে থাকতে। জমিলা বহুবার উসখুস করলো চারদিকের কিছুই দেখতে পাচ্ছে না বলে; কিন্তু আজাহারের তাতে ক্রক্ষেপ নেই দেখে লোকালয় একটু পাতলা হতেই সে একটানে পর্দাটা খুলে ফেললো।

: বাবারে বাবা, আমি কি একটা মানু না! কোন্ হান দিয়া আইলাম গেলাম হেয়া দেখমু না, তয় আইলাম ক্যা?

আজাহার তো হা-হা করে উঠেছে : আহা-হা, করো কী, করো কী? ব্যাভারা আছে।

: আছে হেতে কী অইবে? খাইয়া তো হালাইবে না কেউ।—বলতে বলতে সে ছইয়ের বাইরে গিয়ে বসেছিলো, তারপর চারদিক দেখে বললে : সবদিকে বিল, এয়ার মধ্যে তোমার বউরে কেউ দেখতে আইবে না।

আজাহার হেসে চুপ করে থেকেছে।

ঐ বিলের মাঝামাঝি তারা পৌঁছেচে—যেখানে ঐ ছাতামাথায় লোকটি দেখা যাচ্ছে, প্রায় অমনি জায়গায়—আজাহার পিছনে আঙুল দিয়ে নিজেদের বাড়িটা দেখিয়ে দিলো তখন। সবুজ গাছপালা ঘেরা তাদের বাড়িটা বিলের পাশে দাঁড়ানো; ঘর-টর কিছু চোখে পড়েনি।

কী না বিচিত্র মধুর ছিলো সে দিনের স্বাদ! বিলের স্বচ্ছ জলের বুক

ঠেলে ওঠা ধানের গোছা, শাপলার পাতা, ফুল আর ফুল ; হাত দিয়ে সে ছুঁয়ে ছুঁয়ে যাচ্ছিলো সব। রাঙা ফুল ছিঁড়ে খোঁপায় পরল একটা। অহেতুক ভাবে একটা পুঁটি লাফিয়ে উঠলো নৌকায়। গাঙ শালিখের ‘হট্টিট্টি’ চিৎকার শুনে সে হেসে গড়িয়ে পড়ছিলো বারবার। আজাহার তো তার চাঞ্চল্যে অস্থির : ছইর মধ্যে যাইয়া বও, ওরহম করলে পড়ইয়া যাব। আর, না হয়, আমারে এটু তামাক খাওয়াও।

আজাহারের ঘর্মাক্ত পেশীগুলো বৈঠার টানে ফুলে ফুলে উঠছে ; চোখ মুখ সব রোদে লাল। তামাক খেয়ে আবার বৈঠা হাতে নেবার সময় জমিলা বলেছিলো : এটু জিরাইয়া লও এবার।

আজাহার তা শোনেনি ; জমিলাই তাকে জোর করে ছইর মধ্যে টেনে আনলো, তাকে শুইয়ে ঘাম মুছিয়ে দিলো যত্ন করে। সেই সময়ে খোঁপার শাপলা ফুলটা পড়ে গিয়েছিলো আজাহারের মুখের ওপর। সেটা তুলে আবার খোঁপায় পরার সময় জমিলা বললে : তোমার মুখখানো রোদে এই ফুলডার নাহান রাঙা অইয়া ওঠছে।

বলেই পড়লো বিপদে। আজাহার উঠে ছুঁছুঁমি শুরু করে দিলে : হাচইও ? আমারে হেইলে কোন হানে লবা ?

এবং উত্তরের কোনো প্রতীক্ষা না করেই আজাহার তার কোলে মুখ গুঁজে শুয়ে পড়েছিলো। জামিলা তো লজ্জায় কী করবে ভেবে পায় না।

: ছিঃ, ঐ দেহো ব্যাডারা।

ধমকে কাজ হোলো, আজাহার তাড়াতাড়ি আবার বৈঠাহাতে গলুইতে গিয়ে বসেছিলো : কই ব্যাডারা ?

সামনে ফের পর্দা টানিয়ে জমিলার সে কী উচ্ছ্বসিত হাসি : বাওনা তরাতরি, হাঁকের আগে পৌঁছবা কেমনে ?

সেই মাদকতাময় দিনগুলি কোথায় গেল ? ছেলেমানুষের মতো যে আজাহার সেদিন পর্যন্ত কেয়া বাইতে যাবার আগে জমিলার পানরাঙা ঠোঁটে চুমু না খেয়ে বেরোতো না—তাকে কেন যে কাল অমন শক্ত কথাটা বলতে গেল ! সে কি তাদের খাওয়া পরার চেষ্টার কল্পন করে ? ধূলোট কৃষির সময় সকাল সন্ধ্যা খাটুনি, একা একা জোঁকের কামড় খেয়ে বর্গা ক্ষেতে বীজ বুনোনো, চাই বুনে মাছ ধরা, হাটে বিক্রী করা, তার পরেও অবিরাম ‘কেয়া’ বাওয়া—কতো আর করবে একলা মানুষ ? জমিলার চাইতে সে কি ছেলে মেয়েদের কম ভালোবাসে ? কাসেমের গেল-বার জ্বরের সময় সারারাত নিঘূর্ম চোখে তার মাথায় হাত বুলায়নি সে ? একদিন অবস্থা একটু খারাপ হোলো, কাসেম কথা বলে না, বুকের মাঝে কেমন একটা অশুভ ঘড়ঘড় শব্দ, মুখে উঠল ফেনা । আজাহার কি কম কঁদেছে সেদিন ?

অনুতাপের আর অবধি রইলো না জমিলার । অল্প অস্থখ নয়, রক্ত আমাশয়, শরীর শুকিয়ে এমন হয়েছে যে গায়ে আধ পয়সার বল নেই, উঠতে গেলে কঁপে বসে পড়ে—সেই আজাহার কেমন করে আজ নৌকো নিয়ে বেরিয়ে গেল ! গেছে যে জমিলার কথার উপর রাগ করেই তাতে আর কোনো ভুল নেই । কিন্তু জমিলাকে কি সে চেনে না ? মুখ ফসকে যে কথাগুলো তার মুখ দিয়ে বেরিয়েছিলো, বাস্তবিকই সেগুলো কি তার অন্তরের কথা ? রাগ করে বেরিয়েছে নিশ্চয়ই, নইলে কি যাবার আগে জানিয়েও যেতে পারত না তাকে !

বেলা ক্রমে পড়ে এলো । পাখি-পাখালির ডাকে আর নিভন্ত আকাশে

নামলো বিকেল । রাস্তার ওপর গোরু নিয়ে ফিরছে কয়েকজন লোক । খালে কাদের নৌকো যাওয়ার শব্দ বাজলো । মেয়ে জেগে উঠে মাই হাতড়ে কাঁদতে শুরু করেছে, তবু জমিলার আচ্ছন্নতা কাটে না, যেন সে কোথায় হারিয়ে ফেলেছে নিজেকে—ঐ দূর বিলপ্রান্তের ঝিলমিলে গাছপালার অন্তরালে । বালিশ ভিজে উঠেছে তার অনুতাপের অশ্রুতে ।

শেষে ছেলেরা এসে পড়তেই সে উঠে পড়ে । বড়ো ছেলের হাতে চালের বড় পৌটলা, সেটা দাওয়ায় নামাতেই ছোটো ছেলে ভেতর থেকে কী একটা মোড়ক তুলে নিলে ; বড়ো ছেলে হা হা করে উঠলো ।

: দে, দে, আমাডে দে, হালাইয়া দিবি তুই ।—থাবা দিয়ে জিনিসটা সে নিজের হাতে নিলো—বাজানে আইছে মা ?

: না । ক্যা, তোর হাতে ওডা কী ?

: অমুখ । হাটখোলার অশ্বিনী কবিরাজের হাত পাও ধরইয়া এডু আনছি বাজানের লইগ্যা । দেতে কী চায় ! হ্যাশে—

ছোটোছেলে বলে উঠলো : এয়া খাওয়াইলেই আমাশা ভালো অয়, হে কইছে ।

দিগ্বিজয় করে এসেছে যেন ছুভাই । পথকষ্টে দেহ শ্রান্ত, কিন্তু এই ওষুধটুকুর জগুই তাদের সারা অন্তর উৎসাহ আর আনন্দে প্রদীপ্ত ।

: যা, মাচার উপরে থুইয়া আয় । এতে চাউল কয় সের ?

: এক সের । তুমি মা রাক্কো তরাতরি, খিদা লাগছে—বলেই ছোটছেলে নেতিয়ে শুয়ে পড়ে ।

জমিলা তাড়াতাড়ি রান্না বসাতে যায় ।

খাওয়া দাওয়া মোছা সারা হতেই বিকেল প্রায় শূন্য হয়ে আসে। দূরের অঁথে বিলের জল তীক্ষ্ণভাবে ঝলমলায়; কাঁঠাল-আম গাছের আড়ালে ঢাকা সূর্য পাতার ফাঁকে ফাঁকে রোদ-ছায়ার চঞ্চলতা রচনা করে বিস্তৃত উঠোনে। গাছে গাছে পাখি-পাখালির হিসাবনিকাশ, নীল আকাশের গায়ে সারবাঁধা বকের অভিযান আর গাও শালিখের কচিৎ সরবতা যেন কলরব করে জানায় সন্ধ্যার আগমনী। তখনো আজাহারের কোনো সংবাদ নেই।

সন্ধ্যাও পার হয়ে গভীর রাতে সারাদেশ নিথর হয়ে আসে; জমিলার চোখে ঘুম আসে না। খাল পাড়ে বা বাইরে সামান্য একটু শব্দ হলেও সে চমকে উঠছে—ঐ বুঝি এলো। চকিতে বিছানা ছেড়ে দাওয়ায় নেমে সেদিকে কিছু দেখতেও চেষ্টা করে, কিন্তু কখনো সেদিককার নিশ্চিহ্ন অন্ধকার আর নীরবতা ভেঙে আজাহারের লম্বা শীর্ণ দেহাবয়ব বেরিয়ে আসতে দেখা যায় না। জমিলা আবার বিছানায় এসে বসে। রাত বাড়ে, ক্ষীণ একটু চাঁদ আকাশের ওপাশ থেকে যাত্রা শুরু করে।

বিলের বুক থেকে একটা ঘুম-পাড়ানো হাওয়া অনেক পাতা ঝরার শব্দ তুলে বাড়ির ওপর দিয়ে বয়ে যায়। জমিলা পরিষ্কার শোনে খালপাড়ে কার নৌকার শিকলের শব্দ। তাড়াতাড়ি সে দাওয়ায় নামে। ঘরে একফোঁটা তেল ছিলোনা যে কুপিটা জ্বালবে। আবছা আলোয় খালপাড়ে যাবার সংকীর্ণ পথটুকু দেখা গেলেও অনেকক্ষণ অপেক্ষা করে জমিলা সেপথে কাউকে দেখে না। ভাবে, হয়তো এখনো রাগ পড়েনি আজাহারের। তার ছেলমানুষী অভিমান তাকেই সাধাসাধি করে ভাঙাতে হবে। সেজগুই সে নৌকো ছেড়ে উঠছে না হয়তো ১ দাওয়া

থেকে নেমে সে খালপাড়ে এগিয়ে গেল, কিন্তু কোথায় নৌকা !
 স্রোতোমান খালে উপরের গাছের পাতার ফাঁকে বিলিমিলি টাঁদের
 ছায়া যতোটুকু স্থান স্পষ্ট করে তুলেছে, তার কোনোখানেই কোনো
 নৌকোর চিহ্ন নেই। ভাঙামনে সে আম গাছটার সঙ্গে ঠেস দিয়ে
 দাঁড়ায়। মাথাটা যেন কেমন ফাঁকা হয়ে গেছে তার, মনে হচ্ছে হয়তো
 বা সে ঘুরেই পড়ে যাবে।

দূর বিলের ওধারের জঙ্গলে কতোগুলি নিশাচর পাখি ডাকে, সারা
 বাতাস অবাধে তাদের কলরব ছড়ায়। সালেহাদের বাড়ির বাদামগাছে
 অজস্র বাতুড় ডানা ঝটপটায়। আশে পাশে কোথাও ডাকে ডাঙ্ক।
 কেমন একটা ব্যাকুল শূন্যতায় জমিলা অস্থির হয়ে ওঠে। বিলের
 ওপারের জঙ্গলে একপাল শেয়াল ডেকে ওঠে ; সরসর করে কী একটা
 চলে যায় নিচে কেয়াবনের ঝোপে, গা ছমছম করে ওঠে জমিলার।
 আস্তে আস্তে সে ঘরে চলে আসে।

ভোরে বড়ো ছেলেকে পাঠিয়ে দিলো নলছিটি হাটে ; আজাহার হয়তো
 বা গেছে গঞ্জের ঘাটে। কিন্তু সেখানেও নাকি সে নেই, ঘাটমাঝিও
 কোনো খবর জানে না তার।

সেদিনের ছপূর গড়িয়ে গেল, তখন পর্যন্ত ফিরে এলো না আজাহার, না
 পাওয়া গেল তার কোনো খবর। জমিলার উদ্বেগ বিরক্তি আর রাগের
 রূপ নিল এবার। এতো রাগও করে মানুষ !

দেহ একে ক্ষুধায় নির্জীব, তার ওপর আজাহারের জন্য এই হুশিস্তা,
 জমিলা সত্যি সত্যি খুব ক্ষুব্ধ হয়ে ওঠে আজাহারের ওপর। তবু খালের
 দিকে চেয়ে একটা ছায়াশীতল গাব গাছের তলায় সে বসে রইলো।
 কিন্তু কোথায় কে।

সহসা একসময় তার সারা গা শির শির করে উঠলো ছুঁনিরোধা শীতে।
বুঝতে পারে জমিলা সারা গা কাঁপিয়ে জ্বর এসেছে তার। আঁচলটা
ভালো করে গায়ে জড়িয়ে নেবার সাধ্যও যেন তার নেই। হাতে ভর
দিয়ে কোনোমতে উঠে সে আর একবার তাকালো খালের প্রান্তে।
এবার ঘরে গিয়ে বিছানায় শুয়ে পড়তেই হবে তাকে। হায় খোদা!
আজাহারকে তুমি এনে দাও, আমি তার পায়ে ধরে মাফ চাইব। তার
অভিমानी মন আঘাত পায় এমন কথা আর কোনোদিন বলবো
না।

কিন্তু সে পরিচিত নৌকোখানা বিপরীত দিক দিয়ে কখন যে এতো কাছে
এসে পড়েছে, জমিলা সহসা তা দেখেনি। দেখতেই তার সারা শরীরে
বাঁধভাঙা জোয়ারের মতো উল্লাস ছড়িয়ে পড়লো। খোদা শুনেছে তার
প্রার্থনা!

কিন্তু ওকী? তাদের নৌকো করিম মাঝি বাইছে কেন? আর নৌকোর
মাঝে থরে থরে সাজানো ভালো ভালো সওদা, কিন্তু ওপাশে শোয়ানো
রয়েছে কে? আজাহারের অসুখ কি তাহলে খুবই বেড়েছে? কিন্তু অমন
বিদঘুটে ভাবেই বা সে শোয়ানো রয়েছে কেন? করিম মাঝি চোখ
ফিরিয়ে লুকোতে চাইছে কী?

করিম মাঝি তার কোনো প্রশ্নের জবাব না দিয়ে আগে নৌকাটা বাঁধলো,
পরে নত মুখে বললে: আর কী জিগাও ভাবিছাব, ম্যাভাই আর
নাই। চামটা যাইয়া দেখি অর্ধেক সাজানইয়া কলকি হাতে নায়ের
মধ্যে মরইয়া পড়ইয়া রইছে।

জমিলার আত্ননাদে ওবাড়ির সালেহাও অপর পাড়ে দৌড়ে এলো।
ছোটো ছেলোটো উঁকি দিয়ে বাবার নৌকো দেখেই আবার ঘরে

ছুটলো—ওষুধটা দিয়ে তার বাবাকে খুশি করে দেবে অগ্র ভাইয়ের
আগে ।

জমিলা হঠাৎ চিৎকার করে উঠে আবার থেমে গিয়েছিলো । রাগ
করেনি আজাহার, পিতৃহের কর্তব্য করেছে তার—জনকের দায়িত্ব । তার
মৃতদেহের আশে পাশেই রয়েছে চাল, ডাল এবং আরো নানা সওদা ।
আর আশ্চর্য, চালের সাজিটার উপর কচি কচি ছুটি শশাও !

পৌষ

এই পৌষের প্রতীক্ষায় তাজু অধীর হইয়া উঠিয়াছিল।

চাষী জীবনের সেরা সময় পৌষমাস ; বৃকে আসে অনেক শ্বাস, পায় অনেক আশাপূরণের আশ্বাস। কিন্তু সে সব মিথ্যা হইয়া যাইতেও সময় লাগে না। তাহার বেলায়ও ইহার ব্যতিক্রম ঘটিল না।

কার্তিক হইতে তাজু তাহার সর্বাপেক্ষা আগে বোনা জমিখানার আশে পাশে ঘুরিয়া সবুজ চারাকে রঙ বদলাইয়া কুঁড়িময় হইয়া উঠিতে দেখিয়াছে ; কখনো বা আলগোছে দুই একটি ধান ছিঁড়িয়া পাকিল কিনা পরীক্ষা করিয়াছে ; পাশে বসিয়া কল্লনায় বুনিয়াছে মন্থস্তরোস্তর জীবনকে পুনঃপ্রতিষ্ঠার স্বপ্নজাল। অবশেষে তাহার দীর্ঘপ্রতীক্ষার অবসান করিয়া সেই ধান পাকিয়াছে। ছুভিক্ষের বৎসর হইতে দিনগুলি ছঃস্বপ্নময় রাত্রিপ্রহরের মতো কাটিতেছে, তবু পাঁচকুড়া জমির সোনালি ভারে অবনত গুচ্ছগুলির দিকে চাহিয়া তাহার বিষণ্ণ বুক কী এক আশ্বাসে ভরিয়া উঠিল। এই ধানে ছুর্দিনের খাওয়া-পরা কতোদিন চলিবে, সেসব হুর্ভাবনায় আপাতত মন ভারাক্রান্ত না করিয়া কতোগুলি বিশেষ প্রয়োজন মিটাইবার জন্ত সে এককুড়া জমির ধান কাটিয়া ঘরে আনিয়াছিল। কিন্তু সেই ধান মাড়াই করিয়া, মাপিয়া পরিমাণ দেখিয়া তাহার সারা মনে ছুশ্চিন্তা ছাইয়া আসিল। এইরকম ফসলে ছঃখরাত্রি কাটাইয়া উঠিবার আশা কোথায় ?

গ্রামের সমবায় কৃষিক্ষণ সমিতির কর্জ টাকায় মা-ছেলে এতৌদিন

ফ্যান-ভাত খাইয়া কাটাইয়া আসিয়াছে। সে টাকা শোধ দিতেই হইবে। তাহা ছাড়া গত কার্তিকে হলধর চক্রবর্তীর নিকট হইতে তিরিশটি টাকা ধার করিয়াছিল, গত পৌষে তাহার বারংবার তাগাদা সত্ত্বেও তাহা শোধ করিতে পারে নাই; এবারও এই ধান উঠিবার বহু পূর্ব হইতেই তিনি স্মদে আসলে চল্লিশটি টাকার কথা তাহাকে স্মরণ করাইয়া আসিতেছেন; তাঁহার সে টাকা শোধ না করিয়া উপায় নাই। নহিলে যে-মানুষ হলধর চক্রবর্তী, কোনদিক দিয়া কোন পঁয়চ করিয়া অধিকতর এক বিপদে ফেলিবে, তাহা ভালো করিয়া খেয়ালও করিতে পারিবে না। অথচ এদিকে কাপড় জামারও দরকার, বিশেষ করিয়া যাহার জুতাই তাহার ধান পাকিবার তর সহিতেছিল না।

কিন্তু এখন কেমন করিয়া কি করিবে ভাবিয়া তাজু দিশাহারা হইয়া গেল। মাপা ধানের সাজিগুলি ঘরে তুলিয়া রাখিয়া সে চাচার ঘরের চুলাশালে গিয়া বসিল।

তাহার মা, চাচী এবং তাহার দুই মেয়ে রিজিয়া ও সেতারা তখন রোজকার মতো উন্ন ঘিরিয়া বসিয়া গল্প করিতেছে। উন্নুনে ধানের হাঁড়ি; মুখের কাছে বসিয়া চাচী মাঝে মাঝে কুটা ঠেলিয়া দিতেছেন। আঙুনের লালচে আভায় অন্ধকারে সকলের মুখ মাঝে মাঝে উজ্জ্বল হইয়া উঠিতেছিল।

তাজু কিছু কুটা টানিয়া একপাশে বসিয়া খানিকক্ষণ তাহাদের গল্প শুনিল। মায়ের দিকে তাকাইয়া দেখিল, মাত্র কাপড়ের ছেঁড়া খুঁটখানা দিয়া তিনি বসিয়া গল্প শুনিতেন।

: এখনো ঘুমাইতে যাও নাই তুমি? যা শীত! আমাদের হাত-পা

শাহেরবাহু

ঠক্ ঠক্ করতে আছে, আর তুমি—ওঠো, ওঠো, ঠাণ্ডা লাগইয়া শেষটায় অন্ত্রখে পড়বা।—একরকম জোর করিয়াই তাজু তাঁহাকে ঘুমাইতে পাঠাইয়া দিল।

রিজিয়া কৃত্রিম কোপকণ্ঠে কহিল : মায়ের জন্ত এতো দরদ, একটা কোর্তা কিনইয়া দিলেই পারো।

: পারলাম কই এতোদিন, এবার দিমুই দেখো। তোমার গায়ের ঐ কোর্তার চাইতেও সুন্দর কোর্তা আনমু।

তাহার কৌতুককণ্ঠ শুনিয়া চাচার মুখে হাসি দেখা দিল। রিজিয়া অপ্রস্তুত মুখে কহিল : আমার কোর্তাটা আবার সুন্দর নাকি ? বলিয়া মায়ের দিকে ফিরিয়া তাড়া দিল : বলো না মা, আর একটা গল্প।

তাজু টের পাইল, অসন্তুষ্ট হইয়াছে রিজিয়া ; সেতারাও তাহার পায়ে চিমটি কাটিয়া সেই ইঙ্গিত করিল। ফুল আঁকা ঐ কোর্তাটির জন্ত রিজিয়ার গর্বের অন্ত নাই। শথ করিয়া কিনাইয়াছে।

খানিকক্ষণ তাহাকে পর্যবেক্ষণ করিয়া তাজু হাসিয়া উঠিল : রাগ করলা রিজিয়া ? পাগল ! তোমার ও কোর্তাটিকে খারাপ বলি নাই। সত্যিই তোমার গায়ে ওটি চমৎকার মানাইছে।

একথায় রিজিয়া যে আবার খুশি হইয়া উঠিয়াছে তাহা তাহার বাঁকা কটাক্ষেই তাজু বুঝিতে পারিল। সেতারা ছেলেমানুষ। সেও এবার প্রত্যাশী মুখে জিজ্ঞাসা করিল : আর আমার কোর্তাটি ?

কিন্তু তাজু এক ফুৎকারে তাহার সব উৎসাহ যেন নির্বাপিত করিয়া দিল : দূর ! রিজিয়ারটি কতো সুন্দর !

সেতারা চটিয়া গেল : হুঁ, বুবুর কোর্তাটিকে তুমি তো ভালো বলবাই !

তাহার কথার ইঙ্গিত বুঝিয়া চাচীর সামনে তাজু রিজিয়া ছুইজনেই একটু অপ্রস্তুত হইয়া পড়িল।

রিজিয়া হুম করিয়া তাহার পিঠে এক কিল বসাইয়া দিল : ফাইজলামি করতে আছস্ !

তাজু মুখ নিচু করিয়া আড়চোখে চাচীর দিকে তাকাইল একবার। তাহার ও রিজিয়ার বিবাহের কথাবার্তা বহুদিন হইতেই একরকম স্থির। কিন্তু প্রতি বৎসর একটা না একটা ছুভোগ লাগিয়াই আছে বলিয়া তাজুর বা তাহার মায়ের কাহারো সাধ পূর্ণ হয় নাই। তাহাদের অন্তরঙ্গতার কথা সকলেই জানে। স্নযোগ পাইলে পরিহাস না করে এমন জন নাই।

খানিকক্ষণ সকলেই নীরব। প্রকাণ্ড তিনমুখী উলুনে খেজুর রস আর ধানের হাঁড়ির একঘেয়ে শন শন শব্দ। তাহার এবং বেড়ার ওধার হইতে ভাসিয়া আসা কাঁঠাল কুঁড়ির গন্ধ গভীর কালো রাত্রির মধ্যে এক বিচিত্র অনুভূতির সৃষ্টি করিয়াছে। আকাশে ছোট একফালি চাঁদ। সারা গাঁ নিরুন্ম ; কেবল দূরে মল্লিক বাড়ির দিক হইতে কালু বয়াতির কণ্ঠ শোনা যাইতেছে—হয়তো ধানমাড়াইকে উপলক্ষ্য করিয়া উহাদের উঠানে জারীগানের আসর জমিয়া উঠিয়াছে। রিজিয়া উৎকর্ণ হইয়া গানের কথা ধরিবার চেষ্টা করিল।

চাচী কক্ষির আগায় একগুচ্ছ ‘কুটা’ উলুনের মুখে ঠেলিয়া কহিলেন : এতো কম উঠল ধান ! চক্রবর্তীর আর সমিতির টাকা পারবা শোধ দিতে ?

তাজু যেন অগ্র কোনো জগৎ হইতে নামিয়া আসিল। চাচীর প্রশ্নে বুকভরা শ্বাস লইয়া কহিল : সেকথা ভাবইয়া তো কিনারা পাইতে

আছি না চাটী। এ ধান বেচইয়া কাপড় কিনমু না ধার শোধ দিমু ?
মায়ের আমার কাপড়জামা না হইলেও চলে না—দেখছো তো অবস্থা।
মা-ছেলের কাপড়ে তালিতে তালিতে কোথাও ফাঁক নাই। চেষ্ঠা করমু
এখন না দেবার, খুব বেশি পীড়াপীড়ি করলে না হয় আর এক কুড়া
বেচইয়া দিমু। তাও যদি ধানের দর পড়ে। নইলে না-দেবারই চেষ্ঠা
করমু।

ধান চাল বেচিয়া গতবার রাজা হইয়া গিয়াছে হলধর চক্রবর্তী। চল্লিশটি
মাত্র টাকা কিছুদিন পরে দিলেই বা এমন কী লোকসান হইবে তাহার !
কথায় কথায় চাটীর ধান সিদ্ধ হইয়া গেল। রাত্রিও তখন অনেক বাড়িয়া
উঠিয়াছে। তাজু উঠিয়া পড়িল। শুইবার আগে ঘরে সাজানো ধানের
সাজিগুলির উপর চক্ষু বুলাইয়া গেল। ভালো হয় নাই একেবারে।
সংসারের প্রয়োজনীয় জিনিসপত্র কেনা, কর্জ শোধ, খাজনা, খাওয়া-
পরা, বিবাহ—পাঁচকুড়া জমির এহেন ফসলে কেমন করিয়া সব
কুলাইবে !

এদিকে রিজিয়াকে আপন করিয়া লইবার ইচ্ছাটা হৃদমর্মনীয়। ক্রমাগত
লোভনীয় হইয়া উঠিতেছে সে ; ভরা ভরা মুখ চোখ, গা-হাতপায়
ঝলকাইতেছে যেন পাকা কদলীর লাবণ্য। টলটল করা চক্ষু দুইটিতে
বন্ধিম দৃষ্টি ভরিয়া তাহার দিকে তাকাইলে অভাব-অনটনের পৃথিবী
তাজুর সম্মুখ হইতে যেন লুপ্ত হইয়া যায়। দারিদ্র্যের সহস্র ছোবলও
যেন আর নাগাল পায় না তাহার। কিন্তু বিবাহ হইবে কী প্রকারে ?
খরচপত্র কই ? না, আর একটা বৎসর প্রতীক্ষা করিবে ? নানা কথা
ভাবিতে ভাবিতে কাঁথাখানা মুড়ি দিয়া তাজু এক সময় ঘুমাইয়া পড়িল।
পরদিন হাটে রওনা হইবার মুখে রিজিয়া তাহাকে আড়ালে ডাকিয়া

লইয়া গেল । একটু ইতস্তত করিয়া কহিল : নবান্নের সময় কী কইছিল। মনে আছে ?

: কী ?—তাজুর সহসা কিছু মনে পড়িল না ।

: বাঃ, কইছিল। না নোতুন ধান বেচইয়া আমাদের একটা কিছু দেবা ? সেই মুরগীর ছানা—

: ওঃ !—বিরক্তচিত্তে টিল ছুঁড়িয়া একটা মুরগীর ছানা মারিয়া ফেলিয়াছিল তাজু । ঘটনাটা রিজিয়া দেখিল, কিন্তু মায়ের কাছে কহিয়া তাহাকে বকুনি না খাওয়ায় সেজন্ত একটা ঘুষ কবুল করিয়াছিল তাজু । নহিলে, মুরগী-হাঁসের প্রতি তাহার মায়ের যে-দরদ ! শুনিলে তাজুর আর রক্ষা থাকিত না ।—সে কথা তো ভুলইয়াই গেছিলাম । তুমিও তো মনে করাইয়া দেও নাই । বল না হয় আজই, কি আনমু ?

তাহার মুখের হাসিটা হয়তো স্বাভাবিক দেখাইল না । রিজিয়া এক লহমা তাহার মুখের উপর দৃষ্টি ব্লাইয়া নিচু চোখে কহিল : খাউক এখন, চারিদিকে যা টানাটানি ।—চেষ্টাকৃত হাসি আনিয়া বাঁ হাতে আঁচলটা গায়ে জড়াইতে জড়াইতে আর একবার সে তাজুর প্রতি চকিত দৃষ্টিপাত করিল ।

তাজুর মুখে মুহূর্তের জন্ত একটু কালোছায়া নামিয়া আসিল, কিন্তু পরক্ষণেই হাসিয়া বলিল : সেজন্ত তোমার গিন্নীপনা করতে হইবে না । কী চাও, বলো না ?—বলিতে বলিতে সে লক্ষ করিল, ডান হাতে কি জিনিস রিজিয়া পিছনে লুকাইয়া রাখিয়াছে ।

: খাউক আইজ, তুমি যাও ।

: বাঃ ! দেখি তোমার হাতে কী ?

রিজিয়া আরো লুকাইল : না ।

শাহেরবাচ্চ

তাজু কি মনে ভাবিয়া ছুঁছুঁমি করিয়া তাহার হাত হইতে জিনিসটা কাড়িয়া লইতে গেল ; রিজিয়া আর জোর করিল না—তাজু হাতখানা ধরিতেই তাড়াতাড়ি জিনিসটা তাহার হাতে তুলিয়া দিল ।

মোম দিয়া তৈরী একছড়া বুটা মুক্তার মালা । খানিকক্ষণ নিরীক্ষণ করিয়া কিছু জিজ্ঞাসা করিবার জ্ঞান রিজিয়ার দিকে মুখ তুলিয়া চাহিতেই সে বলিয়া উঠিল : ওটা এমনি হাতে রাখছিলাম, দাও ।

তাজু সে কথায় কোনো আমল দিলো না : ওঃ এই ! বুটা মুক্তার মালা যে তা বুঝছি । কার ওটা ?

: সইয়ের—

: কোথা দিয়া আনছে, দাম কতো কইতে পারো ?

রিজিয়া তাহার হাত হইতে মালাছড়া লইয়া কহিল : হাটে বিশ্বাসদের দোকান থেকে আনছে । কত দাম কী জানি ! তুমি যাও, দেরি হইয়া যাইবে আবার ।

: ওটা দেও তাইলে ; পাইলে একছড়া আনমু ।

: পাগল ! পেটের ভাত জোটে না—যাও যাও তুমি, নইলে কেউ দেখুইয়া ফালাইলে ঠাট্টা শুরু করবে ।—রিজিয়া সরিয়া গেল ।

তাজু হাসিয়া কহিল : গিন্নী হবার আগেই তোমার অতো ভাতের ভাবনা করতে হইবে না । তুমি সজাগ থাকইও, ফিরতে আমার রাত হইবে । পাইলে নিশ্চয়ই আনমু ।

হাটে ধান বিক্রী করিতে করিতে প্রায় বিকাল হইয়া আসিল ।

তাজু কেবলই আশঙ্কা করিতেছিল হলধর চক্রবর্তীর সঙ্গে পাছে দেখা হইয়া যায় । দেখা হইলে সে তাহার প্রাপ্য আদায় না করিয়া ছাড়িবে

না। তাই তাহার অনুচর হাকিম খাঁ যখন ধানের দর জিজ্ঞাসা করিয়া চলিয়া গেল, তাজুর মনে সেই শঙ্কাটা আরো বাড়িয়া উঠিল। দর বাড়িবার অপেক্ষায় আর না বসিয়া তাড়াতাড়ি সব ধান বিক্রী করিয়া চল্লিশটি টাকা ট্যাঁকে লইয়া তাজু উঠিয়া পড়িল।

কাপড়ের দোকানে তখন ভারি ভিড়। দোকানের এক কোণে দাঁড়াইয়া তাজু হিসাব করিতে লাগিল কি কি কিনিবে।—মায়ের একটা কোর্তা হইবে দুই বা তিন টাকা, খুতি শাড়ি দুই জোড়া অন্তত বারো, আলোয়ান একখানা পাঁচ; তাহা ছাড়া তেল, লবণ ইত্যাদি নানান্সওদা আছে। রিজিয়ার জুতা সেই রকম একছড়া মালাও নিতে হইবে। সুতরাং কাপড়ের দোকানে আঠারো-উনিশ টাকার বেশি কিছুতেই খরচ করা চলিবে না। তাজু এই সব হিসাব করিতেছে এমন সময় হাকিম কোথা হইতে আসিয়া পিঠ চাপড়াইয়া কহিল : কী মর্দ, কাপড় কিনতে আইলা বুঝি ?

তাজুর বুক টিপ টিপ করিয়া উঠিল। হাঁ-না করিয়া কেমন অদ্ভুতভাবে মাথা নাড়িল।

: আসো তাইলে, আমরা ভাই একখানা আলোয়ান দরকার—বলিতে বলিতে ক্রেতাদের ভিড় ঠেলিয়া সে সম্মুখে আগাইয়া গেল। তাজু কেমন অস্বস্তি অনুভব করিয়া তাহার বাহির হইয়া যাইবার প্রতীক্ষা করিতে লাগিল।

তখন প্রায় সন্ধ্যা হইয়া গিয়াছে। খালে ধানের বেপারীদের নৌকায় আলো জলিয়া উঠিয়াছে। ভাঙা হাটের কোলাহল কমিয়া আসিতেছে এখন। কামারশালের দিকে হাতুড়ির শব্দটা যেন সেইজগুই এখন বেশী শোনা যাইতেছে।

মা হয়তো রোজ্জকার মতো রান্নাবান্না শেষ করিয়া এতোক্ক্ষেণে রিজিয়াদের চুলাশালে আসিয়া কাহিনী শুনাইতে বসিয়াছেন। অগ্ন্যুদ্গমনের তুলনায় আজ তাহার মুখরতা নিশ্চয়ই আরো বেশি। নতুন কাপড় জামা পাইয়া মা ছেলেমানুষের মতো খুশি হইয়া ওঠেন। বুড়ো মানুষ, শীতে কষ্ট পাইয়াছেন এতোদিন। আজ যা-শীত পড়িয়াছে! হয়তো তিনি চুলার কাছে ষেঁসিয়া বসিয়া কাঁপিতেছেন; মাঝে মাঝে বলিয়া উঠিতেছেন শীতের কথা। চাচী বা রিজিয়া হয়তো বলিয়া উঠিতেছে, আর কতোক্ষণ বা, তাজুতো এলো বলে!

রিজিয়া কাহিনী শুনিতে বসিলেও হয়তো কান পাতিয়া রহিয়াছে খালের ঘাটে তাজুর নৌকার শিকল নাড়ার শব্দের প্রতীক্ষায়। কিন্তু তাজু যাইয়া প্রথমে এমন ভাব দেখাইবে যেন মালার কথা তাহার মনেই ছিল না। রিজিয়া হতাশ হইয়া দূরে দূরে থাকিবে, কিন্তু মুখে কিছু জিজ্ঞাসাও করিবে না। তারপর তাজু একান্তে তাহাকে চুপি চুপি ডাকিয়া লইয়া নিজের হাতে—

হঠাৎ 'তাজু চমকিয়া উঠিল। হলধর চক্রবর্তীর কণ্ঠস্বর! হ্যাঁ, হলধর চক্রবর্তীই দোকানদার বৈকুণ্ঠ সাহাকে বলিতেছেন: আমার ফিরতে দেয়ী হইয়া গেল। কিন্তু এই কটা কাপড়-চোপড়ের এত দাম! তুমি যে মুশকিলে ফেললা বৈকুণ্ঠ।

তাজু ভয়ে ভিড়ের একপাশে দোকানের বেড়ার কাছে নিঃশব্দে বসিয়া পড়িল—দেখিয়া না কেলে হলধর চক্রবর্তী।

: তাইতো, মুশকিলে ফেললা! এখন আর টাকা কোথায় পাই? খারকজ নেবার মতোও তো কাউকে দেখি না।

তাজুর বুক কাঁপিয়া উঠিল। তাহাকে দেখিতে পাইলে হয়তো তাহার

নিকটেই চাহিয়া বসিবে হলধর। চুপি চুপি দোকান ত্যাগ করিয়া সে নামিয়া যাইতেছে, এমন সময় হঠাৎ হাকিমের স্বর শোনা গেল :
ঐ ঐ তাজু আছে, তাজুর কাছে দেখেন, ও আজ ধান বেচছে।

তাজুর পায়ের গতি হারাইয়া গেল। ফিরিয়া বড় বড় চোখে হলধর চক্রবর্তীর দিকে চাহিয়া ঢোক গিলিয়া জিজ্ঞাসা করিল : কি ?

হাকিম আগাইয়া বলিল : চক্রবর্তী মশাইএর গোটা পঁচিশেক টাকা দরকার, তাই চাইতে আছেন।

তাজু হাবার মতো চুপ করিয়া রহিল, ট্যাকটা শক্ত করিয়া চাপিয়া ধরিল ডান হাতে। চক্রবর্তীকে বড়ো ভয় হয় তাহার। তাহার সামনে দাঁড়াইয়া সে যেন নিজেকে হারাইয়া ফেলে; তাহার কথাবার্তা, চালচলন, দৃষ্টি—সবই যেন কী এক সম্মোহন। শুকনো গলায় শুধু কহিতে পারিল : আমারও যে সওদা নিতে হইবে।

: বলো কী ! পঁচিশ টাকারই সওদা করো নাকি আইজকাইল ?—
চক্রবর্তী ভুরু কঁচকাইয়া ব্যঙ্গের স্বরে প্রশ্ন করিলেন।

হাকিম মন্তব্য করিল : করলেই বা কি, পৌষ মাসের দিন।

: আরে দেবা তো দেও, না হয় ধারই দেও, তোমার সওদা কাইল নিলেও চলবে। দেও, কাল আমার বাড়ি থেকইয়া নিয়া আসইও।

হলধরের প্রসারিত হাত তাজুকে যেন আরো নির্জীব করিয়া ফেলিল।
ট্যাকের উপর হইতে হাতখানা যেন অবশ হইয়া নামিয়া গেল।

: ও কী, চুপ করইয়া চাইয়া তাকিয়ে রইলা দেখি ! তোমার কাছে চক্রবর্তী মশাইএর পাওনাও তো আছে কতো !

তাজুর মনে হইল ক্ষোভে হুঃখে বুঝিবা সে কাঁদিয়াই ফেলিবে।
যড়যন্ত্র ! কৌশল করিয়া টাকাটা আদায় করিয়া লইল হলধর আর

হাকিম খাঁ! হলধর চক্রবর্তী টাকার কুমীর। কতোটুকু ক্ষতি হইত তাহার ঐ ক'টি টাকা তাহার নিকট পড়িয়া থাকিলে! হাকিম শয়তানি করিয়া না জানাইলে হয়তো এমন ঘটিত না। হাকিমের উপর দ্রুস্ত আক্রোশে তাজুর দুইহাত হঠাৎ মুষ্টিবদ্ধ হইয়া উঠিল।

হলধর কাপড়ের পোঁটলাটি লইয়া আগে নামিয়া গেলেন। হাকিমও নতুন কেনা আলোয়ানখানা কাঁধে ফেলিয়া নামিয়া যাইতেছে, এমনসময় তাজু হঠাৎ ছুটিয়া আসিয়া দুইহাতে তাহার গলা চাপিয়া ধরিল। উন্মত্তের মতো কয়েকটা ঝাঁকুনি দিয়া বিকৃত কণ্ঠে কী বলিয়া উঠিল সেই জানে।

কিন্তু হাকিম জোয়ান লোক, নিজেকে ছাড়াইয়া লইতে তাহার সময় লাগিল না। সাত আটটি লোক তখন দোকানে। হুলুস্থূল পড়িয়া গেল। হাকিমের লাঠির আঘাতে তাহার কপাল ফাটিয়া দরদর করিয়া রক্ত ছুটিল। হঠাৎ যে কেন এমন ঘটিল ভাবিয়া সকলেই প্রথমটা একটু হতভম্ব। হলধর কি ভাবিয়া পুলিশ-নৌকার দিকে আগাইয়া গেলেন। হাকিমও ফুঁশিতে ফুঁশিতে তাঁহার অনুসরণ করিল।

রক্তাক্ত মস্তক তুলিয়া সভয়ে সেদিকে তাকাইল তাজু। কী করিয়া বসিল সে! এবার হয়তো ভিটেমাটি গ্রাসেরও সুযোগ দিল হলধর চক্রবর্তীকে। উহাদেরই এখন পৌষ মাস। পৌষলক্ষ্মীর প্রসাদে সকলেই আপন আপন সাজি ধরিতে ব্যস্ত। এতোটুকু দয়ামায়া, সহানুভূতি নাই তাহাদের চিন্তে।

শেষ হউক, হে ঈশ্বর, শেষ হউক এই দয়াহীনতার।

শেষপ্রহর

পৃথিবীতে আর কাহাকেও বিশ্বাস নাই। সকলেই আপন স্বার্থ লইয়া ব্যস্ত। যাহাদের তুমি অতি আপন জন মনে কর, তাহারাও নিজের প্রয়োজনে তোমার জন্ত মুহূর্তেকও না ভাবিয়া ত্যাগ করিয়া যাইতে পারে। সারা ছনিয়াটাই হারামীতে ভরা। নির্জন ঘরে পরিত্যক্ত অবস্থায় অসহ্য রোগযন্ত্রণায় ছটফট করিতে করিতে এক ফোঁটা জল পর্যন্ত না পাইয়া হোসেন এই নিষ্ঠুর সত্যটি উপলব্ধি করিয়াছে।

হাজী সাহেব বাঁচিয়া থাকিলে হয়তো এ কথার প্রতিবাদ করিয়া হাসিয়া বলিতেন অনেক ভালো কথা ; কিন্তু সে যদি জিজ্ঞাসা করিত, আজ এযাবৎ যাহাকে প্রাণাপেক্ষাও ভালোবাসিয়া আসিয়াছে, সে তাহাকে এমন অবস্থায় পরিত্যাগ করিয়া যায় কি করিয়া ? তাহা হইলে কি জবাব দিতেন তিনি একবার শুনিয়া লইত হোসেন ! সব মিছা—ছনিয়াতে ভালো মন্দ, পাপ পুণ্যের কোনো সুবিচার নাই। মানুষকে লইয়া হয়তো খোদাতালাও কৌতুক করে। যন্ত্রণায় পাশ ফিরিয়া ওধারের খোরাটার অবশিষ্ট জলটুকু একচুমুকে নিঃশেষ করিয়া হোসেন একটা খেদোক্তি করিয়া আবার শুইয়া পড়ে। ভাগ্যে রহমালী ঐ পথ দিয়া যাইতেছিল, নহিলে এইটুকুও তাহার জুটিত না। অভিশাপের ভয় দেখাইয়া এই জলটুকু তাহার দ্বারা আনাইয়া লইয়াছে। জলভরা খোরাটা ঠেলিয়া দিয়াই সে একপ্রকার ছুটিয়া পলাইয়াছে। হোসেন কাতর অনুনয় করিয়া কহিয়াছে—‘আমার স্বপ্নরবাড়িতে একটা খবর দিও ভাই, অন্তত সে যেন শেষ দেখাটি দিয়া

যায়।' সে বলিয়াছে কি বলে নাই, কে জানে! দিনের আলো নিভিয়া রাত্রি ঘন হইয়া আসিল না? কোথায় সে? নিশ্চল তাহার প্রতীক্ষা। হোসেন ঘুমাইতে চেষ্টা করে, ঘুম আসে না। মাথা স্থির হয় না। আজ্জোবাজ্জো নানা অদ্ভুত কথা মনে পড়ে।

ধুমধাম করিয়াই সে রাবেয়াকে বিবাহ করিয়াছিল। আপন বাড়িতে সে ছিল একা। কয়েক কুড়া জমি লইয়া সুখস্বাচ্ছন্দ্যেই দিন কাটিত। চাষের সময় নিজের ক্ষেতের কাজ হইয়া গেলে অপরের ক্ষেতে 'বদলা' দিয়া সাহায্য করিত। প্রতিবারেই প্রচুর মাছ ধরিয়া আনিয়া নিজের জগু মাত্র একটা রাখিয়া বাকিগুলি গ্রামের ঘরে ঘরে ভাগে ভাগে দিয়া আসিত। একদিন এতো মাছ পাইল যে, পাশের গাঁয়ে (আগে যেখানে তাহার ফুপার বাড়ি ছিল, এখন সেখানে কেহই নাই, একটি মাত্র ফুপাত ভাই, সেও যুদ্ধে না কোথায় চলিয়া গিয়াছে) তাহার ফুপার প্রতিবেশী আজাহার হাওলাদারকেও একটা মাছ আসার পথে দিয়া আসিল।

সেই দিন প্রথম রাবেয়াকে দেখিল। মনটা যেন সেইখানেই গাঁথিয়া রহিল।

আজাহারদের সঙ্গে কোনো ঘনিষ্ঠতা তাহার নাই। করিতেও পারে না লোকলজ্জার ভয়ে। আজাহার চুরির দায়ে কিছুদিন জেল খাটিয়াছিল। তাহার মেয়েকে বিবাহ করিবার কথা মুখে তুলিলেও সারা গাঁ বোধ হয় ব্যঞ্জে ভরিয়া উঠিবে। তবু ইহার পর আজাহারের দাওয়াত (নিমন্ত্রণ) সে প্রত্যাখ্যান করিতে পারে নাই। পরে ইহা লইয়া কেহ কেহ ঠাট্টাও করিল। লজ্জায় পড়িয়া সে আর ওদিকে পা বাড়াইতে সাহস পায় নাই। ইতিমধ্যে আজাহার আবার একটা ডাকাতি মামলায় পড়িয়া

জেলের গেল এবং কিছুদিন পরেই হাজী সাহেব তাহার হইয়া একটা অনুরোধ করিয়া বসিলেন।

সারা গাঁ এই লোকটিকে ফেরেশতার মতো ভক্তি করিত। কিন্তু হোসেনের মতো আর কেহই তাঁহার কাছে আসিয়া এতো সময় কাটাইত না।

দীর্ঘদেহী, শীর্ণ, সাদাসিদা বেশ পরা, আবক্ষ শুভ্র শ্মশ্রুময় মানুষটি। ঠোঁট আর চক্ষু দুইটিতে হাসি, ভালোবাসা, মিষ্টিকথা যেন সর্বদা ভরপুর হইয়া থাকিত। সমস্ত গাঁয়ের এবং আশে পাশের দুই তিনখানা গ্রামের সকল নারী পুরুষ, ছেলে মেয়ের সঙ্গে সহজ সমান ভাবে মিশিতেন, দিলখোলা হাসিতে বহু স্নানমুখও উজ্জল করিয়া তুলিতেন। পথে বাহির হইলে, যাহার সাথেই দেখা হউক না কেন, থামিয়া দুইদণ্ড কুশল প্রশ্ন করিয়া, দোওয়া করিয়া দ্রুত পদে সম্মুখে আগাইয়া যাইতেন। যাইতেন গাঁয়ের প্রতি ঘরে ঘরে; কাহারো রোগব্যাধি হইলে নিজের লেখা তাবিজ বা টোটকা ঔষধ দিতেন। খবর দিতে হইত না, দেখা যাইত যেন আপন পুত্রকণ্ঠার বিপদ জানিয়া তিনি পথ বাহিয়া ছুটিয়া আসিতেছেন। সংসারে আপন বলিতে তাঁহার কেহ নাই, বোধ হয় সেইজন্মই অনুরূপ একক হোসেনের জন্মই তাঁহার মনের সবটুকু স্নেহ উজাড় করিয়া দিয়াছিলেন। হোসেনের বাড়ির সবাই যখন কলেরায় উজাড় হইয়া গেল, তখন একমাত্র এই হাজী সাহেবই তাহাকে সান্ধনার হাতে ধরিয়া ভবিষ্যৎ জীবনের যাত্রাপথে অগ্রসর করিয়াছিলেন। কেবল তাহাই নয়, পাশে পাশেও ছিলেন। বিবাহের পূর্বে সুখ স্বাচ্ছন্দ্য, টাকা পয়সা সবই তাঁহারই পরামর্শে বাড়িয়া উঠিয়াছিল। শুধু পিতার সম্মান দিলেও সব বলা হয় না,

হোসেনের জীবনে তিনি ছিলেন খোদারই মূর্তিমান স্নেহশীষের মতো ।

তিনি বলিলেন রাবেয়ার পিতার ইচ্ছার কথা । পুলিশের সঙ্গে যাইবার আগে সে নাকি তাঁহার কাছে বলিয়া গিয়াছে রাবেয়ার সঙ্গে যেন হোসেনের বিবাহ হয় । রাবেয়ার মাও হাজী সাহেবকে অত্যন্ত ধরিয়া পড়িয়াছে । মাথার উপরে অভিভাবক কেহ নাই ; মেয়ে অরক্ষণীয়া । পাশের গাঁয়ের ইয়াকুবের অভিসন্ধি ভালো না, আজাহারের কাছে একবার প্রস্তাব করিয়া বিফল হইয়াছে, এবার হয়তো স্বেযোগ বুঝিয়া মেয়ে জোর করিয়াও লইয়া যাইতে পারে । আজাহারকে ধরিয়া লইয়া যাইবার পর সে ঘন ঘন ওদিকে আসাযাওয়া করিতেছে । তাহা ছাড়া, আজাহারের অবর্তমানে জমিজমার কি দশা হইবে ? হোসেন তাহাদের সকল ছরবস্ত্র হইতে বাঁচাউক ।

হোসেন মাথা নিচু করিয়া সঙ্কোচভরে তাঁহার কথাগুলি শুনিল । অবশেষে যখন তিনি প্রশ্ন করিলেন—তোমার মত কী ? আনন্দের আতিশয্যে হয়তো বা তখুনি সে মত দিয়া ফেলিত, কেবল সঙ্কোচেই পারিল না ; ভাব দেখাইল যেন তাহার বিশেষ ইচ্ছা নাই, তবে তিনি যদি ভালো মনে করেন—

হাজী সাহেব ধীরভাবে তাহার কথা শুনিয়া কহিলেন—তিনি ভালো মনে না করিলে কখনো নিজে বলিতেন না । আজাহার চোর নামে পরিচিত হইলেও সে অন্তরে বাস্তবিকই নিষ্পাপ । একদিন অভাবে পড়িয়া চুরি করিতে গিয়াছিল, ধরা পড়িয়া জেল খাটিয়া আসিয়াছে । তবু কি তাহার প্রায়শ্চিত্ত হয় নাই ? আর এবার তো শুধু দাগী বলিয়াই আবার তাহাকে ছর্ভোগে পড়িতে হইল । নহিলে সে যদি পেশাদার

চোরই হইত, তবে ইয়াকুবের সঙ্গে মেয়ের বিবাহ দিল না কেন ? ইয়াকুবও যে চোর একথা কে না জানে ? তবে তাহার পাপের জন্ত বিন্দুমাত্র অনুতাপও তাহার নাই। আজাহার একদিন বাধ্য হইয়া পাপী হইয়াছিল, তাহার অনুশোচনায় হোসেন আজ যে স্থানটিতে তাহার সম্মুখে বসিয়া আছে, ঠিক ঐ স্থানে বসিয়াই সে কাঁদিয়া বুক ভাসাইয়াছিল। কেহ সেকথা জানে না, জানিবার প্রয়োজনও বোধ করে নাই। নিজের বাঁচিবার উপকরণ সংগ্রহ করিতে গিয়া মাহুম্বের দরবারে সে দোষী সাব্যস্ত হইলেও খোদার কাছে তাহার কোনো পাপ নাই।—ব্যথিতভাবে হাসিয়া পরে कहিলেন—গাঁয়ের লোকে কী ভাবিবে সে দুর্ভাবনা করিও না। তোমার মনে জোর থাকিলে উহাদেরও ভাবাভাবির কিছু থাকিবে না।

সুতরাং বেশ একটু ধুমধাম করিয়াই সে রাবেয়াকে বিবাহ করিয়া ঘরে আনিল। বিবাহিত জীবনের প্রথম কিছুদিন স্তম্ভুর উত্তেজনার মধ্য দিয়া কাটিয়া গেল।

স্বপ্ন সার্থক হইল সত্য, কিন্তু ওদিকে শাশুড়ী ও নাবালক ছুটি শালাশালীর ভরণপোষণের ভারও ক্রমে তাহার উপর আসিয়া পড়িল। হোসেন তাহাতে কোনো রকম না দমিয়া বরং একটু নবীন জীবনের আশ্বাদ পাইল।

ক্ষেতে খাটিয়া খুটিয়া বাড়ি ফিরিয়া হয়তো দেখিত রাবেয়া তাহারই জন্ত ভাত রাঁধিতেছে। পিছনে দাঁড়াইয়া গৃহস্থালী-রতা তাহাকে নতুনরূপে দেখিয়া সারা মনে এক অদ্ভুত পুলকের জোয়ার আসিত ; পা টিপিয়া টিপিয়া কাছে যাইয়া অতর্কিতে তাহার চোখ চাপিয়া ধরিত। হুটামি করিয়া অনেকক্ষণ পর্যন্ত মাথাটাকে বুকের সঙ্গে চাপিয়া রাখিত।

শাহেরবাঘ

কোনোদিন বা ক্ষেতের কাজ শেষ হইয়া গেলেও ইচ্ছাবশতই দেরি করিয়া বাড়ি ফিরিত। একটি প্রাণী যে তাহার একান্ত আপন, শুধুমাত্র তাহারই বধু—তাহার জন্ত দুশ্চিন্তায় পথ চাহিয়া আছে, গোরু দুইটা ছাড়িয়া দিয়া গাছের ছায়ায় শুইয়া শুইয়া এ কল্পনা করিতেও তাহার সুখের সীমা থাকিত না।

হাজী সাহেব প্রতিদিন একবার করিয়া খবরাখবর লইয়া যাইতেন। সংসারের খুঁটিনাটি, কাজ কথা লইয়া তিনি শিশুর মতো কৌতুক করিতেন। নাতির আগমনের জন্ত তাঁহার ব্যস্ততা দেখিয়া উহার শরমে রাঙা হইয়া উঠিত। কখনো কখনো হোসেনের মনে হইত, এই সুন্দর আত্মীয়তার পরিবেশ ছাড়া জীবনে অধিক সুখ আর তাহার কাম্য নাই।

মাঝে মাঝে তিরস্কারও শুনিতে হইত। একদিন আসিয়া দেখিলেন সদির শরীরে এককুড়ি কই লইয়া হোসেন শিশুর বাড়ি যাইতেছে। গায়ে হাত দিয়া দেখিলেন বেশ একটু জ্বরও রহিয়াছে।

: এই দেহে তুমি পানি কাদা ভাঙতে যাইতে আছো? বোঁ কোথায়? সেই বা কোন্ বুদ্ধিতে তোমারে বাইরে যেতে দেয়, শুনি?

হোসেন তাড়াতাড়ি দাওয়ায় উঠিয়া হাঁড়িটা ঠেলিয়া রাখিল।

রাবেয়া ঘরেরই বাহির হইল না।

হাজী সাহেব কহিলেন : হাঁড়িটা দেও আমার কাছে, আমিই দিয়ে আসমু।

: সে কাঁ!

: হ্যাঁ, হ্যাঁ, দাও; আমার একটু কাজও আছে সেদিকে।

কোনো আপত্তি টিকিল না।

তিনি চলিয়া যাইবার পর রাবেয়া মুখভারী করিয়া দাওয়ায় নামিয়া আসিল ।

ঃ উনি আমার নামে অপবাদ দিয়া গেলেন, আর তুমিতো বেশ চুপ করইয়া রইলা !

ঃ অপবাদ !

ঃ বাঃ, অপবাদ না তো কি ?

ঃ দূর ! সত্যসত্যই উনি রাগ করইয়া কইছেন নাকি কিছু ! ওঁর মতো মানুষ সারা দেশে আর নাই ।

ঃ কী জানি বাপু ! সেদিন কইয়া গেলেন, তুমি ক্ষেতে এতো অতিরিক্ত সময় খাটো সেও নাকি আমার জন্ত । কেন তোমারে বেশি খাটতে দেই, এইসব কতো কি দোষ দিয়া গেলেন ।

ঃ ছাঃ ! ঐসব কথা কি ধরতে আছে ! ওতো আদর করইয়া কইছেন । মনে নাই সেদিনের কথা, চুলায় ফুঁ দিতে দিতে তোমার চোউখের পানি পড়া দেখইয়া কী রকম রাগ হইয়া আমারে বকছিলেন ? বলেন নাই—শুকনো লাকড়ি এনে দিস না, কেবল নবাবের মতো খাস, কচি বউটারে তুই মারইয়াই ফেলবি ।—আমি তো ক্ষেত থেকে ঘরে পা দিয়া এই কথা শুনইয়া পিছন ফিরইয়া দে দৌড় ।

কিন্তু রাবেয়ার মুখে হাসি ফুটিল না ; হোসেনের হাতের আকর্ষণ উপেক্ষা করিয়া যাইতে যাইতে কহিল : যাউক, মাছগুলো মা পাইলে হয় !

হোসেন অবাক হইয়া তাহার দিকে চাহিয়া রহিল । বিরক্ত হইল, এবং বোধ হয়, দাম্পত্য জীবনের এই প্রথম বিরক্তি ।

হাজী সাহেবের কথা সত্য, বিবাহের সময় গাঁয়ে একটু কানাঘুসা হইয়াছিল মাত্র । তারপর তাহা থামিয়া গিয়াছে । কিন্তু গাঁয়ের লোকের সঙ্গে

শাহেরবাহু

আগেকার সেই অন্তরঙ্গতা যেন আর রহিল না। আগে সকলে স্নেহ করিত, এখন সমীহ করে। ভারী চোখে তাহার গতিবিধি লক্ষ করে ; যে আসরে পূর্বে গেলে সহজভাবে মিশিতে পারিত, এখন সেখানে যাইবা-মাত্র আসর ভাঙ্গিয়া যায়। সঠিক কিছু সে বুঝিয়া উঠিতে পারে না। চোরের মেয়ে বিবাহ করিয়াছে বলিয়াই উহাদের ব্যবহারটা বদলাইয়া গেল, না তাহার সুখ সচ্ছলতাকে তাহারা ঈর্ষা করিতে আরম্ভ করিয়াছে ? কিন্তু তাহার এই সুখ সচ্ছলতা আর বেশিদিন ভোগ করা চলিল না। শ্রাবণ মাসের গো-মড়ক ভাঙনের ভূমিকা রচনা করিল। হালের একটি বাছুরও অবশিষ্ট রহিল না। গোরুর দাম আগুন—কিনিবার মতো টাকা সহসা সংগ্রহ করিতে পারিল না। শ্বশুরের গোরু শাশুড়ী অভাবের অজুহাতে আগেই বিক্রি করিয়া ফেলিয়াছে। হাজী সাহেবের কাছেও পঞ্চাশ টাকার অধিক জুটিল না। বাধ্য হইয়া নিজের জমির প্রায় সবই বিক্রি করিয়া দুইশত টাকায় সে দুইটি গোরু কিনিল। শ্বশুরের জমিই চাষ করিল।

ভাদ্র গেল, আশ্বিন গেল, আসিল কার্তিক মাস। দুঃখের রজনী শুরু হইয়া গিয়াছে। সর্বগ্রাসী অভাব ধীরে ধীরে জীবনের সকল নিশ্চিন্ততা দূর করিয়া হোসেনকে ব্যাকুল করিয়া তুলিল। ঘরের সঞ্চিত খাদ্য ফুরাইল ; খার কর্জ পাইবার আশা যেখানে ছিল তাহারাও হাত গুটাইল। কেবল সে-ই নহে, আরো অনেকে যেন তাহারই মতো অনন্ত দুঃখতমসার মধ্য হইতে আশার আলোকের সন্ধান করিতে লাগিল। চাউলের মূল্য লাফাইয়া লাফাইয়া পঁয়ত্রিশে উঠিয়া গেল অথচ মাত্র সাড়ে ছয় টাকা দরে গত পৌষের চাউল সে বেচিয়া দিয়াছিল !

হাজী সাহেব তালুকদার বাড়ির জুম্মা মসজিদের ইমাম। তিনি তালুকদার-দের নিকট হইতে কিছুদিন ধার কর্জ আনিয়া হোসেনের প্রয়োজন মিটাইতে চেষ্টা করিয়াছিলেন, কিন্তু উহারাও স্পষ্ট ভাষায় অধিক সাহায্য করিবার অসামর্থ জানাইয়া দিল। কি করিবে ভাবিয়া হোসেন অস্থির হইয়া উঠিল।

হাজী সাহেব মিলাদ পড়াইয়া যে টাকা পারিশ্রমিক পাইতেন, সব হোসেনকে আনিয়া দিয়াছেন। কিন্তু লোকে যেন ধর্মকর্ম ভুলিয়া গেল। তাঁহার সেই আয়ও কমিয়া গেল।

রাবেয়া ইতিমধ্যে বাপের বাড়ি গিয়াছিল। দিশেহারা হোসেন সাস্থনা-দাত্রীর অভাববোধে তাহাকে লইয়া আসিল। তাহা ছাড়া, ইয়াকুব আবার তাহার শ্বশুর বাড়ির দিকে আনাগোনা শুরু করিয়াছে—কি মতলব লইয়া কে জানে!

কিন্তু রাবেয়ার ব্যবহার আরো অস্বস্তিজনক হইয়া উঠিল। সে মনে করে, সংসারের এই দুঃখদর্শার জন্ত হোসেনই দায়ী। ইচ্ছা করিলেই ইহা দূর করা যায়।

ছেলেমানুষী ভাবিয়া সে প্রথমটা হাসিয়া উড়াইয়া দিয়াছে। বলিয়াছে : এইরকম অভাব কেবল আমাদেরই ঘরে না বোঁ, যুদ্ধের জন্ত সারা দেশ ছারখারে যাইতে আছে। কিন্তু বুঝাইলেও সে বোঝে না। উত্তরোত্তর তাহার গঞ্জন বাড়িয়া চলিল।

: এরকম আধপেটা খাওয়াইয়া উপাস করাইয়া রাখবা তো বিয়েকরছিল কেন ?

হোসেন নির্বাক হইয়া তাকাইয়া রহিয়াছে।

: তোমার মতো ভালোমানুষের দশাই এই হয়। সারাদেশে অভাব

লাগছে কও, কিন্তু উপাস করছে কে, কইতে পারো ?

হোসেন উদাহরণ দেখাইয়াছে। রাবেয়া ঝংকার দিয়া কহিয়াছে : ওরা তো ভিক্ষুক। তুমিও কি ওদের মতো বলতে চাও ? পরে বলিয়াছে : বাঁচতে হইলে কেবল ভালোমানুষী আর হাজীদেব লেজুর ধরলেই চলে না, ভালোমন্দ দুদিকই সমান রাখতে হয়। ঐ গাঁয়ের ইয়াকুবকে দেখো না, কী আছে তার ? অথচ একদিনও আধপেটা খাইয়া ছিলো বলতে পারবা ?

হোসেন রাগ সম্বরণ করিয়া ঘর হইতে নামিয়া আসিয়াছে। রাবেয়া তাহাকে তুচ্ছ করিতে আরম্ভ করিল ! নহিলে একটা চোরের সঙ্গে পর্যন্ত তুলনা দেয় কি করিয়া !

দীর্ঘশ্বাসে বুক ভারী করিয়া সে হাজী সাহেবের কাছে যাইয়া বসিল। তাঁহারও পরিবর্তন আসিয়াছে। পূর্বের সেই লঘুতা আর নাই ; ঠোঁটের চঞ্চল হাসিটুকু মিলাইয়া গিয়াছে। চোখের পদ্ম কি এক ম্লান ছায়া দিন দিন গাঢ় হইয়া নামিয়া আসিতেছে। তসবীহ হাতে লইয়া তিনি আল্লার নাম করিতেছিলেন। গুত্র শ্রুতির অন্তরাল হইতে রক্তিম ঠোঁট দুইটি বারবার কাঁপিয়া উঠিতেছিল। ইঙ্গিতে হোসেনকে বসিতে বলিলেন।

হোসেন ভাবিল, কাহাদের জন্য হাজী সাহেবের এই পরিবর্তন ঘটিল ? নিজের তো কিছুই নাই, অনবজ্ঞ দেয় তালুকদারেরা। তবে কাহাদের দুঃখ-বেদনায় হাজী সাহেবের প্রাণবান হাসিটি মিলাইয়া গেল ? তাঁহার ব্যক্তিগত অন্তর কোনোদিন কোনো কথা কহিল না !

: জোটাতে পারলা কিছু ?—হাজী সাহেব প্রশ্ন করিলেন।

: না।

: যাউক, শোনো। কাঠিপাড়া গ্রামের নিবারণ দাসের কাছে আমি কিছু চাউল চাইছিলাম, সে কইছে দেবে। তুমি এখনি সেখানে রওনা হইয়া যাও। আইজ খাইছো কিছু ?

অকস্মাৎ হোসেনের সমস্ত অন্তরাবেগ উঠিয়া আসিয়া পরমুহূর্তেই গলার কাছে আসিয়া থামিয়া গেল। মনে হইল, পৃথিবীতে তাহার একান্ত আপনজন কেহ থাকিলে সে হাজী সাহেব। আজ দুইদিন ধরিয়া ক্ষুদ্র ফ্যান খাইয়া আছে, কেহ একটিবারের জন্তও তো এই প্রশ্ন জিজ্ঞাসা করে নাই! সে কিছুতেই চোখের জল চাপিতে পারিল না।

হাজী সাহেব ভৎসনা করিয়া উঠিলেন : ছিঃ, এতো নরম হইয়া পড়ল কেন? ছনিয়াতে কতো বিপদ মসিবত আছে। বুক ফুলাইয়া তার সঙ্গে যে লড়াই করতে পারে সেইতো মানুষ। তোমার আর কি অবস্থা, এই দেখো খবরের কাগজে কি লেখছে—

ওপাশের মাতুরের উপর হইতে হাজী সাহেব সংবাদপত্রখানা হাতে লইলেন : এই দেখো, তুমি আমি তবুতো বাহোক বাঁচইয়া আছি, কিন্তু দেখোতো এই ছবি, না খেয়ে রাস্তায় কতোলোক মরইয়া পড়ইয়া আছে।

হাজী সাহেব ছবির পর ছবি দেখাইলেন, খবরের পর খবর তাহাকে পড়িয়া শুনাইলেন। হোসেনের মন, সেইসব শুনিতে শুনিতে, অদ্ভুত ভয় ও শঙ্কায় ভরিয়া গেল। মনে হইল, কোনো বিরাট রোমশ মৃত্যু দূর দিগন্ত হইতে তাহাদের দিকে ক্রমশ আগাইয়া আসিতেছে।

: কর্মফল, গুনাগারির জন্তই আজ আমাদের উপর এই বিপদ মসিবত পড়েছে। মনে জোর রাখো হোসেন, সৎ ও জায়পথে যে আছে

খোদার ছুনিয়ায় সে চিরকাল দুঃখে ভুগবে না। সমস্ত বিপদ-আপদ, দুঃখ-দৈত্যকে মুছবার জন্ত এক নয়া জমানা আগাইয়া আসছে।

হোসেন তাঁহার সবকথা বোঝে নাই। পরম আশ্বাস ও প্রশান্তিতে তাঁহার মুখের দিকে তাকাইয়া রহিয়াছে।

এক নয়া জমানা আগাইয়া আসিতেছে। আজিকার এ দুঃখরজনী পোহাইবেই। অথচ এই কথা সে ভুলিয়া গিয়াছিল।

হোসেন আবার কাতরাইয়া উঠিল। খোরাটা টানিয়া দেখিল এক ফোঁটা জলও তাহাতে অবশিষ্ট নাই। কে পানি আনিয়া দিবে? সে আসিল না! ধুকিতে ধুকিতে হোসেন দরজার দিকে চাহিয়া থাকে। কোনো পথিকের পদধ্বনিই কি তাহার বিজন উঠানে বাজিয়া উঠিবে না?

হোসেন আবার ক্রিমাইয়া পড়িল।

আধমণ চাউলে আগামী খন্দ পর্যন্ত এক রকম খাইয়া না-খাইয়া চলিত; কিন্তু রাবেয়ার মান-অভিमानে তাহার অধিকাংশই শাশুড়ীকে দিতে হইল। স্মরণ্য কিছুদিন পরে আবার পূর্বাবস্থা।

পেটের ক্ষুধা যে মানুষকে এতো কাবু করিয়া ফেলিতে পারে, হোসেন তাহা কোনোদিনই ভাবিতে পারে নাই। ছুনিয়াদারীকে হালকা ঝাপসা মনে হয়, আর তাহার মধ্যে একখণ্ড ভারী পাথরের মতো সে পড়িয়া আছে—কিছু করিবার শক্তি নাই, ধীরে ধীরে কে যেন কোন্ অতলে টানিয়া লইতেছে। খবরের কাগজের সেই ছবিগুলি দুঃস্বপ্নের মতো কেবল মনের সম্মুখে আসা-যাওয়া করে। সে শিহরিয়া ওঠে। কখনো

বা ঘুমের ঘোরে নিজেকেও অমনি মৃত অবস্থায় শয়ান দেখিয়া আকুলকণ্ঠে চিৎকার করিয়া ওঠে ।

হাজী সাহেব তাহার জন্ম গ্রামে গ্রামে ঘুরিয়া বেড়ান । যেখানে যা পান তাহার জন্ম লইয়া আসেন । হোসেন দাওয়ায় শুইয়া তাহার প্রতীক্ষা করে । রাবেয়া তাহার নিশ্চেষ্টতার জন্ম পরিহাস করে, বিদ্রূপ করে । সে গায়ে মাখে না । কী করিতে পারে সে । কখনো বা ত্রুন্ধ হইয়া ওঠে ।

সেদিনও কিছু খাবার জোটে নাই । রাবেয়া নিস্তেজ হইয়া বসিয়া রহিয়াছিল । তাহার যৌবন-ভরপুর দেহেও ভাঙনের ছাপ পড়িয়াছে ।

হোসেন তাহাকে দেখিয়া বিচলিত হইয়া কাছে আসিয়া কহিল : বউ, কী দুর্ভাগ্য লাগল আমার ! এতো কষ্টও তোকে দিলাম !

রাবেয়া ঝাঁজিয়া উঠিল : থাউক, আর আদর দেখাইতে হইবে না । তুমি তার চেয়ে আমাকে বাপের বাড়িতে দিয়া এসো, তবু তোমার ভালোমানুষী দেখইয়া গা-জ্বালা করবে না ।

: কেমন ?

: কেমন আর কী ? চেষ্টা করলে এই দুর্ভাগ্য কি দূর করা যায় না ? তুমি তো শুনতেই পারো না, কিন্তু দেখোতো—

গলা নামাইয়া রাবেয়া এই দুর্দিনেও ইয়াকুবের সচ্ছলতার প্রতি ইঙ্গিত করিল । পেটের প্রয়োজনে নারিকেল স্থপারিটা চুরি করিলেও কি দোজখে যাইতে হইবে ? আর ইহা কি বাস্তবিকই চুরি করা ? যাহাদের বড়ো বড়ো বাগান রহিয়াছে, ঘরে অভাবের লেশমাত্র নাই— ।

হোসেন সহ্য করিতে পারিল না : দেখ বউ, রোজ রোজ তুই এতো ইয়াকুব ইয়াকুব কেন করস বলতো ? আমাকে চোর হইতে বলস

তুই ? না, তুই গিয়ে ইয়াকুবকে নিকে করবি বল ? আমাকে রেহাই দে।—অত্যন্ত চিংকার করিয়া কথা কয়টি কহিয়া সে খুঁটিতে ঠেস দিয়া হাঁপাইতে লাগিল।

রাবেয়া খানিকক্ষণ গুম হইয়া বসিয়া থাকিয়া বলিয়া উঠিল : এই কথাটা তুমি উচ্চারণ করতে পারলা ?—উত্তেজনায় তাহার কথা আটকাইয়া যাইতে লাগিল—পারলা বলতে ? বেশ, ছাড়ইয়া দেও আমারে, খাইয়া পরইয়া বাঁচতে পারি কিনা নিজেই দেখমু। কী হইবে তোমার মতো এমন মরদের ঘর না করলে ?

তামাকের জন্ত শূণ্য ডিবেটা হাতড়াইয়া সেটা উঠানে ছুঁড়িয়া ফেলিয়া হোসেন খেঁকাইয়া উঠিল : যা না, কে ধরইয়া রাখছে তোরে ?

তারপর ক্লান্ত কাতর দেহটাকে টানিয়া বাড়ির বাহির হইয়া গেল।

: কোথায় যাও ? মরদ হও তো তালাক দিয়া যদিখ খুশি যাও। তোমার বাড়িতে আজই আমার শেষ।—রাবেয়া যেন ইহারই প্রতীক্ষা করিতেছিল।

সন্ধ্যার দিকে হাজী সাহেব আসিয়া একটা মিটমাটের চেষ্টা করিয়া গেলেন। কিন্তু রাবেয়া জিদ ধরিয়া রহিল—তালাকের কথা যখন হোসেন ছই ছইবার উচ্চারণ করিয়াছে, তালাক তাহাকে দিতেই হইবে। হোসেনের সহিত তাহার সকল সম্পর্ক চুকিয়া গিয়াছে। হাজী সাহেবের আনা চাউল, দাওয়ায় যে অবস্থায় আনিয়া রাখিয়াছিলেন, সেই ভাবেই পড়িয়া রহিল।

রাত্রে হোসেন একবার রাবেয়ার মান ভাঙাইবার চেষ্টা করিয়া ব্যর্থ হইল। সে স্পষ্ট উপলব্ধি করিল, রাবেয়া আর তাহাতে অনুরক্ত

নাই, ইয়াকুবের পৌরুষের প্রতি তাহার টান জন্মিয়াছে। ইয়াকুবের প্রতি ঈর্ষা এবং নানা ছশ্চিন্তায় মাঝরাত্রি পর্যন্ত তাহার চোখে ঘুম আসিল না।

সেইরাত্রেই নারিকেল চুরি করিতে যাইয়া সে আহত হইয়া ধরা পড়িল। গ্রামের সমস্ত অবরুদ্ধ টিটকারি এইবার মুক্তি পাইয়া পঙ্কিল জোয়ারের মতো হাজী সাহেবের সমস্ত আনন্দ গর্বকে ভাষাইয়া লইয়া গেল। তিনিই বলিয়া কহিয়া হোসেনকে ছাড়াইয়া আনিলেন বটে, কিন্তু মনে যে বেদনা পাইলেন তাহাতে তাঁহার শেষ হাসিটুকুও যেন নিভিয়া গেল। হোসেনকে সাথে লইয়া তিনি তাহার বাড়ি পর্যন্ত যাইতে যাইতে অনেক গ্রামবাসীর সঙ্গে সাক্ষাৎ হওয়া সত্ত্বেও, অত্যাশ্চর্য্য দিনের মতো হোসেন আর তাঁহাকে আলাপ করিতে শুনিল না। মুখ নিচু করিয়া তিনি আগে আগে হাঁটিয়া যাইতেছেন, যেন তিনিই চুরি করিতে যাইয়া ধরা পড়িয়াছিলেন। বাড়ি আসিয়া বসিলেন, নীরবে হোসেনের ভাঙা হাতখানা বাঁধিয়া দিয়া, তাহাকে কোনো তিরস্কার পর্যন্ত না করিয়া তেমনি নত মুখে চলিয়া গেলেন।

ভাঙা হাত লইয়া হোসেন নিঃস্বপ্নভাবে বসিয়া রহিল। বহুক্ষণ পরে রাবেয়াকে ডাকিল, কিন্তু কোনো সাড়া পাইল না। উঠিয়া খুঁজিয়া দেখে, ঘরবাড়ি শূন্য, খাঁ খাঁ করিতেছে। রাবেয়া নাই।

সে আর ফেরে নাই। হাজী সাহেব আঘাতটা সামলাইয়া লইয়া আবার পূর্বের মতো হোসেনের দেখাশুনা করিতে আসিতেন। বাপের বাড়ি হইতে রাবেয়াকে ফিরাইয়া আনিবার চেষ্টাও করিতেছিলেন। কিন্তু ইতিমধ্যে অকস্মাৎ দুরন্ত বসন্ত রোগে তাঁহার অপূর্ব জীবনের

পরিসমাপ্তি ঘটিল। মৃত্যুর পূর্বে হোসেনকে বলিয়া গেলেন—সংভাবে জীবনযাপন করিও হোসেন। দুঃখরজনী আজ না হউক কাল পোহাইবেই। প্রতীক্ষা করো, সকল পাপ-তমিস্রার অবসান ঘটাইয়া নয় জন্মানা আসিবেই।

হোসেন কাঁদিল না, চারিদিকে চাহিয়া দেখিল এতো জনসমাকুল পৃথিবীতেও সে একাকী। তাঁহাকে কবর দিবার পরদিনই সে জ্বরে পড়িল। ভাঙা হাতখানা তবু সারিয়াছিল, হাজী সাহেব এ-গ্রাম ও-গ্রাম হইতে যাহা আনিতেন খাইত। এখন সম্পূর্ণ সঙ্গীহীন অবস্থায় বিনা পথ্যে ঘরে পড়িয়া রহিল।

ঘরে শুইয়া দেহের যন্ত্রণায় কাতরাইতে কাতরাইতে সে বাতাসের গন্ধে টের পায় মাঠের ধান পাকিয়া উঠিয়াছে, মাঠ শুকাইয়া আসিয়াছে। হিম আর কুয়াশা প্রতি ধানগুচ্ছের গোড়ায় পাকে পাকে জড়াইয়া রহিয়াছে। সোনার ধান ঘরে উঠিবার জন্ত শিশিরাশ্রুতে কাঁদিতেছে।

সে-ও কাঁদিতেছে। সারা গায়ের বসন্ত ফোটক বীভৎস মৃত্যুকে ক্রমাগত নিকটে টানিয়া আনিতেছে। হাজী সাহেব নাই; স্ত্রী ছাড়িয়া গিয়াছে, বারবার অনুনয় করিয়া খবর পাঠাইতেও আসিল না; সারা গ্রামের লোকও আতঙ্কে দূরে সরিয়া রহিয়াছে। কেহ এককোঁটা জল দিতেও আসিবে না। খোরাটা শুষ্ক, তৃণায় প্রাণ ওষ্ঠাগত। হোসেন বিছানায় ছটকট করে, গোঙায়, আবার ঝিমাঁইয়া পড়ে।

বারবার খবর পাঠাইতেও রাবেয়া ফিরিয়া আসিল না। সে নাকি সত্যসত্যই ইয়াকুবকে নিকা করিবে।

সেই রাত্রে প্রথম দেখা কিশোরী রাবেয়া। ষড়যন্ত্র, সে যেন

আগাগোড়া একটা ষড়যন্ত্রের মধ্যে পড়িয়াছিল। আবার মনে হয়, না, হাজী সাহেব তো সে মানুষ নন। তবে কি তাঁহার মনে ব্যথা দিবার পাপেই আজ তাহার এই দুর্বস্থা? হোসেন উচ্চৈশ্বরে কাদিয়া খোদার কাছে, তাঁহার কাছে ক্ষমা ভিক্ষা করিতে লাগিল। সে যে অন্তরে কতো নিষ্পাপ, তাহা কি খোদা জানে নাই!

ফুসফুস দুইটা যেন আঠা লাগিয়া বুজিয়া যাইতে চায়। পানি, একটু পানি যদি সে পাইত! উঠিবার চেষ্টা করিতে গিয়া আবার যন্ত্রণায় কঁকাইয়া ভাঙিয়া পড়িল। মৃত্যুর ভয়ে সারা গাঁ তাহার চতুঃসীমানার বাহিরে সরিয়া গিয়াছে, কেহ একদিন খবর লইতেও আসিল না। অথচ ইহাদেরই জন্ত বর্ষার গাঙে বৃষ্টিতে ভিজিয়া—

দুনিয়াটা সব ভুলিয়া যায়। হাজী সাহেব থাকিলে বলিতেন—হাঁ, তিনি সারা দিনরাত্রি হোসেনের এই পাইখানা-প্রশ্রাবময় বিছানার কাছে বসিয়া তাহাকে জল খাওয়াইতে খাওয়াইতে বলিতেন : আল্লার নাম করো, দুঃখের রাত্রি পোহাইবেই।

সে সাস্থ্য না কি সত্য?

ভিতরে বাহিরের ঐ গাঢ় অন্ধকার কি এখনও শেষপ্রহরে পৌঁছে নাই? ক্ষেতে ধানের গোছা অনেক সোনালি স্বপন বুকে লইয়া সহস্র নিবেদিতার মতো নীরবে দাঁড়াইয়া রহিয়াছে। শ্বশুরের ক্ষেতের মাঝেকার সেই নালাটা দিয়া হয়তো কইমাছের সারি কানকো ঘষিয়া খালে নামিয়া যাইতেছে। আর এদিকে উঠানের পাশে কুলতলার নালায় পাতা তাহার 'টাই' এর দিকে কেহ আগাইয়া যাইতেছে।

ফিস ফিস করিয়া হোসেন কি বলিয়া উঠিল। ঘরের দিকে অগ্রসরমান

ছায়াগুলি সরিয়া গেল। না উহারা মানুষ নয়, শেয়াল। হোসেন ভুল করিয়াছে।

গায়ের গোটাগুলি অল্প অল্প চুলকাইবার ইচ্ছা হইতেছে।

তন্দ্রায় সে স্বপ্ন দেখিল—উঠানের গাঢ় অন্ধকার ভেদ করিয়া এক জ্যোতির্ময় পুরুষ হয়তো বা আকাশ হইতে নামিয়াই তাহার কাছে আসিয়া দাঁড়াইয়াছেন। আবক্ষলব্ধিত তাঁহার শুভ্র শ্মশ্রু, সমস্ত দেহে শুভ্র বেশ, বাঁহাতে তসবিহ্। শাস্ত সৌম্য হাসিভরা মুখের দুইটি রক্তিম ঠোট সান্ত্বনার বাণীতে কাঁপিয়া উঠিতেছে। শীর্ণ চক্ষু দুটিতে মমতার অন্ত নাই। কাছে আসিয়া ডানহাতে কি পানীয় তিনি হোসেনের ঠোঁটের কাছে তুলিয়া ধরিলেন, তাহা পান করিয়া হোসেনের সমস্ত জ্বালা-যন্ত্রণা দূর হইয়া গেল। জ্যোতির্ময় পুরুষ সমস্ত দেহে কল্যাণহস্ত বুলাইয়া দিলেন। আরো কাছে আসিয়া হোসেনের মস্তক নিজ ক্রোড়ে লইয়া তাহার নিকটে বসিলেন। হোসেন চিনিতে পারিল—হাজী সাহেব। আকুল হইয়া সে তাঁহার পা জড়াইয়া কাঁদিয়া উঠিল। হাজী সাহেব স্নিতমুখে যেন বহুদূর—ঐ আকাশের তারকাদের মতো স্নদূর হইতে বলিলেন, আল্লা নাম করো, সমস্ত বিপদ মসিবত দূর হইয়া যাইবে। নয়া জমানার প্রভাতের বিলম্ব নাই। তাঁহার কণ্ঠ যেন সেই প্রভাতের বন্দনায় মুখর হইয়া উঠিল। তাহারই তপশ্চায় তিনি নিমজ্জিত হইয়া গিয়াছেন, আর হোসেন স্নদূরে চাহিয়া দেখিতেছে পূর্বাচলে আকাশ বাতাস মাটি রামধনুর চাইতেও বিচিত্র পবিত্র রঙে রঞ্জিত হইয়া গিয়াছে। কোনো শুভ শাস্ত্র পবিত্র জ্যোতির আগমন-বার্তা লইয়া অজস্র হরপরী জিন ফেরেশতারা অপূর্ব সংগীতে বন্দনা-শাহিয়া মাটির পৃথিবীতে নামিয়া আসিতেছেন। হাজী সাহেবের কণ্ঠ তাদের

গীতের সহিত এক হইয়া গিয়াছে। সকলেরই চক্ষু যেন তাহারই মতো
হতভাগ্যের প্রতি নিবদ্ধ।

বাহিরে তখন ধীরে ধীরে রাত্রির তমিশ্রা অপসারিত হইয়া যাইতেছিল।
কিন্তু সে আর চক্ষু মেলিয়া দৈনন্দিন সূর্য দেখিল না।

পরদিন ভোরে সত্ৰ মুক্তিপ্রাপ্ত আজাহার রাবেয়াকে সঙ্গে লইয়া আসিয়া
দেখিল, হোসেনের মৃতদেহের অধিকাংশই যেন কিসে খাইয়া ফেলিয়াছে,
কিন্তু তবু চক্ষু দুইটির পরম আশ্বাসময় দৃষ্টি তখনো সম্মুখে নিবদ্ধ।
আজাহার শিরিয়া আগাইয়া আসিয়া পশ্ছে পশ্ছ মিশাইয়া দিল।

মূলধন

ক্ষেত ছেড়ে লাঙল কাঁধে বাড়ি যাচ্ছিলো মেনাজ। খালের পাড়ে পাড়ে ছোট্ট পথ। তারপর হাটখোলা। সেখানে বৈরাগীর দোকানের সামনে বৈরাগীর সাজানো কলকেটায় একটা টান দেবার জন্তু থামতেই, সামনে তাকিয়ে দেখে পঁচাপ্যাচে কাদার মধ্যে মনু হুমড়ি খেয়ে পড়েছে, মুখ থুবড়ে।

তামাক খাওয়া মাথায় রইলো ; তাড়াতাড়ি ছুটলো তার পিছনে।

: এই ওঠ, এইতো—ওঠ। বহু টানা হাঁচড়া করে মেনাজ তাকে দাঁড় করাতে চেষ্টা করে।

বৈরাগী ডেকে বলে : আসবো নাকি ?

সমস্তটুকু জোর দিয়ে তাকে টেনে দাঁড় করাতে করাতে মেনাজ বলে : না, না। এইতো উঠছে। মনু তো আমার বুড়ি না যে, এই কাদা থেকে ও উঠতে পারবে না।

তারপর অপেক্ষাকৃত একটু শক্ত মাটিতে টেনে নিয়ে মনুর মুখের কাদা মুছিয়ে দেয়। একটু আদর করে ছুয়েকটা কী কথা বলে। মনু নিঃশব্দে একবার তার দিকে চোখ তুলে তাকায়, তারপর মাথাটা ঘেঁষে আনে পাঁজরের দিকে।

: ওকী মেনাজ, এখনো দাঁড়িয়ে ! বাড়ি যাবা না ?

খালের ওপার থেকে করমালী হাঁক দেয়।

: হ্যাঁ, হ্যাঁ, যাবু। একটু কাল সবুর করেন দাদা। দেখছেন তো কাদা মাখইয়া কেমন ইইছে মনু ! একটু ধুইয়া নিই—

বলতে বলতে মন্থকে টেনে খালে নামে মেনাজ। মন্থর সারা গা রগড়ে রগড়ে ভালো করে ধুয়ে দেয়।

আশ্চর্য রকম সুন্দর মন্থর নখর দেহটি। এমন তেলালো খয়েরী রঙ আর কালো গায়ে নেই সারা নাচনমহলে। এমন গরু নিয়ে আর ঈর্ষাও কুড়োয় না কেউ। মেনাজ আস্তে আস্তে ঘসে ঘসে সব কাদা তুলে ফেলে তার গা থেকে। মুখে আবার পরিচ্ছন্ন তৃপ্তির হাসি ফিরে আসে।

করমালী ওধারে স্নিতমুখে তাদের দিকে তাকিয়ে দাঁড়িয়েছিলো। গ্রাম সুবাদে মেনাজ তাকে দাদা ডাকে। অনেকদিন থেকেই তার সুখ-দুঃখের বন্ধু, অকৃত্রিম শুভানুধ্যায়ী। তার সাদাপাকা দাড়ির মধ্যে হাসিটুকু যেমন শ্রান্তিকরণ তেমনি স্নেহময় বলে মনে হয় মেনাজের। তাছাড়া অনেকদিন পরে তার মুখে হাসি দেখে সে খুশি হয়ে বলে : কি দাদা, হাসছে আছেন যে ?

: দেখতে আছি বাপ ব্যাটার কাণ্ড।

মেনাজ লজ্জা পায় : দূর, আপনার কেবল—চলেন, চলেন এখন।

তাড়া না দিয়ে পারে না মেনাজ। অথচ আবার ভালোও লাগে। এরকম রসিকতা কেবল দাদা নয়, সারা গ্রামের লোকেও করে। করমালীর তবু দরদ আছে। যাদের নেই তাদের কথায় সে সত্যি দুঃখ পায়।

ওরা বোঝে না মন্থ শুধু গরুই নয়। বাস্তবিক মানুষের মতো অনুভূতি আছে তার। সব বোঝে ও। আদর করে ঘাস বিচালি খেতে দিও, দেখো, কালো চোখ দুটি তুলে কী নিবিড় কৃতজ্ঞতাই না তোমাকে জানানাবে। চড় চাপড় দিয়ে দেখো, পাঁজরের চামড়াটা বেদনায় কেমন খরখর করে কাঁপে, সমস্ত মুখে কালো ছায়া নামে ; দুঃখে আর ভয়ে

শাহেরবাহু

ও কি আর তোমার দিকে তাকাবে ভেবেছো ?

ওপরে উঠে বাঁহাতে কাঁধের লাঙল চেপে অশ্রুহাত মন্থর ঘাড়ে রেখে
কথা বলতে বলতে বাড়ির পথ ধরলো তারা ।

তারপর একটা সাঁকো পার হয়ে ছুজন ছুপথ ধরে । মেনাজ মুখে শব্দ
ক'রে মন্থকে তাড়াতাড়ি চলতে উৎসাহ দেয় ।—ঐ তো বাড়ি । বিল
থেকে তাজা ঘাস কেটে এনে রেখেছি । পেট পুরে খেও ।

মরিচ ক্ষেতের পাশ দিয়ে বাড়ির দরজায় পড়ার মুখে, মন্থকে থামিয়ে
মেনাজ একবার চারদিকটা দেখে নিলো কেউ আছে কিনা । তারপর
মাথায় বাঁধা গামছা খুলে আশ্বে আশ্বে তার নারা গা মুছিয়ে দিলো ।

চৌ-চালা টিনের ঘরের পেছনে গোয়াল ঘর । মন্থকে দেখে বাছুরটার সে
কী লাফালাফি, ডাকাডাকি । দড়ি খুলে দিতেই ছুটে এসে ছুধের বাঁটে
চুমুক লাগায় । মেনাজ মন্থর গলার দড়িটা খুঁটিতে বেঁধে স্তূপকরা কাঁচা
ঘাস এক খামচা তুলে মাটির গামলার মধ্যে রাখে । এক কলসী জল এনে
ঢালে ।

: নে, এবার খা ।—গলায় কয়েকটা আদরের চাপড় দিয়ে মেনাজ তারপর
বেরিয়ে আসে ।

বাংলার শস্ত্রভাণ্ডারের চাষী বটে মেনাজ, কিন্তু নিজে সে এক রকম
ভূমিহীন কিষাণ । এরা পরের ক্ষেতে বর্গা খেটে ঋজি-রোজগার করে ।
এদের মতো কাদা জলে জোঁকের কামড় নিয়ে এতো শস্ত্রও বোধ হয়
কেউ ফলায় না, তবু অভাব বর্তমান পুরোমাত্রায় । সর্বোপরি তো এরা
সংগ্রাম করে বিরুদ্ধ প্রকৃতির সঙ্গে । হয় প্রচণ্ড বহু ধানের খাড়া খাড়া
সোনালি শীষগুলো মাটিতে মিশিয়ে দিয়ে যায়, অথবা ক্ষেত থেকে ঘরে

না উঠতেই মামলা-মোকদমা জমিদারের খাজনা প্রভৃতির শেষে হাতে জমা থাকে অতি অল্পই। তা দিয়ে কোনোমতে দিন কাটে। তেরোশো পঞ্চাশ সালের মন্বন্তর মহামারীতে এদের মাঝে তো হাহাকার। ধারকর্জ দেনা করে মন্বন্তর থেকে যারা বাঁচলো, তাদের অধিকাংশ আবার নিশ্চিহ্ন হোলো মহামারীতে। ধরা যাক না ঐ করমালীর কথা, তালুকদার রহম মিঞার কর্জ কুপায় যদি বা মন্বন্তর থেকে বাঁচলো, কিন্তু সমস্ত ঘরটা খা খা হয়ে গেল বসন্তে। যে করমালী একদা ছিলো গ্রামের বয়োবৃদ্ধ ‘দাদা’ আনন্দের খনি, সে-ও যেন এবার কেমন নিঃবুম হয়ে পড়েছে। বুড়োবয়সে লাঙল কাঁধে ক্ষেতে নামতে বাধ্য হয়েছে আবার।

মেনাজের বরাত ভালো। জমি মাত্র ‘ছুকুড়া’ হলেও তার ফসলে ছোট পরিবারটি ধাক্কাটা উৎরে উঠেছে। রোগেও কেউ পড়েনি। কিন্তু গত ভাদ্রে চাষের গরুটা মারা গেল। নতুন একটা কিনে এনে জুড়বে, তা আশ্বিন হয়ে উঠলো দাম। গাই গরুটা ছিলো বলে রক্ষা। আশ্বিনের শেষের দিকে ছবেলা ছুমুঠো জোটাতেই যখন প্রাণান্ত অবস্থা, সে সময় দৈনিক দেড়সের দুধ দিয়ে ঐ গাইটাই তাদের বাঁচিয়েছিলো—আদর করে মেনাজ যার নাম দিয়েছে মনু। গুরি কলাণে কিছু তবু খেতে মিলেছিলো, তা নাহলে বহুজনের মতো তাকেও শহরের পথে বেরিয়ে পড়তে হতো ছুমুঠো খাবার খুঁটে বাঁচতে।

এবার একটা গরু কেনা তার আর সাথে কুলোয়নি। একে তো গতোবারের মড়কে দিকবিদিকের গরু মারা গেছে, তার ওপর মিলিটারী কনট্রাক্টর চড়া দামে গরু কেনে, যার ফলে দেড়শো ছশো টাকার কমে কোনো ভালো গরু কেনার কথা কল্পনাতেও আসে না। বাধ্য হয়ে মনুকে দিয়েই কাজ চালাতে হচ্ছে। আরেকটা

শাহেরবাহু

ধার নেয় মাঝে মাঝে করমালীর কাছ থেকে। তারো সাত কুড়া জমি সে 'বদলা' দিয়ে চষে দিচ্ছে। ছোটো সংসারটি নিয়ে তার দিন মোটামুটি চলছে একরকম। থাকলোই বা না হয় এখন অভাব-অনটন, ভাবে, মনুকে দিয়ে সে বরাত ফিরিয়ে নেবে তার, যাক না কিছুটা দিন।

আষাঢ়ের শেষ দিকে গোমড়ক লেগেছে শুনে সারা গ্রামের চাষীরা সন্ত্রস্ত হয়ে উঠলো। প্রকাণ্ড বাহাছরপুর মৌজা নাকি টপাটপ উজ্জাড় হয়ে যাচ্ছে। আতঙ্কে সবাই স্থির। গতোবার মড়কের সময় তবু ইউনিয়ন বোর্ড থেকে শহরের পশুডাক্তার আনিয়ে টিকা দেওয়ার বন্দোবস্ত হয়েছিল, কিন্তু এবার তারা নীরব। প্রেসিডেন্ট বলছেন, ডাক্তার আসছে। তবু কোথায় কে! দেখতে দেখতে মেনাজের গ্রামেও এল। মারা পড়লো করমালীরও একটা।

তিনটা গরু তার গোয়ালে। প্রথমটার তিনদিনের মধ্যে আক্রান্ত হোলো আরো একটা। দুর্ভাগ্যের ছশ্চিন্তায় তখন আর প্রাণ নেই যেন করমালীর। চাষ বন্ধ। গোয়ালঘরের খুঁটিতে ঠেস দিয়ে সে নিঃশ্বাস নিয়ে বসে থাকে।

মেনাজ এসে গরু দুটোকে দেখে। তাদের চামড়ার নিচে গুটি গুটি মাংসের গোলক উঁচু হয়ে উঠেছে। একটা পা ছুঁড়ে গড়াগড়ি খাচ্ছে। এক একবার থরথর করে কেঁপে কেঁপে পা সিঁধে করে দেয়, আবার সমস্ত দেহটা শুদ্ধ ছটফটিয়ে গড়াগড়ি যায়। চেখে জল, মুখে ফেনা, লালার স্রোত। মাছি আর পাতলা গোবর।

অন্য একটা অবিচল। মাথাটা বুঁকে পড়েছে। অর্ধোন্মীলিত চোখে

কেরায়া নায়ের মাঝি

বিলের ফুরফুরে বাতাসে অতি ভোরেই জমিলার ঘুম ভাঙলো। শিয়রের দিকের ছয়ারটা খোলা। ছুই ছেলে আর শিশু মেয়ে তখনো ঘুমন্ত; শুধু আজাহার বিছানায় নেই, পুরু কাঁথাটা পায়ের কাছে সরিয়ে দিয়ে কখন উঠে গেছে। গত সপ্তাহখানিক ধরে আমাশয়-ভোগা কাহিল শরীরে সে বিছানা ছেড়েই উঠতে অক্ষম, তবু এই এতো ভোরে কোথায় বেরিয়ে গেল? এদিক ওদিক সম্ভাব্য স্থানে উকি ঝুঁকি দিয়ে বিস্ময়বিমূঢ় মনে সে পুকুরপাড়ে এসে দাঁড়ালো।

ঘাটে নৌকাখানাও নেই। জমিলা যেন হঠাৎ আঘাত পেয়ে নিশ্চল হয়ে পড়লো। ঐ শরীরে আজাহার তাকে না জানিয়েই কেরায়া বাইতে বেরিয়ে গেল! হতে পারে, ভাঙা বুরুবুরু সংসারের অভাব-অনটন নিয়ে কাল তার সঙ্গে খিটিমিটি করেছিলো বা অনেক যা-তা কথা বলেছিলো। তখন কি মেজাজ ঠিক ছিলো জামিলার! তবু স্তম্ভ হলে কথা ছিলো না। কিন্তু এমন অসুখ-কাঁপা স্বাস্থ্যও সে বেরিয়ে যায় কেমন করে?

খালের ঘাটে মুখ ধুতে বসে গত বিকেলের ঘটনাটা একবার পর্যালোচনা করে নিলো জমিলা। ছোটছেলে কাসেম কাল মুনীবাড়ির দিক থেকে কাঁদতে কাঁদতে ফিরে এলো। জমিলা প্রশ্ন করে জানে, তাদের কাছারির সামনে শশার মাচা থেকে সে একটা ছোট শশা ছিঁড়েছে দেখে ছোটমিয়া তার গালে চুরির অভিযোগে এক চড় কশিয়ে দিয়েছে। সে কী চড়! পাঁচ পাঁচটা আঙ্গুল রক্তশূন্য হলদে গালে কালো হয়ে

ফুটে উঠেছিলো। সামান্য একটা কচিশিশার জন্তু এই শান্তি জমিলাকে প্রায় ক্রিপ্ত করে তোলে ; এমন গালাগাল ছিলো না যা সে নেপথ্যবাসী ছোটমিয়ার উদ্দেশে পাড়েনি। আজাহার হৈ হৈ করে ধমক দিয়ে ওঠে—ওরে চুপ, চুপ হারামজাদী, হেরা হোনলে আর রক্ষা থাকবে না। হুপায় হুপায় মূলীবাড়ির কেয়াডা পাই দেইখাই মাঝে মাঝে খাওয়ানডা জোড়ে, হেয়া মনে রাহিস।

: বাও ক্যা অমন চাড়ালের কেয়া ? ছুইয়াইতে আর চড়নদার নাই ? বড়ো আষ্টো আনা এক টাহা দে, হেইর পানহে একবারে কেনা গোলাম অইয়া থাকমু ! ক্যা, ছুইয়াইতে আর মান্ন নাই ?

: থাকলে দেহোনা ! বিনা ওষুধে পথ্যে পড়ইয়া রইছি, জিগাইতে আইছে কেউ ? বোলে, ম্যাভাই কী অইছে তোমার ?—বলতে বলতে আজাহারের ঠোট দুটি কেঁপে উঠেছিলো।

কিন্তু জমিলার তখন মত্ত মেজাজ, বলেছে : তুমি চোপো, তোমার নাহান অতো ভিজা বিলই আমি না যে, এতো অহায় সইয়াও চুপ করইয়া থাকমু। আমার পোলারা চোর একথা কইবে কেউ ? খিদার চোড়ে এউক্ক শশাই যদি নিয়া থাকে হেতে—

: আমি ভিজা বিলই ?—আজাহার তার খিটখিটে মেজাজ সত্ত্বেও নিজেকে সংবরণ করেছে। ছেলেমানুষের মতো অভিমান আর বদ্মেজাজীর উদ্ভা ছুই-ই তাতে মেশানো। সে মুহূর্তটি মনে পড়লে জমিলার এখনো হাসি পায়, অথচ এরি জবাবে সে বলে ফেললো—
ভিজা বিলই না ? পোলাগো খাওয়াইতে পারবা না, হেরা এরডা ওরডা যাইয়া ধরবে, এর ছুয়ারে চাইবে ফ্যান, ওর ছুয়ারে ক্ষুদ, কেউ কিছু না দেলে খাওনইয়া জিনিস পাইলে খাইবে, আবার হেইয়ার

উপরে যদি খায় অন্ডায় মাইর, তউ তুমি কিছু কইতে পারবা না ?

: না, পারমু না । গেছেলে ক্যা রাফুসইয়া হেয়ানে ?

: রাফুসইয়া ! কয়দিন ধইর্যা পেটে ভাত পড়ে না খেয়াল আছে ?

ঢ়াহো, তোমার ব্যারামইয়া শরীল, তুমি বাজে প্যাচাল পুইডোনা ।

খিদায় যদি একটা কচি হোয়া ছিড়ইয়াই খাছে, হেতে এমন অন্ডায়ডা কী অইছে হুনি ? মুন্সিগো দৌলত হের জন্তে কতোহানি কমছে ?

: হেরা শখ কইর্যা লাগাইছে । না কইয়া ও ছেড়তে গেলো ক্যান ?

: জানি জানি, হেগো চিত্তডা কেমন জানি । এউক্ক শশার লাইগ্যা বাছারে আমার এমন চোপাড় দেছে যে, ভিরমী খাইয়া পড়লে, বড়োগ্যাদা কোলে কইর্যা কঁাদতে কঁাদতে ছুইট্যা আইছে ।

চড় খেয়ে ছেলেটা ভারি নির্জীব হয়ে পড়েছিলো । ক্ষুধায় পেটেপিঠে এক, চোখ ছুটো কোটরাগত, তার ওপর চড়ের ধাক্কায় সে সেখানেই মাথা ঘুরে পড়ে গিয়েছিলো ।

: বেশ করছে, গ্যাছেলে ক্যা হারামজাদা ?

: তউ তুমি কবা গ্যাছেলে ক্যা ? কিছু কইতে পারবা না, খাইতেও দেতে পারবা না, তয় জন্ম দেছেল্লা ক্যা ?

এর পর আজাহার আর একটি কথাও উচ্চারণ করেনি, অকস্মাৎ চুপ করে গেছে । তারপর গভীর রাত্রে জমিলা ঘুম ভেঙে দেখে, কাসেমের আহত গালে বীতনিদ্র আজাহার শুয়ে শুয়ে হাত বুলোচ্ছে আর বলছে

: খুউব খিদা লাগছেলে তোর, না ?

: হুঁউ ।

খালের ওমুখে একটা অগ্রসরমান নৌকা দেখা যেতেই জমিলা পাড়ে

উঠে এলো। নৌকাখানা করিম মাঝির। তার বাড়িও এই গ্রামে, আজাহারের সঙ্গে দূর সম্পর্কের আত্মীয়তা আছে। যেতে যেতে সে জমিলাকে দেখে প্রশ্ন করলো : আজাহার আছে কেমন, ভাবিছাব ? ঘোমটা টানার চেষ্টা করে তাড়াতাড়ি জবাব দিলো জমিলা : অশুক হেই রহমই, তউ আইজ আবার কেয়ায় গেছে। কিছু কইয়াও যায় নায়। আপনে হেরে দেখলে যেভাবে পারেন বাড়ি পাঠাইয়া দিয়েন।

: কেয়ায় বাইর অইছে !—করিম বৈঠা থামিয়ে বিস্ময়ধ্বনি করলো—
ও শরীলে যাইতে দেলা ক্যামনতারা ?

: কই যে, রাইতে না জানাইয়া গেছে।

: ওঃ ! আচ্ছা, কাইল ফিরমু আমি, এয়ার মধ্যে দেহা অইলে অবশই পাঠাইয়া দিমু।

করিম চলে যেতে আবার ঘাটে নামলো জমিলা। ওপারের ঘাটে সেই সময়ে মুখ ধুতে এলো সালেহা।

: জানো সালেহা, হাসেমের বাপে আইজ ব্যানে রাগ অইয়া নাও লইয়া বাইর অইছে।

: রাগ অইয়া ! ক্যা, ঝগড়া হরছিলি বুঝি ?

সংক্ষেপে ঘটনাটি জানালো জমিলা।

সালেহা হেসে উঠলো : ভিজা বিলই কইলে রাগ অইবে না ? স্ত্রস্থ মর্দ হোনলেও তো চ্যাতে। তায়, একে হে ব্যারামইয়া, হেয়ার উপরে তোর আদরের—

তার সহাস্ত মস্তব্যো জমিলা ধমক দিয়ে উঠলো : দূর মুখপুড়া, দিন দিন তোর বয়স কমে না বাড়ে ?

নালেহা হাসতে হাসতে পাড়ে উঠে গেল কুলি ছিটিয়ে ; যেতে যেতে বলে গেল : ভাবিস না, দেহিস আনে হাঁঝের আগেই আবার কোলে ফিরইয়া আইচে ।

: ধ্যেৎ !—তামাসা উপভোগ করার মতো মনের অবস্থা জমিলার নেই । ছেলেরা নাচনমহল হাটে শাপলা বিক্রী করতে যাবে বলে ডাকাডাকি শুরু করেছিলো । জমিলা ঘাট থেকে উঠে এলো ।

ছুটি ছেলে, হাসেম আর কাসেম, শাপলা নিয়ে হাটে রওনা হোলো । ছোটো মেয়ের ঘুম ভেঙেছে ; তাকে মাই দিয়ে ঠাণ্ডা করে, তার নষ্টকরা কাঁথা কাপড় ধুয়ে, স্নান করে আবার দাওয়ায় পা ছড়িয়ে বসার সময় জমিলা লক্ষ করল, সূর্য এরই মধ্যে মাথার উপর উঠে এসেছে । ক্ষুধা লেগেছে তার, কিন্তু ঘরে খাবার নেই কিছুই । কালকের কোথা থেকে আনা একটা নারকেলের অর্ধেকটা ছেলেরা খেয়ে গেছে, বাকি অর্ধেকটা শিকেয় ঝুলছে, হয়তো ওরা ফিরে এসে খাবে । জমিলা কিছুক্ষণ ইতস্তত ক'রে সেটা নামিয়ে এনে কামড়ে কামড়ে খেল খানিকটা ।

হাওয়ায় কেমন একটা গুমোট শুকনো ভাব । সারা গায়ে ঘাম ছেড়েছে । জমিলা একটা পাটি বিছিয়ে দক্ষিণের ছয়ারটার কাছে শুয়ে পড়ে ।

চোখে পড়ে বিলের বুক চিরে জেলাবোর্ডের নতুন গড়া পথ—সোজা চামটা হাট পর্যন্ত চলে গেছে । ছাতা মাথায় একটি লোক সেদিকে যাচ্ছে, রোদে ঝিলমিল করছে তার দেহ । রাস্তায় চামটা হাটের দূরত্ব চার মাইল অথচ আগে এই নদীনালা খালবিলের দেশে সেখানে যেতে সকাল সন্ধ্যা লাগতো । বিয়ের ছুবছর পরে আজ্ঞাহারের

সাথে সে একদিন জারীগান শুনতে চামটা গিয়েছিলো। আঁকা বাঁকা খালবিলের পথটা ভারি ভালো লেগেছিলো! তখন—হ্যাঁ আশ্বিন মাসই, সকালে রাঁধা-ভাত নিয়ে তারা রওনা হোলো। সে ছিলো ছইয়ের মধ্যে বসা, সামনে পর্দা টাঙানো। আজাহার গলুইতে বৈঠা হাতে বসে নির্দেশ দিয়েছে শাস্ত শিষ্ট কলাবউয়ের মতো বসে থাকতে। জমিলা বহুবার উসখুস করলো চারদিকের কিছুই দেখতে পাচ্ছে না বলে; কিন্তু আজাহারের তাতে ক্রক্ষেপ নেই দেখে লোকালয় একটু পাতলা হতেই সে একটানে পর্দাটা খুলে ফেললো।

: বাবারে বাবা, আমি কি একটা মান্ন না! কোন্ হান দিয়া আইলাম গেলাম হেয়া দেখমু না, তয় আইলাম ক্যা? .

আজাহার তো হা-হা করে উঠেছে: আহা-হা, করো কী, করো কী? ব্যাডারা আছে।

: আছে হেতে কী অইবে? খাইয়া তো হালাইবে না কেউ।—বলতে বলতে সে ছইয়ের বাইরে গিয়ে বসেছিলো, তারপর চারদিক দেখে বললে: সবদিকে বিল, এয়ার মধ্যে তোমার বউরে কেউ দেখতে আইবে না।

আজাহার হেসে চুপ করে থেকেছে।

ঐ বিলের মাঝামাঝি তারা পৌঁছেচে—যেখানে ঐ ছাতামাথায় লোকটি দেখা যাচ্ছে, প্রায় অমনি জায়গায়—আজাহার পিছনে আঙুল দিয়ে নিজেদের বাড়িটা দেখিয়ে দিলো তখন। সবুজ গাছপালা ঘেরা তাদের বাড়িটা বিলের পাশে দাঁড়ানো; ঘর-টর কিছু চোখে পড়েনি।

কী না বিচিত্র মধুর ছিলো সে দিনের স্বাদ! বিলের স্বচ্ছ জলের বুক

ঠেলে ওঠা ধানের গোছা, শাপলার পাতা, ফুল আর ফুল ; হাত দিয়ে সে ছুঁয়ে ছুঁয়ে যাচ্ছিলো সব। রাঙা ফুল ছিঁড়ে খোঁপায় পরল একটা। অহেতুক ভাবে একটা পুঁটি লাফিয়ে উঠলো নৌকায়। গাঙ শালিখের ‘হট্টি’ চিৎকার শুনে সে হেসে গড়িয়ে পড়ছিলো বারবার। আজাহার তো তার চাঞ্চল্যে অস্থির : ছইর মধ্যে যাইয়া বও, ওরহম করলে পড়ইয়া যাব। আর, না হয়, আমারে এটু তামাক খাওয়াও।

আজাহারের ঘর্মাক্ত পেশীগুলো বৈঠার টানে ফুলে ফুলে উঠছে ; চোখ মুখ সব রোদে লাল। তামাক খেয়ে আবার বৈঠা হাতে নেবার সময় জমিলা বলেছিলো : এটু জিরাইয়া লও এবার।

আজাহার তা শোনেনি ; জমিলাই তাকে জোর করে ছইর মধ্যে টেনে আনলো, তাকে শুইয়ে ঘাম মুছিয়ে দিলো যত্ন করে। সেই সময়ে খোঁপার শাপলা ফুলটা পড়ে গিয়েছিলো আজাহারের মুখের ওপর। সেটা তুলে আবার খোঁপায় পরার সময় জমিলা বললে : তোমার মুখখানো রৌদে এই ফুলডার নাহান রাঙা অইয়া ওঠছে।

বলেই পড়লো বিপদে। আজাহার উঠে ছুঁছুঁমি শুরু করে দিলে : হাচইও ? আমারে হেইলে কোন হানে লবা ?

এবং উত্তরের কোনো প্রতীক্ষা না করেই আজাহার তার কোলে মুখ গুঁজে শুয়ে পড়েছিলো। জামিলা তো লজ্জায় কী করবে ভেবে পায় না।

: ছিঃ, ঐ দেহো ব্যাডারা।

ধমকে কাজ হোলো, আজাহার তাড়াতাড়ি আবার বৈঠাহাতে গলুইতে গিয়ে বসেছিলো : কই ব্যাডারা ?

সামনে ফের পর্দা টানিয়ে জমিলার সে কী উচ্ছ্বসিত হাসি : বাওনা তরাতরি, হাঁকের আগে পৌঁছবা কেমনে ?

সেই মাদকতাময় দিনগুলি কোথায় গেল ? ছেলেমানুষের মতো যে আজাহার সেদিন পর্যন্ত কেয়া বাইতে যাবার আগে জমিলার পানরাঙা ঠোঁটে চুমু না খেয়ে বেরোতো না—তাকে কেন যে কাল অমন শক্ত কথাটা বলতে গেল ! সে কি তাদের খাওয়া পরার চেষ্টার কল্পন করে ? ধূলাট কৃষির সময় সকাল সন্ধ্যা খাটুনি, একা একা জোঁকের কামড় খেয়ে বর্গা ক্ষেতে বীজ বুনোনা, চাই বুনে মাছ ধরা, হাটে বিক্রী করা, তার পরেও অবিরাম ‘কেয়া’ বাওয়া—কতো আর করবে একলা মানুষ ? জমিলার চাইতে সে কি ছেলে মেয়েদের কম ভালোবাসে ? কাসেমের গেল-বার জ্বরের সময় সারারাত নিদ্রুঁম চোখে তার মাথায় হাত বুলায়নি সে ? একদিন অবস্থা একটু খারাপ হোলো, কাসেম কথা বলে না, বুকের মাঝে কেমন একটা অশুভ ঘড়ঘড় শব্দ, মুখে উঠল ফেনা । আজাহার কি কম কঁদেছে সেদিন ?

অনুতাপের আর অবধি রইলো না জমিলার । অল্প অসুখ নয়, রক্ত আমাশয়, শরীর শুকিয়ে এমন হয়েছে যে গায়ে আধ পয়সার বল নেই, উঠতে গেলে কঁপে বসে পড়ে—সেই আজাহার কেমন করে আজ নৌকো নিয়ে বেরিয়ে গেল ! গেছে যে জমিলার কথার উপর রাগ করেই তাতে আর কোনো ভুল নেই । কিন্তু জমিলাকে কি সে চেনে না ? মুখ ফসকে যে কথাগুলো তার মুখ দিয়ে বেরিয়েছিলো, বাস্তবিকই সেগুলো কি তার অন্তরের কথা ? রাগ করে বেরিয়েছে নিশ্চয়ই, নইলে কি যাবার আগে জানিয়েও যেতে পারত না তাকে,

বেলা ক্রমে পড়ে এলো । পাখি-পাখালির ডাকে আর নিভন্ত আকাশে

নামলো বিকেল । রাস্তার ওপর গোরু নিয়ে ফিরছে কয়েকজন লোক । খালে কাদের নৌকো যাওয়ার শব্দ বাজলো । মেয়ে জেগে উঠে মাই হাতড়ে কাঁদতে শুরু করেছে, তবু জমিলার আচ্ছন্নতা কাটে না, যেন সে কোথায় হারিয়ে ফেলেছে নিজেকে—ঐ দূর বিলপ্রান্তের ঝিলমিলে গাছপালার অন্তরালে । বালিশ ভিজে উঠেছে তার অনুতাপের অশ্রুতে ।

শেষে ছেলেরা এসে পড়তেই সে উঠে পড়ে । বড়ো ছেলের হাতে চালের বড় পৌটলা, সেটা দাওয়ায় নামাতেই ছোটো ছেলে ভেতর থেকে কী একটা মোড়ক তুলে নিলে ; বড়ো ছেলে হা হা করে উঠলো ।

: দে, দে, আমাডে দে, হালাইয়া দিবি তুই ।—থাবা দিয়ে জিনিসটা সে নিজের হাতে নিলো—বাজানে আইছে মা ?

: না । ক্যা, তোর হাতে ওডা কী ?

: অমুখ । হাটখোলার অশ্বিনী কবিরাজের হাত পাও ধরইয়া এডু আনছি বাজানের লইগ্যা । দেতে কী চায় ! হ্যাশে—

ছোটোছেলে বলে উঠলো : এয়া খাওয়াইলেই আমাশা ভালো অয়, হে কইছে ।

দিখিজয় করে এসেছে যেন ছুভাই । পথকষ্টে দেহ শ্রান্ত, কিন্তু এই ওষুধটুকুর জগুই তাদের সারা অন্তর উৎসাহ আর আনন্দে প্রদীপ্ত ।

: যা, মাচার উপরে থুইয়া আয় । এতে চাউল কয় সের ?

: এক সের । তুমি মা রাক্ষো তরাতরি, খিদা লাগছে—বলেই ছোটোছেলে নেতিয়ে গুয়ে পড়ে ।

জমিলা তাড়াতাড়ি রান্না বসাতে যায় ।

খাওয়া দাওয়া মোছা সারা হতেই বিকেল প্রায় শূন্য হয়ে আসে। দূরের অথি বিলের জল তীক্ষ্ণভাবে ঝলমলায়; কাঁঠাল-আম গাছের আড়ালে ঢাকা সূর্য পাতার ফাঁকে ফাঁকে রোদ-ছায়ার চঞ্চলতা রচনা করে বিস্তৃত উঠোনে। গাছে গাছে পাখি-পাখালির হিসাবনিকাশ, নীল আকাশের গায়ে সারবাঁধা বকের অভিযান আর গাঙ শালিখের কচিৎ সরবতা যেন কলরব করে জানায় সন্ধ্যার আগমনী। তখনো আজাহারের কোনো সংবাদ নেই।

সন্ধ্যাও পার হয়ে গভীর রাতে সারাদেশ নিথর হয়ে আসে; জমিলার চোখে ঘুম আসে না। খাল পাড়ে বা বাইরে সামান্য একটু শব্দ হলেও সে চমকে উঠছে—ঐ বুঝি এলো। চকিতে বিছানা ছেড়ে দাওয়ায় নেমে সেদিকে কিছু দেখতেও চেষ্টা করে; কিন্তু কখনো সেদিককার নিশিচ্ছন্দ অন্ধকার আর নীরবতা ভেঙে আজাহারের লম্বা শীর্ণ দেহাবয়ব বেরিয়ে আসতে দেখা যায় না। জমিলা আবার বিছানায় এসে বসে। রাত বাড়ে, ক্ষীণ একটু চাঁদ আকাশের ওপাশ থেকে যাত্রা শুরু করে।

বিলের বুক থেকে একটা ঘুম-পাড়ানো হাওয়া অনেক পাতা ঝরার শব্দ তুলে বাড়ির ওপর দিয়ে বয়ে যায়। জমিলা পরিষ্কার শোনে খালপাড়ে কার নৌকার শিকলের শব্দ। তাড়াতাড়ি সে দাওয়ায় নামে। ঘরে একফোঁটা তেল ছিলোনা যে কুপিটা জ্বালবে। আবছা আলোয় খালপাড়ে যাবার সংকীর্ণ পথটুকু দেখা গেলেও অনেকক্ষণ অপেক্ষা করে জমিলা সেপথে কাউকে দেখে না। ভাবে, হয়তো এখনো রাগ পড়েনি আজাহারের। তার ছেলমানুষী অভিমান তাকেই সাধাসাধি করে ভাঙতে হবে। সেজগুই সে নৌকো ছেড়ে উঠছে না হয়তো। দাওয়া

থেকে নেমে সে খালপাড়ে এগিয়ে গেল, কিন্তু কোথায় নৌকা !
শ্রোতোমান খালে উপরের গাছের পাতার ফাঁকে ঝিলিমিলি চাঁদের
ছায়া যতোটুকু স্থান স্পষ্ট করে তুলেছে, তার কোনোখানেই কোনো
নৌকোর চিহ্ন নেই। ভাঙামনে সে আম গাছটার সঙ্গে ঠেস দিয়ে
দাঁড়ায়। মাথাটা যেন কেমন ফাঁকা হয়ে গেছে তার, মনে হচ্ছে হয়তো
বা সে ঘুরেই পড়ে যাবে।

দূর বিলের ওধারের জঙ্গলে কতোগুলি নিশাচর পাখি ডাকে, সারা
বাতাস অবাধে তাদের কলরব ছড়ায়। সালেহাদের বাড়ির বাদামগাছে
অজস্র বাতুড় ডানা ঝটপটায়। আশে পাশে কোথাও ডাকে ডাহুক।
কেমন একটা ব্যাকুল শূন্যতায় জমিলা অস্থির হয়ে ওঠে। বিলের
ওপারের জঙ্গলে একপাল শেয়াল ডেকে ওঠে ; সরসর করে কী একটা
চলে যায় নিচে কেয়াবনের ঝোপে, গা হুমহুম করে ওঠে জমিলার।
আস্তে আস্তে সে ঘরে চলে আসে।

ভোরে বড়ো ছেলেকে পাঠিয়ে দিলো নলছিটি হাটে ; আজাহার হয়তো
বা গেছে গঞ্জের ঘাটে। কিন্তু সেখানেও নাকি সে নেই, ঘাটমাঝিও
কোনো খবর জানে না তার।

সেদিনের ছপুর্ গড়িয়ে গেল, তখন পর্যন্ত ফিরে এলো না আজাহার, না
পাওয়া গেল তার কোনো খবর। জমিলার উদ্বেগ বিরক্তি আর রাগের
রূপ নিল এবার। এতো রাগও করে মানুষ !

দেহ একে ক্ষুধায় নির্জীব, তার ওপর আজাহারের জন্ম এই হুঁচিন্তা,
জমিলা সত্যি সত্যি খুব ক্ষুব্ধ হয়ে ওঠে আজাহারের ওপর। তবু খালের
দিকে চেয়ে একটা ছায়াশীতল গাব গাছের তলায় সে বসে রইলো।
কিন্তু কোথায় কে।

সহসা একসময় তার সারা গা শির শির করে উঠলো দুর্নিরোধ্য শীতে।
বুঝতে পারে জমিলা সারা গা কাঁপিয়ে জ্বর এসেছে তার। অঁচলটা
ভালো করে গায়ে জড়িয়ে নেবার সাধ্যও যেন তার নেই। হাতে ভর
দিয়ে কোনোমতে উঠে সে আর একবার তাকালো খালের প্রান্তে।
এবার ঘরে গিয়ে বিছানায় শুয়ে পড়তেই হবে তাকে। হায় খোদা!
আজাহারকে তুমি এনে দাও, আমি তার পায়ে ধরে মাফ চাইব। তার
অভিমানী মন আঘাত পায় এমন কথা আর কোনোদিন বলবো
না।

কিন্তু সে পরিচিত নৌকোখানা বিপরীত দিক দিয়ে কখন যে এতো কাছে
এসে পড়েছে, জমিলা সহসা তা দেখেনি। দেখতেই তার সারা শরীরে
বাঁধভাঙা জোয়ারের মতো উল্লাস ছড়িয়ে পড়লো। খোদা শুনেছে তার
প্রার্থনা!

কিন্তু ওকী? তাদের নৌকো করিম মাঝি বাইছে কেন? আর নৌকোর
মাঝে থরে থরে সাজানো ভালো ভালো সওদা, কিন্তু ওপাশে শোয়ানো
রয়েছে কে? আজাহারের অস্থখ কি তাহলে খুবই বেড়েছে? কিন্তু অমন
বিদ্যুটে ভাবেই বা সে শোয়ানো রয়েছে কেন? করিম মাঝি চোখ
ফিরিয়ে লুকোতে চাইছে কী?

করিম মাঝি তার কোনো প্রশ্নের জবাব না দিয়ে আগে নৌকাটা বাঁধলো,
পরে নত মুখে বললে: আর কী জিগাও তাবিছাব, ম্যাভাই আর
নাই। চামটা যাইয়া দেখি অধেক সাজানইয়া কলকি হাতে নায়ের
মধ্যে মরইয়া পড়ইয়া রইছে।

জমিলার আত্ননাদে ওবাড়ির সালেহাও অপর পাড়ে দৌড়ে এলো।
ছোটো ছেলেটা উকি দিয়ে বাবার নৌকো দেখেই আবার ঘরে

ছুটলো—ওষুধটা দিয়ে তার বাবাকে খুশি করে দেবে অল্প ভাইয়ের
আগে ।

জমিলা হঠাৎ চিৎকার করে উঠে আবার থেমে গিয়েছিলো । রাগ
করেনি আজাহার, পিতৃত্বের কর্তব্য করেছে তার—জনকের দায়িত্ব । তার
মৃতদেহের আশে পাশেই রয়েছে চাল, ডাল এবং আরো নানা সওদা ।
আর আশ্চর্য, চালের সাজিটার উপর কচি কচি ছুটি শশাও !

পোষ

এই পৌষের প্রতীক্ষায় তাজু অধীর হইয়া উঠিয়াছিল।

চাষী জীবনের সেরা সময় পৌষমাস ; বৃকে আসে অনেক শ্বাস, পায় অনেক আশাপূরণের আশ্বাস। কিন্তু সে সব মিথ্যা হইয়া যাইতেও সময় লাগে না। তাহার বেলায়ও ইহার ব্যতিক্রম ঘটিল না।

কার্তিক হইতে তাজু তাহার সর্বাপেক্ষা আগে বোনা জমিখানার আশে পাশে ঘুরিয়া সবুজ চারাকে রঙ বদলাইয়া কুঁড়িময় হইয়া উঠিতে দেখিয়াছে ; কখনো বা আলগোছে দুই একটি ধান ছিঁড়িয়া পাকিল কিনা পরীক্ষা করিয়াছে ; পাশে বসিয়া কল্লনায় বুনিয়াছে মন্থস্তরোস্তর জীবনকে পুনঃপ্রতিষ্ঠার স্বপ্নজাল। অবশেষে তাহার দীর্ঘপ্রতীক্ষার অবসান করিয়া সেই ধান পাকিয়াছে। ছুভিক্ষের বৎসর হইতে দিনগুলি দুঃস্বপ্নময় রাত্রিপ্রহরের মতো কাটিতেছে, তবু পাঁচকুড়া জমির সোনালি ভারে অবনত গুচ্ছগুলির দিকে চাহিয়া তাহার বিষণ্ণ বুক কী এক আশ্বাসে ভরিয়া উঠিল। এই ধানে দুর্দিনের খাওয়া-পরা কতোদিন চলিবে, সেসব হুর্ভাবনায় আপাতত মন ভারাক্রান্ত না করিয়া কতোগুলি বিশেষ প্রয়োজন মিটাইবার জন্ত সে এককুড়া জমির ধান কাটিয়া ঘরে আনিয়াছিল। কিন্তু সেই ধান মাড়াই করিয়া, মাপিয়া পরিমাণ দেখিয়া তাহার সারা মনে ছুশ্চিন্তা ছাইয়া আসিল। এইরকম ফসলে দুঃখরাত্রি কাটাইয়া উঠিবার আশা কোথায় ?

গ্রামের সমবায় কৃষিক্ষণ সমিতির কর্জ টাকায় মা-ছেলে এতোদিন

ফ্যান-ভাত খাইয়া কাটাইয়া আসিয়াছে। সে টাকা শোধ দিতেই হইবে। তাহা ছাড়া গত কার্তিকে হলধর চক্রবর্তীর নিকট হইতে তিরিশটি টাকা ধার করিয়াছিল, গত পৌষে তাহার বারংবার তাগাদা সত্ত্বেও তাহা শোধ করিতে পারে নাই; এবারও এই ধান উঠিবার বহু পূর্ব হইতেই তিনি স্মদে আসলে চল্লিশটি টাকার কথা তাহাকে স্মরণ করাইয়া আসিতেছেন; তাঁহার সে টাকা শোধ না করিয়া উপায় নাই। নহিলে যে-মানুষ হলধর চক্রবর্তী, কোনদিক দিয়া কোন পঁয়চ কষিয়া অধিকতর এক বিপদে ফেলিবে, তাহা ভালো করিয়া খেয়ালও করিতে পারিবে না। অথচ এদিকে কাপড় জামারও দরকার, বিশেষ করিয়া যাহার জুই তাহার ধান পাকিবার তর সহিতেছিল না।

কিন্তু এখন কেমন করিয়া কি করিবে ভাবিয়া তাজু দিশাহারা হইয়া গেল। মাপা ধানের সাজিগুলি ঘরে তুলিয়া রাখিয়া সে চাচার ঘরের চুলাশালে গিয়া বসিল।

তাহার মা, চাচী এবং তাহার দুই মেয়ে রিজিয়া ও সেতারা তখন রোজকার মতো উনুন ঘিরিয়া বসিয়া গল্প করিতেছে। উনুনে ধানের হাঁড়ি; মুখের কাছে বসিয়া চাচী মাঝে মাঝে কুটা ঠেলিয়া দিতেছেন। আগুনের লালচে আভায় অন্ধকারে সকলের মুখ মাঝে মাঝে উজ্জ্বল হইয়া উঠিতেছিল।

তাজু কিছু কুটা টানিয়া একপাশে বসিয়া খানিকক্ষণ তাহাদের গল্প শুনিল। মায়ের দিকে তাকাইয়া দেখিল, মাত্র কাপড়ের ছেঁড়া খুঁটখানা দিয়া তিনি বসিয়া গল্প শুনিতেন।

: এখনো ঘুমাইতে যাও নাই তুমি? যা শীত! আমাদের হাত-পা

ঠক্ ঠক্ করতে আছে, আর তুমি—ওঠো, ওঠো, ঠাণ্ডা লাগইয়া শেষটায় অম্মখে পড়বা।—একরকম জোর করিয়াই তাজু তাঁহাকে ঘুমাইতে পাঠাইয়া দিল।

রিজিয়া কৃত্রিম কোপকণ্ঠে কহিল : মায়ের জন্ত এতো দরদ, একটা কোর্তা কিনইয়া দিলেই পারে।

: পারলাম কই এতোদিন, এবার দিমুই দেখো। তোমার গায়ের ঐ কোর্তার চাইতেও সুন্দর কোর্তা আনমু।

তাহার কৌতুককণ্ঠে শুনিয়া চাচার মুখে হাসি দেখা দিল। রিজিয়া অপ্রস্তুত মুখে কহিল : আমার কোর্তাটা আবার সুন্দর নাকি ? বলিয়া মায়ের দিকে ফিরিয়া তাড়া দিল : বলো না মা, আর একটা গল্প।

তাজু টের পাইল, অসন্তুষ্ট হইয়াছে রিজিয়া ; সেতারাও তাহার পায়ে চিমটি কাটিয়া সেই ইঙ্গিত করিল। ফুল আঁকা ঐ কোর্তাটির জন্ত রিজিয়ার গর্বের অন্ত নাই। শখ করিয়া কিনাইয়াছে।

খানিকক্ষণ তাহাকে পর্যবেক্ষণ করিয়া তাজু হাসিয়া উঠিল : রাগ করলা রিজিয়া ? পাগল ! তোমার ও কোর্তাটিকে খারাপ বলি নাই। সতিহি তোমার গায়ে ওটি চমৎকার মানাইছে।

একথায় রিজিয়া যে আবার খুশি হইয়া উঠিয়াছে তাহা তাহার বাঁকা কটাক্ষেই তাজু বুঝিতে পারিল। সেতারা ছেলেমানুষ। সেও এবার প্রত্যাশী মুখে জিজ্ঞাসা করিল : আর আমার কোর্তাটি ?

কিন্তু তাজু এক ফুৎকারে তাহার সব উৎসাহ যেন নির্বাপিত করিয়া দিল : দূর ! রিজিয়ারটি কতো সুন্দর !

সেতারা চটিয়া গেল : হু, বুবুর কোর্তাটিকে তুমি তো ভালো বলবাই !

তারপরে এসেছে এই আকাল। চাল নেই, ডাল নেই। কোথাও আছেও বা যদি, কেনবার নেই কড়ি। স্ততরাং উপোস করে চেরাগ আলির মনে হতো সে অনাহারে বেঁচে নেই আর, বরং তার স্থলে তারই কোনো প্রেতাশ্মা চারিদিকের ছুর্যোগের ঝাপটা নিয়ে স্থির হয়ে পড়ে আছে। তারই মাঝে যখন অনাহার অথবা কোনো তুচ্ছাতিতুচ্ছ কারণ উপলক্ষ্য করে জয়তুন তার সঙ্গে ঝগড়া বাধাতো, যখন কোনো অভিযোগ করতো তার বিরুদ্ধে, চেরাগ আলির জীবন তখন আরো অতিষ্ঠ বলে মনে হতো।

কখনো বা হঠাৎ যেতো বউকে এলোপাখাড়ি মারতে। হাউমাউ কান্না আর বীভৎস চিৎকারে পাড়াপড়শীরা ছুটে এসে দেখতো, রণরঞ্জিনী জয়তুন চেলাকার্ট দিয়েই বেদম পিটেছে দুর্বল নিরীহ চেরাগ আলিকে। সেই চেরাগ আলিকে পাড়াপড়শীরা কোনো রকমে তার কবল থেকে উদ্ধার করার পর কেবলই সে প্রতিজ্ঞা করতো—এবার জীবনের ও অভিশাপকে সে ঝেঁটিয়ে দূর করে দেবেই।

কিন্তু তালাকের কথা শুনেই জয়তুনের পা ছড়িয়ে বসে সে কী কান্না শুরু! চেরাগ আলি মায়ায় পড়ে কখন যে আবার প্রতিজ্ঞা ভুলতো তা নিজেরও খেয়াল থাকতো না।

গত সনে ছেলে হোলো একটা। তাকে কোলে করে পাগলামিটা অনেকখানি কমে এসেছিলো। একটু স্বাভাবিক হয়ে এসেছিলো চালচলন কথাবার্তা। ছেলে কোলে নিয়ে যখন ছড়া কেটে আদর করতো, চেরাগ আলি মুগ্ধমনে কাছে গেলে বলে উঠতো : কাজ নেই তোমার আদরে। শখ করইয়া ছেলের বাপ হইছো। বাছারে আমার কী কী দিয়া সাজাইলা বল দেখি ?

চেরাগের মুখ দেখাতো অঙ্ককার। চেয়ে দেখতো ছেলের গায়ে বড়োবাড়ি থেকে চেয়ে আনা একটা তালিদেওয়া পুরানো জামা। বার্লি নেই, ময়দা নেই, ক্ষুদের ভাত দলা করে খাওয়ায় জয়তুন, অথবা কারো কাছ থেকে চেয়ে আনা একটু পালো।

জয়তুন ছুঁছুঁমির চোখে চেয়ে বলতো : রাগ হইলে বুঝি ?

তারপর কাছে এসে ছেলেকে তার কোলে ঠেলে দিতো। আর হঠাৎ গলা জড়িয়ে চুমু খেয়ে ফিক করে হেসে ফেলতো : দোহাই তোমার, মস্করা করছি, রাগ করইও না।

কিন্তু মাসতিনেক আগে সেই ছেলে মারা যাবার পর থেকে জয়তুনের আবার যেই সেই অবস্থা। সময় সময় তার হাসিকান্না, গালাগালি, ঝাপট-দাপট দেখে মনে হতো এবারে সে বন্ধ উন্মাদ।

গতকাল বাড়ি ফিরতেই, জয়তুন ঝাঁটা হাতে তাকে তেড়ে এলো : হারামজাদা আমার ছেলে লইয়া আয়।

সারাদিন ঘুরে ঘুরে কারো দোরে এককণা সাহায্য পায়নি চেরাগ আলি, ক্ষুধায় মাথা ঝিম ঝিম করছে। রোগা মানুষ বলে কোনো কাজেও লাগায় না কেউ। ক্লান্ত শ্রান্ত হয়ে বাড়ি ফেরার পথে ভাবছিলো—কতজনের স্ত্রীও তো এর ওর বাড়িতে কাজ করে করে সংসার চালাচ্ছে, আর তার বেলা এ কী অভিশাপ ! ..

ঠিক সেইকালে জয়তুনের এই আক্রমণের জ্ঞাত প্রস্তুত ছিলো না চেরাগ আলি। কিছুদিন থেকে নতুন এক উপসর্গ দেখা দিয়েছে—জয়তুন মনে করে তার ছেলের মৃত্যুর জ্ঞাত চেরাগ আলি দায়ী।

সে কাছে এগোতেই তাকে ঝাঁ করে এক চড় কশিরে হাতিন্নায় উঠে বসে পড়েছিলো চেরাগ আলি।

জয়তুন ভেউ ভেউ করে কেঁদে উঠেছিলো। উঠনে দাঁড়িয়েই তাকে উদ্দেশ্য করে শুরু করেছিলো অশ্রাব্য গালাগালি। তারপর ছোঁড়ে টিল।

চেরাগ আলি তখন তামাকের জন্তু ডিবে হাতড়াচ্ছিলো। একটা টিল গায়ে লাগতেই খানিকক্ষণ থমকে ব্যথা সম্বরণ করে ডিবেটা সে তার দিকে ছুঁড়ে দিয়েছিলো। সেটা লাগলো গিয়ে জয়তুনের কপালে, সঙ্গে সঙ্গে বেদনায় বসে পড়লো জয়তুন।

চেরাগ আলি হাতিনা থেকে নেমে বাড়ি থেকে বেরিয়ে গেল। খানিকক্ষণ একটা ভিটায় গুম হয়ে বসে বসে অনেক ভেবেচিন্তে অবশেষে মনস্থির করে একেবারে সোজা চৈতন দাসের কাছে গিয়ে উপস্থিত হোলো।

অথচ সেদিন ছুপুরেই সে চৈতনের লোভনীয় প্রস্তাব প্রত্যাখ্যান করে এসেছিলো।

: কথা কইছ না যে! কথা দিছো, আগাম চাউল নেছো, আর এখন টালবাহানা?

চেরাগ আলি তথাপি নিরুত্তর।

চৈতন কণ্ঠস্বর একটু নরম করে আরেকটা অস্ত্র প্রয়োগ করে : বুঝি, একটা বিড়াল পুষলেও তার উপর মানুষের মায়া পড়ে। কিন্তু না খাইয়া মরতে বসলে ওসব দয়ামায়ার মূল্য কী ভাই? স্নেহেচ্ছন্দে নিজের বাঁচইয়া থাকাটাই বড়ো কথা। তবে যা তোমার বউ, ওর চেয়ে একটা বেড়াল পুষেও শান্তি। নাও নাও, এই আরো দশটা টাকা না হয় রাখ। তারপর ছেলেমানুষী না করইয়া তুলইয়া দেও, শহরে

শাহেরবাহু

বেশ ভালোভাবেই রাখবো, ইচ্ছে করলে তুমিও গিয়ে যখন তখন দেখে আসতে পারবা। এদিকে ভোর যে হইয়া আইল, তুলইয়া দেবা তো দেও এই বেলা, নয়তো আমি চলইয়া গেলে কিন্তু আবার তোমাকে পস্তাইতে হইবে। এই ধরো টাকা।

চেরাগ আলি একটা দীর্ঘশ্বাস টেনে যন্ত্রচালিতের মতো ফিসফিসিয়ে বললে : আচ্ছা, আপনি যান নৌকোর কাছে, আমি লইয়া আসছি। নইলে আপনারে দেখইয়া আবার বেইক্যা বসতে পারে।

চৈতন অন্ধকারের মধ্যে তীক্ষ্ণ দৃষ্টিতে তার দিকে একবার তাকিয়ে, পরে আশ্বস্ত হয়ে নিচে নেমে গেল।

দম না দিলে কাজ করবে না হাড়ের যন্ত্রটা। কাছাকাছি থাকতে হবে। ইস, মেয়েটাকে দেখে অবধি তার মনে স্মৃতি ছিলো না। যন্ত্র চালাবার চাবিটি হাতে পেয়ে এতোদিন পরে উৎফুল্ল হয়ে উঠছে চৈতন। যে যন্ত্রই হোক, চাবি ঠিক থাকলে কাজ করবেই।

টাকাগুলি গুনে গুনে কোঁচড়ে গুঁজে রাখে চেরাগ আলি। তারপর ঠেলে জাগায় জয়তুনকে : শুনছো ?

জয়তুন চোখ রগড়ে ঘাড় ফিরিয়ে তাকায় : কী ?

চেরাগ আলিকে দেখে তার মুখ পানে চেয়ে অগ্রসর হয়ে ওঠে।

: এখন আবার আদর করতে আইছো বুঝি ?

আদর করার কারণ আন্দাজ করে সে এমন একটা অশ্লীল উক্তি করে ওঠে যে, চেরাগ আলিও তার সামনে লজ্জায় গুয়ে পড়ে।

: না, তা নয়। ছেলের কাছে যাবা ? গ্যাদারে পাইছি।

: কোথায় ?—খড়ফড়িয়ে উঠে বসে জয়তুন। চোখে তার সংশয় না আনন্দ ঠিক বোঝা যায় না।

চেরাগ আলি বলে : শহরে। দেখতে চাও যদি, তোমাকে এখুনি নৌকা করইয়া রওনা হইতে হইবে !

জয়তুন কেঁদে ফেলে : পাওয়া গেছে গ্যাদারে, আমার গ্যাদারে ?

: আঃ, কেঁদো না। যাবা তো চল।

কান্না থামিয়ে তৎক্ষণাৎ ব্যস্ত হয়ে ওঠে জয়তুন। অসংবৃত বেশ বিচ্যস্ত করতে যেয়ে আরো অগোছাল করে ফেলে। বাইরে পা দিয়েই বলে ওঠে : কিন্তু ওগো, কেমন করইয়া যাব ? ঘরছয়ার এই মতো থাকবে ?

: হ্যাঁ হ্যাঁ, তা থাউক। দেৱী করলে হয়তো—কী বলতে চেয়ে কথা খুঁজে পায় না চেরাগ আলি।

: দেৱি করলে আর তারে পাব না ? ওগো, আমার কী হইবে গো !

চেরাগ আলি শশব্যস্ত হয়ে দাঁড়িয়ে পড়ে : আঃ থামো, চুপ করো, চুপ করো, কাঁদলে আর তোমারে নিয়া যাব না।

জয়তুন চুপ করে তখন, কিন্তু কয়েক পা গিয়েই আবার হঠাৎ বাড়ির দিকে ছোটে : গ্যাদার বুনবুনিটা লইয়া আসি। সেই যে কিনইয়া দিছিলাম, মনে নাই তোমার ?

চেরাগ আলি অপেক্ষা করে। চৈতন দাস ক্ষেপে চলে না যায় আবার। অনেকক্ষণ বাদে জয়তুন ফিরে আসে। শুধু বুনবুনিটাই নয়, গ্যাদার স্মৃতি-মাখা আরো অনেক জিনিস সে গাঁটরি বেঁধে নিয়ে এসেছে—পুরোনো কাঁথা, ছোটো বালিসটা, জামা।

তার অজস্র প্রশ্নের, বহুবিধ খেয়ালের উত্তর দিতে দিতে শ্রান্ত হয়ে

শাহেরবাহু

চেরাগ আলি ঘাটে পৌঁছালো। ইঙ্গিত করে মাঝিকে নৌকো কাছে আনতে বলে।

কিন্তু তখন ভাঁটার টান। জল গেছে নেমে। নৌকো পাড়ে আনা সম্ভব হয় না। অগত্যা চেরাগ আলিকেই জয়তুনকে পাঁজা কোলা করে তুলতে হোলো।

ঃ চলো তোমারে উঠাইয়া দি।

টাল সামলে জয়তুন তার গলা জড়িয়ে বলে উঠলো : কেন, তুমি যাবা না ?

ঃ না, আমি—আমি কাইল যাব ? ঘর ছয়ার গুছাইয়া আসতে হইবেনা ?

ঃ ওমা ! তা কী হয় ! আমি তাইলে কার সঙ্গে যাব ? তবে কাইলই না হয় আমিও—

ঃ না, না, দাসমশায় শহরে যাইতে আছেন, তার সঙ্গেই তুমি যাবা। তিনিই তো গ্যাদার সংবাদ লইয়া আসছেন। লক্ষ্মিটি, কোনো ভয় নাই তোমার।

ঃ কই, দাসমশায় কোথায় ?

মাঝি লগি কাদায় ঠেলে বললে : তিনি নৌকোর মধ্যেই বসইয়া আছেন।

চৈতন দাস ছইয়ের বাইরে দেখা দেয় : এইয়ে আমি। আসো, কোনো ভয় নাই তোমার।

ঃ গ্যাদা ভালো আছেতো, দাসমশায় ?

ঃ হ্যাঁ হ্যাঁ, খুব ভালো। তোমারে কেবল দেখতে চায়, তাইতো তোমারে নিতে আসছি।

ঃ তাইলে আগে বুঝি আমারে ফাঁকি দিয়া তোমরা আমার কাছ

থেকইয়া তারে সরাইয়া নিছিল। তাইতো ভাবি—পাটাতনের উপর নামিয়ে দিতেই দাসমশায়ের হাত ধরে হিহি করে হেসে উঠল জয়তুন :
গ্যাদার কাছে যামু। চলো মাঝি চলো।

তারপর হঠাৎ চেরাগ আলিকে তার দিকে তাকিয়ে থাকতে দেখে জিগ্যেস করে : ও কী ! তুমি অমন করইয়া চাইয়া আছো যে ! তুমি আসবা তো কাইল ?

তবু চেরাগ আলি জবাব দেয় না দেখে সে দাসমশায়ের একখানা হাত ধরে আবদারের গলায় বলে ওঠে : ও দাসমশায়, তুমি একটু কইয়া দেও না ! : হ্যাঁ হ্যাঁ, ও কাইল আসবে। তুমি যাও হাওলাদার, ঘর খালি রইছে। চৈতন চেরাগ আলিকে ঘরে যেতে ইঙ্গিত করে। জয়তুনের গায়ের স্পর্শে তার সারাদেহ রোমাঞ্চিত হয়ে উঠেছে ; সে যেন আর দেরি করতে পারছিলো না।

: কাইল আসবা তো তুমি ?

: হ্যাঁ।—চোখ নামিয়ে কথাটি যেন অতি কষ্টেই উচ্চারণ ক'রে চেরাগ আলি তাড়াতাড়ি পাড়ে উঠে যায়।

জয়তুন কাঁপাস্বরে পিছু ডেকে বলে : আইসো কিন্তু কাইল। কে রাইক্ষ্যা দেবে, কী করবে ভাবি। ভালো কথা, হাঁড়িতে পাস্তাভাত ঢাকা দেওয়া আছে, সকালে খাইও।

তারপরেই আবার হি হি করে হেসে ওঠে : কী সর্বনাশ। কথাই এতোদিন ভাবছি।—চৈতনের গায়ে ঝুঁকে কানের কাছে মুখ নিয়ে চোখ বড়ো বড়ো করে ফিসফিসিয়ে বলে : জানেন দাসমশায়, ভাবছিলাম গ্যাদা মরইয়া গেছে। কী অলক্ষুণে ভাবনা, না ?—বলে হিহি করে হেসে চৈতনের গায়ে আরো ঢলে পড়ে।

চৈতন কাঁপাগলায় মাঝিকে আদেশ করে : তাড়াতাড়ি বাও হে ! এসো জয়তুন, তুমি ছইয়ের মধ্যে এসো । এতো কথা বোলো না, চুপটি করে ছইয়ের মধ্যে বসো, না হইলে কিন্তু আমি নিয়া যাবো না ।

জয়তুন নিরীহভাবে ছইয়ের মধ্যে ঢোকে । আর দেখা যায় না তাকে । মন দুর্বল করে লাভ নেই । জীবনের যা অভিশাপ নির্দয়চিত্তে তাকে বর্জন করাই বুদ্ধিমানের কাজ । কোচড়ের টাকাগুলির উপর হাত বুলিয়ে বারে বারে তবু পেছনে না তাকিয়ে পারে না চেরাগ আলি ।

অন্ধকারে আর কিছু দেখা যায় না । থাক, এবারে মিলেছে মুক্তি । মিলেছে নিঃস্বতা থেকে প্রাচুর্যে যাবার পথ । হুর্ভাগ্যকে দমনের পুঁজি ।

ভোর হতে তখনো কিছুটা দেরি আছে । ঘরে ফিরে খানিকক্ষণ নিজের স্তব্ধতায় নিজেই অস্থির হয় চেরাগ আলি । বাতির আলোয় টাকাগুলো গুনে একটা বাঁশের চোঙে পুরে ফেলে চালে গুঁজে রাখে । তারপর তামাকের ডিবেটা খুঁজতে খুঁজতে ভাবে, কাল সকালে যারা বাড়ির নিস্তব্ধতা দেখে জয়তুনের খোঁজ করবে তাদের জবাব দেবে কী ! নিত্যকার মতো সকালে ঘাটে যাবে না, পড়শীদের সঙ্গে কোন্দল করবে না, যখন তখন অকারণে তার হাসিকান্নার শব্দ শোনা যাবে না—সবাই অবাক হবে না কি !

হুর্ভাবনা থেকে বাঁচবে ভেবেছে চেরাগ আলি । কিন্তু সত্যি বলতে কি কেমন যেন সব ফাঁকা ফাঁকা লাগছে তার । অস্থির হাতে ডিবেটা খুঁজে খুঁজে কোথাও পায় না ।

হঠাৎ মনে পড়ে কালকের ঘটনাটা । হয়তো এখনো উঠেনেই সেটা ।

কপালটা ফুলে উঠেছিল জয়তুনের। খুব লেগেছিল নিশ্চয়। নইলে ঐভাবে বসে পড়ে! ফাটেনি যে তাই বাঁচোয়া। কিন্তু ওর হাতের টিলে তার বুকেই বা কম লেগেছে কি? তবু—

সেদিকে গিয়ে ডিবেটা কুড়িয়ে তলাটা চেঁচে খানিকটা তামাক খেলে। চৈতনের সেই দেশলাইটা কোমরেই ছিল, ফেরৎ দেওয়া হয়নি আর। বাতি জ্বলে জয়তুনকে না দেখেই মনটা হঠাৎ কেমন করে উঠছিলো। কাল সমস্ত রাত রাগারাগির মাথায় আরো অনেক দিনের মতো বিছানার ছদিকে গুয়ে রইলো তুজন। কিন্তু কখন যে জয়তুন তার গলায় হাত রেখে খানিকটা সরে এসেছিলো.....

বিছানার বালিশে এখনো তার দেহের ছাপ। ঐ কাঁথাটা সরিয়ে আলু-থালু ভাবে আধো সংশয়, আধো আগ্রহে সে উঠে দাঁড়িয়েছিলো..... তারও একটু আগে যে কথাটা উচ্চারণ করেছিলো!.....লজ্জাসংকোচের কোনো বালাই নেই তার!... বিয়ের পর আদর করলে ভয় পেতো.....কাঁদতো.....মিনতি করতো.....তার পর ছেলে হবার পর থেকে আর সে সব রইলো না.....কখন যে তার লজ্জা, আর কখন যে কী!

কিন্তু ভোর হয়ে গেছে প্রায়। জয়তুন বলেছে পাস্তাভাত আছে। তামাক খাবার আগে খেয়ে নিলে মন্দ হয় না।

রান্নাঘরে থরে থরে হাঁড়িপাতিল সাজানো। অনেকদিন পরে কাল সেগুলোর শূণ্য উদর ভরেছিলো। প্রথমে তো জয়তুন রাঁধবেই না। অবশেষে চেরাগ আলি নিজেই রাঁধতে গিয়ে হাত পুড়িয়ে রেগেমেগে হাঁড়িকুড়ি ফেলে চাল চিবুতে বসেছিলো।

জয়তুনেরও পেটে তখন ক্ষুধা, মুখেই না লাজ। খানিক পরে নিজেরই
উঠে চালের পুঁটলিটা নিয়ে রাঁধতে গিয়েছিলো।

সরা সরিয়ে চেরাগ আলি দেখে বেশ কিছু আছে পাস্তাভাত।

পিঁড়ি পেতে বাসনে ভাত বেড়ে নিলো চেরাগ আলি। কিন্তু খাবে কি
দিয়ে? লক্ষা খুঁজতে গিয়ে মনে পড়ে জয়তুনের নিজের হাতে লাগানো
উঠানের কামরাজা ঝাল গাছের কথা। তারই একটা ছিঁড়ে এনে ভাত
মেখে নেয়।

খেতে খেতে বড়ো শান্ত আর নিরুপদ্রব মনে হোলো নিজেকে।
অনেক স্বাধীন। এতো শান্তিতে খাওয়া জোটেনি বহু দিন। অগ্ন সময়,
হয়তো বহু কষ্টে জোগাড় করে আনা ভাত খেতে খেতে হরেক রকম
অভিযোগ গঞ্জন শুনতে হতো তাকে, অথবা তটস্থ হয়ে থাকতে
হতো ওর কোনো পাগলাটে আচরণের ভয়ে।...তাছাড়া আরাম করে
পেটপুরে এতো খাওয়া...আঃ! চেরাগ আলি আস্তে আস্তে আরাম
করে খায়। কিন্তু, উঃ যা শীত! হাত পা যেন ঠকঠক করে কাঁপে।
এতোক্ষণ খেয়াল হয়নি, এইবার মনে পড়ে জয়তুনকে নৌকায় তুলে
দিয়ে কাদা ধুয়ে পাড়ে ওঠার সময় ঠাণ্ডায় তার হাত পা যেন জমে
যাচ্ছিলো। দাঁতে দাঁতে ঠকঠকানি।...জয়তুনের দেহে আঁচল ছাড়া
একটা জামাও নেই!

হঠাৎ বিষম খায় চেরাগ আলি। কে মনে করলো, জয়তুন? হবেও বা।
কয়েক গ্রাস খেয়ে আর মুখে রোচে না। পাতের ভাতগুলো দেবার জন্য
উঠানের কুকুরটাকে ডাকে। কিন্তু সেটাও যেন কোথায় ভেগেছে।
এলে দেওয়া যাবে মনে করে ভাত শুদ্ধ বাসনটা ঢেকে হাত-মুখ ধুয়ে
উঠে এলো চেরাগ আলি।

চোখে পড়ে জয়তুনের পানের থালাটা। পান নেই, সুপুরি নেই। সুপুরি যেন অগ্নি কোথায় রাখতো জয়তুন। এদিক ওদিক সে খোঁজে। সারা ঘরখানাই তার চোখে যেন নোতুন লাগে। পাগল হলে কি হবে, কোথাও এতোটুকু অপরিচ্ছন্নতা রাখেনি জয়তুন। সব দিক সুন্দর করে সাজানো গোছানো। তার নিজের হাতে সেলাই করা কাঁথাগুলো ভাঁজে ভাঁজে আড়ায় ঝুলানো। তার পাশে ঝুলছে কয়েকটা ছোট হাঁড়ি। তার একটার মধ্যে কবেকার ক্ষয়ে যাওয়া কয়েকটা পুরনো বাতাস। আর একটায় ভেঁড়া পুঁতির মালা। শখ করে হয়তো চেরাগ আলি তাকে কিনে দিয়েছিলো কোনো দিন। কোনোটা য় নানান হাবিজাবি—লোহালকড়, ঝিনুক, বোতাম, কত কী! কয়েকটা তাগাভেঁড়া তাবিজ—কতো জায়গা থেকে কতো ফকিরের কাছ থেকে এনে দিয়েছিলো জয়তুনকে। ঝগড়া বাধলেই রাগ করে খুলে রেখে দিতো।

তার ওপাশে একটা কাঁচের শিশিতে কালো কালো সরু আমের আচার। মাথা খারাপ না হলে যে কোনো মেয়ের ঈর্ষার বস্তু হতো জয়তুন। শূন্য মটকীটার উপর থেকে শ্রাকড়ার গাঁটরিটা সরাতেই সরার উপর সুপুরি মিললো।

তারপর হুকো হাতে নিয়েও মাথায় নানা ভাবনা ভিড় করে আসে। জয়তুনও তামাক খেতো। ব্যাটাছেলের মতোই।...এই হুকোয়। চেরাগ আলি সেই একই জায়গায় মুখ রেখে টানছে...ভাবতে ভাবতে টানগুলো কেমন নিস্তেজ হয়ে আসে। টানতে আর ভালো লাগে না। শরীরটাও কেমন ঝিম ঝিম করে।

হুকোটা রেখে কাঁথা জড়িয়ে শীতে গুটিগুটি দিয়ে বিছানায় এসে

শোয়। ভোর হয়ে গেছে। ধীরে ধীরে ঝলমলে রোদ ওঠে আকাশে।
কেমন আলসে মনে হয়।

জয়তুনের মাথার ছাপটা বালিশে এখনো স্পষ্ট। নায়েবের খাজনাটা
দিয়ে আসতে হবে। বাড়ি ছেড়ে দেবার হুমকী দিয়ে গেছে সেদিন।
হয়তো আজই তার পেয়াদা এসে পড়বে। কিন্তু টাকা হাতে পেয়েও
তার ওখানে যাবার উৎসাহ পায় না চেরাগ আলি। দেহটা কেমন
ঝিমিয়ে গেছে। মনটা ফাঁকা ফাঁকা। অতদিন এমন সময় হয়তো তার
চিল্লাচিল্লীর জ্বালায় ঘরে তিষ্ঠানো দায় হতো। আজ সম্পূর্ণ নিরাল।
একজন মরে গেলে কবরখানা থেকে ঘরে ফিরে ঘরকে যেমন মনে
হয় তেমনি। কোনো শব্দও যেন কানে আসে না বাইরের। কুকুরটাও
ফিরে আসেনি। নির্জনতায় নিঃশব্দতায় মনটা কেমন হাঁপিয়ে ওঠে।
চৈতন ঠিক বলেছে, একটা বিড়াল পুষলেও তার ওপর মায়া পড়ে
মানুষের। হোক মাথা খারাপ লোক, পাগল, তবু মন থেকে মোছা
যায় না তাকে। তার কথা ভাবলো, তবু চতুর্দিকে তার হাতের ছাপ,
স্মৃতির অঁচড়, অনুপস্থিতির শূন্যতা যেন করাতের মতো চেরাগ
আলির মনকে খণ্ডবিখণ্ড করে। এই ঘরে, এইখানে সে যে কতোখানি
নিয়ে জুড়ে ছিলো, আজ শূন্য হতেই তা ধরা পড়েছে। নিষ্কৃতি আর
উদ্ধার পেতে চেয়ে সম্পূর্ণ নিঃশ্ব হয়ে গেল চেরাগ আলি।

বালিসে জয়তুনের মাথার ছাপের মধ্যে মুখ রেখে হঠাৎ তার কান্না
পায়। মনের চাপাদেওয়া সমস্ত আবেগ, দুইটি বছরের সুখে দুঃখে
ভরা প্রতিটি মুহূর্ত—সব যেন উদ্দাম জোয়ারের মতো চেরাগ আলির
চোখ ছেয়ে আসে। কৌচড়ের টাকাগুলো অনুভব করে কতো লুগণ্য,
কতো তুচ্ছ মনে হয় তাকে।

অকস্মাৎ বিছানা ছেড়ে বাইরে বেরিয়ে পড়ে চেরাগ আলি। না আর থাকা যায় না এই ঘরে।

বিশাল গাঙে মিলিটারীর মেয়ে সরবরাহের দালাল চৈতন দাসের পানসী তখন রাত্রির জোয়ারে পাল তুলে কোথায় হারিয়ে গেছে। গাঙের পাড়ে ছুটতে ছুটতে এসেও তার আর কোনো ঠিকানা পাওয়া যায় না।

জোর যার

নদী ক্রমাধ্বয়ে আগাইয়া আসিতেছিল।

পাড় ভাঙিয়া ভাঙিয়া মরিয়মদের ঘরের বড় জোর আর সাত-আট হাত দূরে আসিয়া থামিয়াছে। বর্ষার নদীর যে শ্রোত, তাহাতে যে কোনো মূহুর্তেই ভাঙিয়া পড়িতে পারে। কিন্তু কেন কে জানে, বলা চলে অস্বাভাবিকভাবেই, দিন-ছুই ছোবলের পর ছোবলে পাড় ভাঙিবার পর নদীর আর কোনো উদ্যোগ-আয়োজন দেখা গেল না। হঠাৎ যেন সে তাহাদের প্রতি সহানুভূতিময় হইয়া উঠিয়াছে।

এই ঘরবাড়ি ভাঙিয়া গেলে অথ কোথাও আর তাহাদের দাঁড়াইবার জায়গা নাই। জমির প্রায় সর্বাংশই তো গিয়াছে নদীর গর্ভে, এখন বাকি আছে শুধু এই ঘর, উঠান আর পাড় হইতে ঘরের পিছন পর্যন্ত ছোট মরিচের ক্ষেতটুকু। মরিয়মের বাবা রহমালি তো ভাবিয়া পায় না যে কোথায় যাইবে। গ্রামে বা বহু দূরেও কোনো আশ্রয় কুটুম্ব নাই যে তাহার ঘরে গিয়া উঠিবে। অথ কাহারও ঘরে আশ্রয় চাহিলে হয়তো ছুই একদিনের জুটিয়াও যায়। কিন্তু তারপর? আকালের দিন সকলেই নিজ নিজ ঘর-পরিবার সামলাইতেই ব্যস্ত। আশ্রয় যে তাহাদের কেহ দিবেই তাহারই বা নিশ্চয়তা কী! আর তাহা ছাড়া গ্রামের সঙ্গে তার সম্পর্কটাও খুব ভালো নহে।

রহমালি গ্রামের সর্বাপেক্ষা সঙ্গতিপন্ন চাষী ছিল এককালে। আজ নানান ছুঁদেঁবে অবস্থা শোচনীয় হইয়া পড়িয়াছে দেখিয়া ঈর্ষানুর উল্লসিত।

কাজেম আলি তাহাদের মধ্যে একজন। তাহার সঙ্গে তো গ্রামের প্রায় সকলেরই শত্রুতা। অতীতের মনোমালিঙ্গের ইতিহাসটা ভুলিয়া সে রহমালির কাছে মরিয়মকে বিবাহ করিবার প্রস্তাব করিয়াছিল। রহমালি সম্মত হয় নাই। তাহার কারণ তাহার স্বভাব চরিত্র খুবই খারাপ। লোকে কানা-ঘুষা করে কুৎসিত ব্যাধিতেও নাকি সে আক্রান্ত হইয়া পড়িয়াছে। স্ততরাং মেয়ে টাকাওয়ালা বড়মানুষের ঘরে পড়িলেও তার ভবিষ্যৎ জীবন যে সুখের হইবে না, তাহা অনায়াসে অনুমান করিয়া রহমালি তাহার প্রস্তাব প্রত্যাখ্যান করিয়াছিল। তারপর হইতে কাজেম আলি যেন তাহার উপর আরো ক্রুদ্ধ হইয়া উঠিয়াছে। গ্রামের প্রায় সকলেই তাহার অত্যন্ত অনুগত। উপরন্তু কাজেম আলি তাহাদের সাবধান করিয়াও দিয়াছে যে, রহমালির দেমাক ভাঙিল বলিয়া। পাড় ভাঙার সঙ্গে সঙ্গেই ভাঙিবে। খবরদার, তখন কেহ যেন ওকে ঘরে জায়গা না দেয়।

বিবাহের প্রস্তাব প্রত্যাখ্যান করার মধ্যে দেমাক আবিষ্কার করিয়াছে কাজেম আলি। উচুঘরের বলিয়াই হয়তো তাহার আত্মসম্মানে ঘা লাগিয়াছে। কাজেম আলির বংশ সতাই খুব বড়। বাড়িতে এখনও দুই দুইটা কাছারি। বেশ বড় তালুকদার। তাহার প্রস্তাবে সম্মত হইলে রহমালির সমস্ত দুঃখকষ্ট ঘুচিত, আশ্রয়ের সন্ধান যে করিতে হইত না তাহাতে সন্দেহ নাই। তাহাদের মত নিচু ঘরে, যাহারা কোন দূর গাঁ হইতে এখানে আসিয়া রহমালির মত মাথার ঘাম পায়ে ফেলা শ্রমের জোরে একটু একটু করিয়া সংসার গড়িয়াছে, তাহাদের সঙ্গে কুটুস্থিতা করিতে যাওয়াও কাজেম

আলির পক্ষে অনেক হীনতা এবং রহমালির আকাশের চাঁদ পাইবার মত সৌভাগ্যের বিষয়, কিন্তু তবু—

যাইতে পারে আর এক বাড়ি। ফয়জুল্লা বা ফজুর বাড়িতে। সে ছেলেটি গরিব হইলেও ভালো। যদিও সে কাজেমের প্রজা, তবু তাহার ভ্রকুটিকে উপেক্ষা করিয়া সে তাহাদের বাড়িতে আসা যাওয়া করে। কোনো আত্মীয়-স্বজন নাই তাহার, না আছে জায়গা-জমি। ক্ষেতে ক্ষেতে বদল খাটিয়া কোনো মতে জীবিকানির্বাহ করে। তবু তাহার ঘর তো একখানা ছিল, বিপদে পড়িয়া সেখানে ওঠাও চলিত। কিন্তু সে পথও রুদ্ধ করিয়াছে রহমালি। না করিয়া উপায় ছিল না। সেও মরিয়মকে বিবাহের মতলব করিয়াছিল। রহমালি বুঝিতে পারিয়া পূর্বাভুই তাহাকে নিরাশ করিয়া দিয়াছে। চালচুলা যাহার ঠিক নাই, সে শত ভালো হইলেও বাপ হইয়া তাহার মেয়েটাকে এমন বিসর্জন দেয় কী করিয়া!

এদিকে নদী ক্রমান্বয়ে আগাইয়া আসিতেছে। রাত্রি শুইয়া শুইয়াও তাহার ছলাচ্ছল জলকল্লোলে ধবংসের করতালি শুনিতে পায় রহমালি। এক রাত্রেও ঘুমাইতে পারে না। চাপ চাপ মাটি ভাঙিয়া পড়ার সঙ্গে সঙ্গে বুকের এক একখানা পঞ্জরাস্থি ও মন যেন ভাঙিয়া পড়ে। স্ত্রী, মরিয়ম, সাত বছরের ছোট ছেলেটি সকলেই তো সর্বদা তটস্থ। কোন সময় যে এক বিরাট চাপস্রুদ্ধ তাহারা ঘরবাড়ি সমেত নদীর গর্ভে লুপ্ত হইয়া যাইবে কে জানে!

কী করিবে ভাবিয়া রহমালি দিশেহারা। সম্মুখে আগাইয়া আসিতেছে নিশ্চিত মৃত্যু। যে-ক্ষেতে দেহের রক্ত জল করিয়া শস্য ফলাইয়াছিল, তাহা গিয়াছে গাঙের গর্ভে। এবার যাইবে বাড়িঘর। কয়েকদিনের

জন্ম তখন কোথাও না হয় আশ্রয় মিলিলই। কিন্তু তার পর ?
 বাড়ির উত্তরে নদী। দক্ষিণে ছোট একটু উঠানের পরে খাল।
 তাহার ওধারে আসল গ্রাম। এদিকে বসতি খুবই অল্প। যাহারা
 ছিল, তাহারা আগেই নিশ্চিহ্ন হইয়াছে অথবা অগ্নিত সরিয়া গিয়াছে।
 উঠানের পরে আম বাগানের মধ্য দিয়া মরিয়ম কলসী কাঁখে খালের
 ঘাটে যাইতেছিল, পথে কাজেম আলির সঙ্গে দেখা। সজ্জম করিয়া
 ঘোমটা টানিবার চেষ্টা করিয়া মরিয়ম একপাশে সরিয়া দাঁড়াইল।
 কাজেম আলি ঠিক পথের উপর দাঁড়াইয়া কহিয়া উঠিল : এই যে
 তোমাদের ওদিকেই যাইতে আছিলাম। তোমার বাপ আছে বাড়িতে ?
 মরিয়ম মৃদুস্বরে কহিল : না।

বলিতে বলিতে আরো সংকুচিতভাবে সে পথের একেবারে কিনারায়
 সরিয়া আসিল।

কাজেম আলি অকস্মাৎ হাসিয়া ফেলিল : ভয় পাইছো মনে হইতে
 আছে যান ?

অপরিচিত নহে সে মরিয়মের। তাহাকে সে ইতিপূর্বেও দেখিয়াছে,
 এই ঘাটের পথে আলাপও হইয়াছে দুই একদিন। একদিন
 অযাচিতভাবে তাহার রূপের প্রশংসা করিয়াছে। বহুদেশ নাকি ঘুরিয়াছে
 কাজেম আলি, অনেক মেয়ে দেখিয়াছে, কিন্তু তাহার মতো এমন
 রূপবতী শাস্ত লক্ষ্মী মেয়ে আর দ্বিতীয়টি চোখে পড়ে নাই। সে
 যে-ঘরে যাইবে সে-ঘর তাহার শ্রীতে ঝলমল করিয়া তো উঠিবেই,
 অধিকন্তু সে-ঘরের লক্ষ্মী হইবে অচলা।

কাজেম আলির এতো প্রশংসায় সেদিন লজ্জাজড়িত হইয়া উঠিয়াছিল
 মরিয়ম। মুখ তুলিয়া তাহার দিকে একবার চাহিতেও পর্যন্ত পারে নাই।

কিন্তু সেদিন হইতে কিশোরী মরিয়মের দৃষ্টিতে যেন একটা অপূর্ব অনাস্বাদিত জগতের ছয়ার খুলিয়া গিয়াছিল। বাড়ি ফিরিয়া কাজেম আলির কথাগুলি ভাবিয়া ঘামিয়া উঠিয়াছিল মরিয়ম।

কাজেম আলি দেখিতে সুপুরুষ। লম্বা চওড়া, ফর্সা দীর্ঘ চেহারা। মাথায় কালো কুচকুচে কৌকড়ানো চুল। লোকটি তাহাদের একরকম শত্রু হইলেও সেদিন ভালো লাগিয়াছিল মরিয়মের। খালের ও পাড়ের পথ দিয়া সুসজ্জিত বেশে প্রায়ই সে হাটের পথে যাওয়া আসা করে। মরিয়ম আম বাগানের আড়ালে দাঁড়াইয়া লুকাইয়া লুকাইয়া তাহাকে বহুবার ব্যগ্রচোখে পর্যবেক্ষণ করিয়াছে। প্রচলিত ধারণামতো লোকটিকে মন্দ বলিয়া মন মানে নাই।

সামনা-সামনি আরো দেখা হইয়াছে, কিন্তু কখনো তাহার দিকে মুখ তুলিয়া চাহিতে পারে নাই মরিয়ম। ভাবিয়াছে আবার দেখা হইলে নিশ্চয়ই সেও কিছু কথা বলিবে। প্রতিদিন বোবার মতো নীরব থাকে, এতে কাজেম আলিই বা ভাবিতেছে কী! কিন্তু কার্যকালে কী এক ছুরতিক্রম্য লজ্জা বারবার তাহার সমস্ত বাকশক্তি যেন হরণ করিয়া লইয়াছে!

আজও চক্ষু তুলিয়া চাহিতে পারিল না, মৃদুকণ্ঠে শুধু কহিল : না, ভয় কিসের ?

: অঁ্যা, ভয় কিসের ? হ্যাঁ, তা ঠিক—বলিতে বলিতে কেমন অস্বাভাবিক কণ্ঠে হাসিয়া উঠিল কাজেম আলি।

মরিয়ম একটু ঘাবড়াইল। এ কথাটায় এত জোরে হাসিবার কি আছে ? এক লহমা দৃষ্টিপাত করিয়া দেখিল হাসিটাও ঠিক স্বাভাবিক নহে।

কাজেম আলি এক পা আগাইয়া আসিল : ভয় কর না তাইলে ?
তা, মানুষটি আমি খারাপ নইগো তাইলে, কি বলো ?

মরিয়ম তাহার বলিবার ভঙ্গিতে একবার হাসিয়া ফেলিয়াই আবার
সংযত হইল ।

খানিকক্ষণ নীরবে কাটিল ।

কাজেম আলি হাতের লাঠিখানা দিয়া একটা ঝোপের উপর আস্তে
আস্তে আঘাত করিতে করিতে কহিল : তোমার বাবার কাছে তোমারে
বিয়া করার প্রস্তাব করছিলাম শুনছো বোধ হয় ?

মরিয়মের মাথাটা এবার বুঁকিয়া পড়িল ।

: কিন্তু সে সোজাসুজি না বলইয়া দিছে । পুরানো শত্রুতাটারে সে
ভুলতে পারে নাই । কিন্তু তোমার দিকটাও ভাবা উচিত ছিলো তো
তার । ঘর তো ভাঙইয়া পড়ল বলইয়া । এর পরে কোথায় থাকবে,
কি খেয়ে বাঁচবে ? আমার হাতে পড়লে কোনো ছুঁখ থাকতো
তোমার ? অটেল আমার টাকা । গয়না কাপড়ে মুড়ইয়া রাখতাম
তোমারে । তোমার বাপ-মা ভাইটারো বা ছুঁখ থাকতো কি ? আমারে
জামাই পাওয়া খুবই সৌভাগ্যের ছিলো তোমার বাবার পক্ষে । বলতে
পারো, সতীনের ঘর কোন্ ছুঁখে করে মানুষ ? কিন্তু জানোতো, সে-ঘরে
কোনো ছেলেপুলে নেই আমার, বারোমাস তার অনুখ । তার উপর
স্বভাবে উগ্রচণ্ডী, রাতদিন কেবল ঝগড়া-ঝাটি । কোনোদিন মনের মিল
হয় নাই, হইবেও না । তোমাকে পাইলে তারে তালাক দিয়া বিদায়
দিতাম ।

কথা বলিতে বলিতে মাঝে মাঝে বিরাম লইতেছিল কাজেম আলি ।
এবার একটু থামিয়া করুণ স্বরেই কহিল : বিয়া আমার একটা করা

দরকার। এতো বিষয়-আশয় করলাম, ভোগ করবে কে? মরইয়া গেলে
বংশে বাতি জ্বালাবারও কেউ থাকবে না।

কথাগুলি বলিবার সঙ্গে সঙ্গে মরিয়মের মুখভাবগুলিও সে লক্ষ
করিতেছিল। যেন পরীক্ষা করিয়া দেখিতেছে কিছু।

কিন্তু মরিয়মের মুখ যে সেই নত হইয়া পড়িয়াছে, আর উঠিল না।

কাজেম আলি আর একটুকাল উসখুস করিয়া অপেক্ষা করিয়া কহিল :
তোমার বাবারে পাইলে কথাটা আবার ভাবইয়া দেখতে বলতাম।
তোমারে রাজকন্টার মতো স্থখে রাখতাম মরিয়ম।

সে চলিয়া যাইবার পরেও অনেকক্ষণ তেমনিভাবে দাঁড়াইয়া রহিল
মরিয়ম। চेतনা যখন হইল, সে যেন স্বপ্নের মধ্য হইতে জাগিল।
পিছনে তাকাইয়া দেখিল কাজেম আলি তখনো দূরে দাঁড়াইয়া তাহার
দিকে তাকাইয়া আছে।

মরিয়ম তাড়াতাড়ি ঘাটের দিকে অগ্রসর হইল।

কাজেম আলি দূরে দাঁড়াইয়া খানিকক্ষণ দেখিল তাহার গমন ভঙ্গিমা,
গুরু নিতম্বের ছন্দ। মুখভাব কেমন অদ্ভুত হইয়া আসিল তাহার।
একেবারে না হউক, একবারো যদি মেয়েটাকে সে তাহার আলিঙ্গনের
মধ্যে পাইত! হরণ করিয়া লইয়া যাইবে নাকি? গাঙের পথে
সরিয়া পড়িতে কষ্ট হইত না। কিন্তু তার আগে রহমালিকে আর
একবার বলিয়া দেখা ভালো। ছলে বলে কৌশলে যেমন করিয়াই
হউক, উহাকে ভোগ করিতেই হইবে।

স্নান সারিয়া মরিয়ম আসিয়া দেখে ফজু তাহার মায়ের সঙ্গে বসিয়া গল্প

করিতেছে। অনেকদিন তাহার দেখা ছিল না। একে শরীর শীর্ণ, তার উপর আরো একটা কালিম ছায়া পড়িয়াছে।

বহুদিন পরে তাহাকে দেখিয়া খুশি হইল মরিয়ম : কখন আইলা ফজু ভাই ?

: অনেকক্ষণ। কেমন আছ ?

: আছি ভালো, কিন্তু তুমি অমন শুকাইয়া গেছো কেন বলো দেখি ?

ফজু খতোমতো খাইয়া তাহার এই দরদী প্রশ্নের উত্তরে কি জবাব দিল, পরিষ্কার বোঝা গেল না।

মরিয়মের মা কহিল : দিন রাত ভুতের মতো খাটতে আছে, শরীরের কি কোনো যত্ন আছে !

ফজু কেমন বিমর্ষভাবে মরিয়মের দিকে চাহিয়া ছিল, মরিয়ম একটু বিব্রত হইতেই দৃষ্টি ফিরাইয়া আনিয়া বলিয়া উঠিল : এবার তাইলে উঠি খালা। যাইতেছিলাম হাটে, ভাবলাম দেখা করইয়া যাই।

মরিয়মের হাসি নিভিয়া গেল : সে কী ! বসো, কতোদিন তোমারে দেখি নাই। আইলা যদি বসো না, গল্প করি একটু।

কলসীটা হাতিনার এক পাশে নামাইয়া, বাহিরে লাউমাচার সঙ্গে ভিজা কাপড়টা ঝুলাইয়া দিল মরিয়ম।

ফজু খানিকক্ষণ তেমনি দৃষ্টিতে তাহাকে দেখিয়া, গাঙের দিকে দৃষ্টি ফিরাইয়া নিল।

ছপুরের রৌদ্রে গাঙের জল রূপার মতো ঝলকাইতেছে। এদিকে ওদিকে ছোট ছোট ডিঙি। পুবালা বাতাসে তরতর করিয়া অগ্রসর হইয়া যাইতেছে পালতোলা বড়ো বড়ো নোঁকা। তাকাইয়া তাকাইয়া কেমন বিষণ্ণ হইয়া পড়ে ফজু। চারিদিকের নিষ্করণ রৌদ্র পৃথিবীর বিশালতা

প্রকট করিয়া তুলিয়াছে ; আর তাহার মধ্যে নিজেকে অত্যন্ত একাকী নিঃসঙ্গ বলিয়া মনে হইল তাহার। তাহার জীবনে কেবলই যেন রৌদ্রের পীড়ন, এই রকম একটু প্রশান্ত আবহাওয়া সেখানে নাই। এই ঘর, এই উঠান, লাউমাচা, কাপড় মেলিয়া দিবার মতো এই রকম একটু শোভন গৃহস্থালি। ক্লান্ত হাতে ঐ গাঙ বাহিয়া আবার বাড়ি ফিরিবে, কষ্ট করিয়া রান্না করিবে, খাইবে। যত্ন করিবার কেহ নাই, দেহ শীর্ণ হইয়াছে বলিয়া আফসোস করিবারও কেহ নাই।

বহুদিন সে এদিকে আসে নাই সত্য, কিন্তু তাহাতে মরিয়ম কি কোনো অভাব বোধ করিয়াছে তাহার ? হয়তো সে শুকাইয়াছে, কিন্তু তাহা কাহার জ্ঞাত তাহা কি জানে না মরিয়ম ? ঐ রকম একটু ঘনিষ্ঠ প্রশ্ন, একটু সহানুভূতির দৃষ্টিই তো চায় ফজু—যে দৃষ্টি তাহার দৈনন্দিন, রুঢ় জীবন-সংগ্রামের পথে পথে রাখিবে একটু প্রশস্ত প্রশান্তি। নানাকথা হয় মরিয়মের সঙ্গে। ফজু কখনো তাহার হাসিতে যোগ দিল, কখনো বা বিমর্ষ চোখে গাঙের পালতোলা নৌকাগুলির দিকে চাহিয়া রহিল। অশ্রুমনস্ক সে। অন্তরের কী একটা দ্বন্দ্বকে সে যেন মুখ ফিরাইয়া রাখিয়াই নিঃশেষ করিয়া দিতে চায়।

ঃ তোমার কী হইছে বলো দেখি ?

ফজু চমকিয়া উঠিল ; তাড়াতাড়ি বলে : কই, কিছু হয় নাই তো।

ঃ কী ভাবতে আছিল। তাইলে ?

ফজু চুপ করিয়া রহিল। কী ভাবিতেছিল তাহা শুনিয়া কী লাভ মরিয়মের ?

আর, আশৈশব যাহার সঙ্গে এতো প্রশ্ন, তাহার সম্মুখে সে স্বীকৃতিই বা দেয় কি করিয়া ? মরিয়মের কি বোঝা উচিত নহে কিছু ?

বলিবে নাকি কী ভাবিতেছিল ? বলিবে নাকি, ভাবিতেছিলাম তোমারই কথা ? তোমাকে আমার চাইই মরিয়ম। জানি আমি অতি দরিদ্র, আমার ঘরে তোমাকে নেবার মতো অবস্থা আমার নাই, জানি আমার জীবিকারও কোনো সংস্থান নাই, কিন্তু তুমি যদি আমার পাশে আসিয়া দাঁড়াও, তবে এই নির্ভুর উদাসীন পৃথিবীকে আমি ভয় করিব না। ভয় করিব না ছুঃখের শত সহস্র ছোবলকেও—তোমাকে পাশে লইয়া, তোমার হাতে হাত বাঁধিয়া লইয়া আমি সকল ছুঃখকে জয় করিয়া লইব। তুমি আমাকে ভরসা দিও, আশা দিও—

: বাঃ, কথা কও না যে !

: কী—কী কব ?

: আস নাই কেন এতোদিন ?

মরিয়মের সব প্রশ্নেরই তো ঐ একই উত্তর। মিলন যেখানে হইবে না, সেখানে কী লাভ ভালোবাসার কথা জানাইয়া ?

: বেশ মানুষ তো, ভাবতে আছে কী ?—তাহার হাঁটুতে একটি ঠেলা দেয় মরিয়ম।

ফজু অকস্মাৎ বলিয়া ফেলিল : কেন আসি নাই তা কি জানো না ?

: কই, না তো !

ফজুর কণ্ঠস্বর লক্ষ করিয়া মরিয়মের হাসি বন্ধ হইয়া গেল।

: যে আশা করছিলাম, তাই যখন ভাঙলো—

ফজু কথা শেষ করিতে পারিল না ; থামিয়া শেষে উঠিয়া পড়িল।

: আমি উঠি এবার, কাজ আছে অনেক।

মরিয়মের মুখ অকস্মাৎ বিবর্ণ হইয়া উঠিয়াছিল, এবার দুইটি জিজ্ঞাসু আঁত চক্ষু তাহার দিকে নিবন্ধ করিয়া চাহিয়া রহিল, যেন উপলব্ধি হয়

নাই ফজুর কথা। মুখ দিয়া অফুট প্রশ্ন বাহির হইয়া গেল : কী আশা ?
ফজু মুখ ঘুরাইয়া কহিল : তা তোমার জানা উচিত মরিয়ম, অন্তত
আমার এই আশাসটুকু আছিল যে তুমি জানতা। ছনিয়ার আর কেউ
না জানুক, অন্তত তুমি আমি জানি—

ফজুর কথা আটকাইয়া গেল। তারপর অকস্মাৎ তাহাকে গাঙের দিকে
অগ্রসর হইয়া যাইতে দেখিল মরিয়ম। নৌকায় উঠিয়া ভাসিয়া
পড়িয়াছে ফজু, পিছন ফিরিয়া তাকাইল কয়েকবার। ধীরে ধীরে অদৃশ্য
হইয়াও গেল।

মরিয়মের মনে ফজুর স্বপ্নকথাগুলি গুঞ্জরণ করিয়া ফিরিতে লাগিল। কী
আশা ছিল ফজুর, ভাবিতে ভাবিতে সে রোমাঞ্চিত হইয়া উঠে।
আশৈশব খেলার সাথী, যাহার সঙ্গে সঙ্গে থাকিয়া এতো বড় হইয়া
উঠিল, যাহার ছেলেমানুষী চিন্তের জগৎ মনে মনে তাহার স্নেহ ও করুণার
অন্ত নাই, সে কি তাহাকে বধূরূপে নিজের গৃহে নিবার আশা করিয়া-
ছিল ? ঐ শীর্ণ আত্মীয়হীন দুঃখী মানুষটি হইত তাহার স্বামী ? ফজু কি
তাহার কথায় ইহারই ইঙ্গিত করিয়াছে ?

রহমালি সারাদিন কোথায় কোথায় ঘুরিয়াছে। বাড়ি ফিরিয়া আসিল
বিকালের দিকে।

মরিয়মের মা জানাইল : ও বেলা ফজু আইছিলো। বললে, গাঙের যা
অবস্থা, যখন তখন ভাঙইয়া পড়তে পারে। তোমরা এখনি অল্প কোথাও
উঠইয়া যাও খালা। নয়তো আমি একলা ঘরে থাকি, অল্প কোনো ব্যবস্থা
না হওয়া পর্যন্ত ওখানেই আসো না। আর সত্যিই তো, অবস্থা যেরকম,
ঐ দেখ না চাইয়া ; আমি তো ভয়ে তটস্থ হইয়া আছি।

রহমালি চিন্তাশ্রিত মুখে গাঙের দিকে চাহিয়া শুধু কহিল : হুঁ ।

: হুঁ কী গো ! যা করবার এই বেলা করো । গত রাত্রে তো ছুচোখের পাতা এক করার ভরসা পাই নাই ।

: যামু কোথায় বসো । ফজুর ওখানে গেলে যে নানাকথা উঠতে পারে সেকথা ভাবছো ? তাছাড়া, কোন্ মুখেই বা তার ঘরে যাইয়া উঠি !

মরিয়মের মা কথাগুলি ঠিক বুঝিতে পারিল না, বলিল : কি কও ?

রহমালি তেমনি চিন্তাশ্রিত মুখেই কহিল : গ্রামে আর কারো ঘরে যাইয়া ওঠার উপায় রাখে নাই আর কাজেম আলি । ফজুরেও আমি নিরাশ করছি । আজ এতো বিপদের সময় সে যদি সাহায্য করে, প্রতিদানে কি আমাদের কিছু করা উচিত না ? কিন্তু মেয়েটারে জলে ভাসামু না ওর হাতে দিয়া ?

রহমালির কথাগুলি ঠিক পরিষ্কার না হইলেও মরিয়মের মা ফজুর ওখানে যাইবার সঙ্কোচটুকু অনুমান করিতে পারিল ; কহিল : ছেলেটা খুব ভালো, সেজন্য সে কোনো রাগ করইয়া রয় নাই । আমরা ওখানে গেলে সে নাকি আরো খুশিই হইবে ।

: আরো খুশি হইতো মরিয়মকে দিলে ।

মরিয়মের মা চুপ করিয়া রহিল ।

রহমালিও তাকাইয়া রহিল গাঙের দিকে । বেলাশেষের সূর্যরশ্মি স্নান বিকমিকানি তুলিয়াছে তাহার বুকে । হাওয়া পড়িয়া আসিয়াছে, পালতোলা নৌকাগুলি আর আগের মতো গ্রীবা ফুলাইয়া উদ্দাম হইয়া ছুটিতেছে না ।

চতুর্দিকে একটা গম্ভীর থমথমে ভাব ছাইয়া আসিতেছিল । কী রকম একটা গুমোট অস্বাচ্ছন্দ্য ! হুইজনেরই মন তাহাতে পীড়িত হইয়া উঠিতেছিল ।

শাহেরবাহু

রহমালি মুখ ফিরাইয়া কহিল : কাজেম আলি শত্রুতার আর শেষ রাখলে না। মরিয়মের সম্বন্ধ করা মুশকিল হইবে।

: কেন ?

: কী সব কুৎসা রটাইবে নাকি ওর নামে। তাইলে কি মেয়েকে আর ঘরে নিতে চাইবে কেউ ?

: ওমা, সে কি গো, এমন কি কেছার কাজ করছে সে ?

: করে নাই সে কিছুই, তাতে তুমি জানো, আমিও জানি। কিন্তু হাতী কাদায় পড়লে চামচিকাতেও লাথি মারে। চামচিকা ঐ কাজেম আলিটাই তো আজ গাঁয়ের মোড়ল, সে কিছু একটা বানাইয়াও প্রচার করলে গাঁয়ের লোকের বিশ্বাস করতে বাধবে না। ভাবছিলাম কোথাও ওর সম্বন্ধ ঠিক করইয়া সেইখানে না হয় উঠমু এই বিপদের সময়ে। কিন্তু—

: কিন্তু কী ?

: কিন্তু গ্রামে এমন কেউ নাই এখন যে কাজেম আলির টাকার অনুগ্রহ নেয় নাই। তাই তারে রুষ্ট করে সম্বন্ধও কেউ করতে চাইলে না।

: সে কী ! তাইলে উপায় ?

: উপায় এখন খোদার হাতে।

রহমালি খানিকক্ষণ নীরব থাকিয়া, একটা দীর্ঘশ্বাস ত্যাগ করিয়া আবার কহিল : এক সহজ উপায় আছে ফজুর সঙ্গে বিয়ে দেওয়া। কিন্তু—

বৈকালের স্নান ছায়া ক্রমশ চতুর্দিক ছাইয়া আসিতেছিল। সারাটা দিন রহমালির নাওয়া খাওয়া হয় নাই। সমস্ত গ্রামে ঘুরিয়া ঘুরিয়া এখন ক্ষুধায় পেটের মধ্যে পাক দিয়া উঠিতেছিল। হঠাৎ উঠিয়া কহিল :
যাউক, ভাবইয়া দেখি আইজকার রাত্রিটা।

কিন্তু ভাবা আর হইল না ।

সেই রাত্রেই অকস্মাৎ—

সকলে ঘুমাইয়া পড়িয়াছিল । সন্ধ্যার পরেই নামিয়াছিল বৃষ্টি । ঠাণ্ডা হাওয়ার আমেজে টিনের চালের উপর একঘেয়ে বৃষ্টির শব্দে, ঘুমাইবার ইচ্ছা না থাকিলেও, সকলে, এমন কি মরিয়মের অতিসতর্ক মাও ঘুমাইয়া পড়িয়াছিল ।

ফজুর কথাগুলি ভাবিতে ভাবিতে মরিয়ম ঘুমাইয়া পড়িয়াছে অনেক রাত্রে । তাহার সম্মুখে দুইদিকে খোলা দুই জগৎ সারা মর্মকে আকর্ষণে বিকর্ষণে অস্থির করিয়া তুলিয়াছিল । একদিকে কাজেম আলি, অগ্নি দিকে ফজু, অন্তরের আসনে কাহাকে ত্যাগ করিয়া কাহাকে সে প্রতিষ্ঠা করিবে !

ভাবিতে ভাবিতে ঘুমাইয়া স্বপ্নে দেখিল, একদিকে অনেক ঔজ্জ্বল্য, অনেক দ্রুতি লইয়া অগ্রসর হইয়া আসিতেছে কাজেম আলি । তাহার চক্ষু মায়াময় । আবেদন অপ্রতিরোধ্য । অগ্নিদিকে দাঁড়াইয়া ফজু । দীনহীন তাহার ভঙ্গি । দৃষ্টিতে করুণ মিনতি আর অনেক ছুঃখছায়া । একখানি হাত ভীকৃভাবে সম্মুখে প্রসারিত । মরিয়ম সে হাতখানা একবার ছুঁইয়া দিলেই যেন তাহার সব ছুঃখের অবসান ঘটিবে—

মরিয়ম মনস্থির করিতেছে, বিধায় ছুলিতেছে—

অবশেষে সে অগ্রসর হইল—

অন্তরতম আহ্বানকেই সে গ্রহণ করিল—

কিন্তু কী ঠাণ্ডা ফজুর হাত ! মৃত্যুর মতো ঠাণ্ডা !

অকস্মাৎ সজাগ হইয়া উঠিল মরিয়ম । হয়তো তখন মাঝরাাত্রি । বৃষ্টি থামিয়া গিয়াছে, আকাশে ধবধবে জোৎস্নাও ফুটিয়া উঠিয়াছে ইতিমধ্যে ।

ধড়মড় করিয়া উঠিয়া দেখে জলের উপর প্রায় ভাসিতেছে সে, মা-বাবা সবাই মাচায় শোয়া। নিচে শুইয়াছিল সে একা। জল অনুভব করিয়াই তাড়াতাড়ি লাফাইয়া উঠিয়া দেখিল, ছয়ারের পথ দিয়া প্রবল জলোচ্ছ্বাস ঘরের মধ্যে ছুটিয়া আসিতেছে। অবস্থা উপলব্ধি হইতেই মুহূর্তমাত্র বিলম্ব না করিয়া সে চীৎকার করিয়া মা বাবার দিকে ছুটিয়া গেল। তাহাদের ধাক্কা দিয়া জাগাইয়া, দিশাহারা হইয়া খোলা ছয়ারের পথে বাহিরের উঠানে লাফাইয়া পড়িবার সঙ্গে সঙ্গেই তাহার পায়ের কাছ হইতে বিশ পঁচিশ হাত বিরাট এক চাপ জমি লইয়া কোথায় লুপ্ত হইয়া গেল। চড়্-চড়্-ঝপাস্-স্ করিয়া একটা গুরু শব্দ উঠিল শুধু।

ব্যাপারটা ঘটিল মুহূর্তের মধ্যে। পরক্ষণেই মরিয়ম দেখিল তাহার সম্মুখে ঘরবাড়ির আর কোনো চিহ্ন নাই। পাড় যেখানে ভাঙিয়া পড়িয়াছে, সমস্ত নদীর জল সেখানে ছুটিয়া আসিয়া যেন ধ্বংসের করতালি জুড়িয়া দিয়াছে। ভাঙনের পাড় হইতে একটা সুপারিগাছ কাৎ হইয়া পড়িয়াছে নদীর উপর। আর চতুর্দিক হইতে নদীর লক্ষ বাহু ছুটিয়া আসিয়া তাহার শির আপন বক্ষে মিশাইবার জন্য উদ্দাম হইয়া উঠিল। মরিয়ম আর্তনাদ করিয়া আরো পিছাইয়া গেল। যে-স্থানটিতে দাঁড়াইয়াছিল দেখিতে দেখিতে তাহাও নদীর গর্ভে ভাঙিয়া পড়িল। খালের পাড়ে একটা খেজুর গাছের গুঁড়ির গোড়ায় সামান্য একটু জমিতে সে দাঁড়াইয়া আকুলকণ্ঠে একবার ডাকিয়া উঠিল : মা, বাজান ! কিন্তু কোনো সাড়া মিলিল না।

ডাকিতে ডাকিতে শেষে কণ্ঠ রুদ্ধ হইয়া আসিল। ভয় ও দুঃখে শেষে আর স্বরও বাহির হইল না।

তাহার ব্যাকুল আৰ্ত্তনাদ শুনিতে পাইয়া খালের অপর পাড় হইতে লণ্ঠন হাতে লোকজন ছুটিয়া আসিল। কিন্তু যাহাদের উদ্দেশ্যে ডাক, তাহাদের কোনো প্রত্যুত্তর আর মিলিল না। অন্ধকালের মধ্যেই নদী আবার নির্বিকার হইয়া বহিয়া চলিল। খানিক আগে যে ধ্বংস ঘটয়া গেল তাহার জ্ঞাত তাহার কোনো মমতা নাই। তাহাদের সে নিজের অতলে লুকাইল, কাহার পাড়ে কাঁদিল সেদিকে সে সম্পূর্ণ উদাসীন। ছল-ছলাৎ শব্দে পাড়ে পাড়ে আঘাত হানিয়া সে পূর্বের মত প্রবাহমান।

ভোর হইল। ভোর গড়াইয়া দ্বিপ্রহরের সূচনা দেখা গেল। বহুজন আসিল সমবেদনা জানাইতে, আসিল কাজেম আলিও। এদিক ওদিক জাল ফেলিয়া, ডুবিয়া, নানাভাবে খোঁজ করা হইল, কিন্তু মরিয়মের মা-বাবা বা ভাইয়ের কোনো সন্ধান মিলিল না। সবাই কহিল, পাড়ে মাটির সহিত তাহারা চাপা পড়িয়াছে নিশ্চয়।

কাজেম আলি কহিল : কেঁদে লাভ কী আর ? বসইয়া থাকইয়াই বা কায়দা কী ? চলো আমাদের বাড়িতে।

কিন্তু মরিয়ম অনড়। বাপ মা ভাইকে তাহার পাইতে হইবে। এই দুর্ঘটনা যেন বিশ্বাসই হইতেছিল না তাহার। তাহাদের সন্ধান না মিলিলে সে কিছুতেই এখান হইতে উঠিবে না।

সকাল হইতে কাজেম আলি তাহার কাছে বসিয়া সান্না দিতেছে, সমবেদনা সহানুভূতি জানাইতেছে আরো অনেক গ্রামীন জন। কিন্তু তবু কান্নার বিরাম নাই তাহার, অশ্রু লইয়া যাইবার চেষ্টাও ব্যর্থ হইতেছে। শেষে বিকাল যখন প্রায় গড়াইয়া আসিল, লোকজন কমিয়া গেল, কাজেম আলি তাহার হাত ধরিয়া আকর্ষণ করিল,

প্লেহসিক্ত কণ্ঠে অনুরোধ করিল : চলো, আমাদের বাড়িতে গিয়া শাস্ত হবা, লক্ষ্মিটি ! নৌকা লইয়া ওদিকে লোক পাঠাইছি। যদি শ্রোতের টানে কোথাও ভাসইয়া গিয়া থাকে, তাইলে তো খবরই পাবা ; বসইয়া থাকইয়া তো কোনো লাভ নাই, চলো মরিয়ম।

মরিয়ম তাহার সহানুভূতিময় মুখের দিকে চাহিয়া উঠিয়া দাঁড়াইল। ইচ্ছা করিতেছিল না এস্থান ত্যাগ করিতে, কিন্তু কাজেম আলির চক্ষু যেন অনেক আশ্বাসমাখা বলিয়া বোধ হইল। ধীরে ধীরে উঠিয়া পাশে দাঁড়াইল। তারপর অত লোকজনের মধ্যেও সহসা তাহার বুকের উপর পড়িয়া ফুপাইয়া কাঁদিয়া উঠিল মরিয়ম।

কাজেম আলি চারিদিকে চাহিয়া একটু লজ্জিত হইয়াই তাহাকে ধরিয়া আপন বাড়ির দিকে অগ্রসর হইল।

ডুবাইতে ডুবাইতে ক্লান্ত হইয়া পাড়ে উঠিতেই দূর হইতে এই দৃশ্যটা দেখিল ফজু। দুর্ঘটনার খবর পাইয়া সেই যে ছুটিয়া আসিয়া নিমজ্জিতদের সন্ধানে নামিয়াছে, ব্যর্থ হইয়া এইমাত্র উঠিল।

মরিয়মের কাছে যাইয়া একবার দাঁড়াইয়াছিল, কিন্তু বলিবার ভাষা মুখে যোগায় নাই। তাহা ছাড়া, স্বয়ং তালুকদার কাজেম আলিকে মরিয়মের কাছে দেখিয়া কিছু বলিবার সাহসও সে পায় নাই। এবারও পাইল না। কেবল শ্রান্ত, শীতকম্পিত বিমর্ষ চক্ষু দুইটি মেলিয়া তাহাদের গমনপথের দিকে তাকাইয়া রহিল।

ভাঙন

ঈশ্বর নীলাভ আলোয় ঝলমল প্রাসাদের অল্পরাগে বিধুর নায়িকার চটুল মন-ভাঙাভাঙির কথা বলছিলেন, বা কোনো পানসে দুঃখের কাহিনীও না। এ ভাঙনের ক্ষত আরো গভীর, অনেক সুদূরপ্রসারী। যে ভাঙনে এর জন্ম সে কাহিনী তো বরাবর শুনেছো, তার চরম রূপ দেখেছ মন্থস্তরে—মাটির অতি নিকটতর সেই সব সংসার কেমন করে ছিন্নভিন্ন, চূরমার হয়ে গেল! কিন্তু ভাঙনের ইতিহাস এ বিপর্যয়-বিক্রান্ত মধ্যবিন্দু মানুষ যদি তলিয়ে দেখতো, তবে তার আত্মবাস্তব কর্মকোলাহল স্তব্ধ হয়ে যেতো এইখানে এসে।

ছোট গঞ্জ। এককালে বড় বন্দর ছিল। আজ পাশের পূবে-পশ্চিমে দীঘল নদীর ছরস্তু খাবলে খাবলে ভেঙে ভেঙে খর্বায়তনা, অধিকাংশই নদীর গর্ভে লুপ্ত।

তবু ওপাশে আছে থানা, সাব রেজিস্টারী অফিস, স্কুল, নানা মহাজনের আড়ত। নারকেল সুপুরি আমের আড়ালে আড়ালে পুরানো দালান-কোঠা। লম্বা লম্বা টিনের গুদাম। অল্প কয়েকটা সরু কূপণ পথ। দুপাশে গাছপালার চাপ। নিস্ত্রভ গাঁদা ফুলের উকিঝুঁকি! খাল, নালা, নৌকা। তবু কোনো কোলাহল নেই। অদ্বৃত জায়গা। না-গ্রাম, না-শহর। মৃত, ভাঙা, ছাড়াছাড়া। কূপণ পথ। দিনেও আবছা কোথাও কোথাও, কোথাও আধ-জঙলা। বাইরের ভাঙনের অন্ধকার যেন অজ্ঞাতসারেই তার সর্বদিকে ছড়িয়ে

পড়েছে। আর তারই স্রুযোগে কোথাও মন্দির ফুঁড়ে, কোথাও পাঁচিল ভেঙে ইতস্তত জেগে উঠেছে গাছপালার কাণ্ড। নিবিড় গ্রাম্য স্নিগ্ধতা ছড়িয়েছে তার শাখা-প্রশাখা। কিন্তু চারিদিকে জরাজীর্ণ দালান-কোঠা, অদ্ভুত নীরবতা আর বিজনতা দেখে অতীতের ভগ্নস্তুপ ছাড়া আর কিছুই মনে হয় না জায়গাটাকে। অথচ এখানে মানুষ আছে, আছে জীবন।

একটি আঁকাবাঁকা পথ ছুপাশে এমনি অনেক সাক্ষ্য রেখে সরু পায় চলে চলে স্টীমার ঘাটে এসে থেমে গেছে। তার বাঁয়ে টিকিট ঘর, ছুচারটে চা, পান-বিড়ির দোকান আর নদীর খোলা চর। ডানদিকে অয়েল মিল, ভাঙাপাড়ে অনেক টিনের গুদাম পুবে অনেক দূর অবধি ছড়িয়ে গেছে। নদীর চরে আর ঘাটে সকালে-বিকালে বেড়াতে আসে গঞ্জের বাসিন্দারা। পথ যেখানে শেষ হয়েছে, তার ছুপাশের দোকান থেকে চা খায় আর ভোরের স্টীমার থেকে খবরের কাগজ নিয়ে বাড়ি ফেরে।

পথের পরেই বাঁশে-বাঁধা জেটির পুল; তারপর ভাসমান পল্টুন। পুলের গায়ে গায়ে নদীর পাড় ধরে বাঁধা থাকে অনেক ‘এক বৈঠার’ কেরায়া নৌকা।

খুলনা বা বরিশালের পথে সকালে-বিকালে চারবার স্টীমার থামে এই ঘাটে। ভেঁা শুনে ঘাটে এসে লোক জমে। মাঝিরা থেলো ছঁকো হাতে ছইয়ের উপর এসে দাঁড়ায়। টিকিটবাবু আসেন। শাস্তিরক্ষাকারী পুলিশ এসে জেটির পথ আটকায়। ভীড় জমতে দেয় না খোলা পল্টুনে।

নদীর জলে আলোড়ন তুলে স্টীমার ভেড়ে। স্বপ্ন যাত্রী ওঠানামা করে।

মাঝিরা ডাকে : আয়েন বাবু ইদিকে, কোথায় যাইবেন ?

চা-এর দোকানে কাজ বাড়ে ।

অনেক সময় তারিণী একা সামলে উঠতে পারে না । তার মাইনের ছোকরাটি বিড়ি-বটা ফেলে তার সাহায্যে আসে ।

উনিশ শো পঁয়তাল্লিশ সালের শীতকালে ভোরের এক্সপ্রেসে সেই ঘাটে একটি লোক নামলো । তার গায়ে মিলিটারী লেবার কোরের পোশাক । ফর্সা, সুদর্শন, স্বাস্থ্যবান চেহারা । জেটিতে দাঁড়িয়ে সে তার দৃষ্টি পাঠিয়ে দিল গঞ্জের দিকে, বা তারও চেয়ে আরো কোনো সুদূর মর্মে । তার চোখে মুখে ফুটে উঠলো বহুদিন পরে হারানোকে ফিরে পাওয়ার আনন্দ ।

তখনো সূর্য ওঠেনি । শিশির-স্নাত গঞ্জের চতুর্দিকে বিষণ্ণ পরিচ্ছন্নতা । লোকটি ধীরপদে পুল পার হয়ে পথে এসে নামলো ।

মাটির স্পর্শে মনে হোলো সে রোমাঞ্চিত হয়ে উঠলো । তারপর নিবিড় পদপাতে ধীরে ধীরে গিয়ে দাঁড়ালো তারিণীর দোকানের সম্মুখে । ইতস্তত চারিদিক দেখে লোকটি যেন আশ্বস্ত হোলো, কী রকম একটা আনন্দ দেখা গেল তার মুখে, তারপর ডাকলে : তারিণী খুড়া !

তারিণীর দোকানে ভিড় । বহুজনের এ-রকম সম্বোধনে সে অভ্যস্ত । তাই খন্দেরকে চা দিতে দিতে মুখ না ফিরিয়েই জবাব দিলে : কী ?

ফিরে এসে তাকে একটু পর্যবেক্ষণ করে আবার শুধায় : কী চাই আপনার ?

: ভালো আছেন খুড়া ? কী, চিনতে পারেন না ?

: আপনি !

শাহেরবাগ

: সম্বন্ধটা তুই-তুকারির আছিলে, ‘আপনি’ অইলাম কবে খুড়া ?

তারিণী একটু ভালো করে দেখে তাকে । বুড়ো হয়েছে, পাক ধরেছে চুলে, চোখেও হয়তো একটু কম দেখে আজ-কাল । অক্ষুট স্বরে বলে : আনোয়ার ?

: হ্যাঁ । লোকটি হাসে ।—লম্বা অইয়া গেছি খুব, না ?

একটা কালো ছায়া মুহূর্তের মধ্যে মিলিয়ে যায় তারিণীর চোখমুখ থেকে : আরে তুই ! কবে আইলি ? চেনতে না পারারি কথা বাবা । সেই যে পলাইয়া গেলা, আর এতোদিন বাদে চেহারাটি একেবারে বদলাইয়া ফিরইয়া আইছো । আয়, বস্ । চা খাবি ?

গদির চৌকির একপাশে তাকে বসায় তারিণী ।

: তা বদলাইবেই বা না ক্যান ? রাজার খাবার, রাজার পোশাক তো ! ‘আপনি’ কি আর সাধে মুখ দিয়া বাইর অয় ! তারপর, ছুটিতে আইছো, না ছাড়ইয়া দিলো ?

: ছাড়ইয়া দিলো । আপনারা তো হেই রহমি আছেন । কিছু বদলায় নায় ।

কথার ফাঁকে ফাঁকে ব্যস্তভাবে খদ্দেরদের তদারক করে তারিণী—
আপনার এক কাপ চা তো খালি ? এই নেন ।—

: হ্যাঁ, কতো বদল অইলে বাবা ! কতোদিন বাদে আইলা যেনো ?

: আড়াই বছর ।

: কোথায় কোথায় ছিলো এতোদিন ?

: অনেকখানে । দেরাহুন, আফ্রিকা, ইটালী—সেখান থেকেই এই ফিরলাম ।

একজন খদ্দের তার দিকে মনোযোগ দেয় : ইটালী থেকে ?

: হ্যাঁ।

লোকটির চোখছুটে। চকচক করে ওঠে : দেখলেন সব ঘুরইয়া ফিরইয়া—রোম, ভেটিকান, পম্পাই ?

: হ্যাঁ। জানেন খুড়া, জার্মানির হাতে আটকাও আছেলাম মাস আঠেক।

: বলেন কী, বন্দীও অইছিলেন ?

তারিণীও বিস্মিত হয় : হিটলারকে দেখলা, হিটলার ?

: হ্যাঁ—বলে আনোয়ার চায়ের কাপটা রেখে বন্দী জীবনের একটা গল্প শুরু করে—

রক্ষ মরুভূমির বৃকের উপর দিয়ে ট্যাংক আর ট্রাকের পর ট্রাক চলেছে ত্রিপলির দিকে। আকাশে খররোজ, বাতাসে আগুনের উষ্ণতা। হঠাৎ সম্মুখে শত্রুর গোলাবর্ষণ।...

সেই ইটালী-উৎসুক বাবুটি গল্পে জমে যান। এক কথায় আরেক কথা আসে। তারিণীর দোকানে ভিড় আরো একটু বাড়ে।

সূর্য ওঠে। বেলা বাড়ে। খবরের কাগজ হাতে যাবার সময় সেই বাবু বলে যান : সার্থক আপনাগো জীবন।

আনোয়ার খুশি হয়। লোকটিকে সে চেনে। গঞ্জের এক আড়তের কেরানী। তার সাধুবাদে তার মুখ আনন্দে ঝলমল করে।

তারিণী তখনো ব্যস্ত। আনোয়ার এদিক-ওদিক তাকিয়ে আবার প্রশ্ন করে : আমাগো বাড়ির কোনো খবর জানেন খুড়া ?

: বাড়ির খবর ? ক্যা, জানো না কিছু ?—কেটলি হাতে তারিণী কিছুক্ষণ তাকিয়ে থাকে তার দিকে।

তার বিস্ময় দেখে আনোয়ার একটু অস্বস্তি বোধ করে : না। ক্যান, কী অইছে ?

তারিণী চোখ ফিরিয়ে একটু এদিক-ওদিক ব্যস্ততার ভাণ করে, তারপর হেসে বলে : না, অইবে কী ! খবর-টবর পাও কি না হেইয়া জিগাইলাম—বলতে বলতে খদ্দেরের দিকে খুব মনোযোগী হয়ে পড়ে : আপনার কী চাই আর ? আপনার ?

একটু অস্বাচ্ছন্দ্য বোধ করে আনোয়ার। তারিণীর দৃষ্টিতে যেন কি অর্থ ছিলো। মনে শঙ্কা জমে তার।

: যাও, বাড়ি যাও, গেলে তো সব নিজের চোখেই দেখবা।

: ভালো আছে তো সব ?

: আমি অনেকদিন বাড়ি ছাড়া বাবা। ও মুকুন্দ, মুকুন্দ—একজন রাস্তার লোককে ডেকে নিজের কাজে ব্যস্ত হয়ে উঠলো তারিণী। আনোয়ারকে ফুরসৎ দেয় না আর কিছু জিজ্ঞাসার।

আনোয়ারও শেষে উঠে পড়ে। বেলা বাড়ছে।

: আচ্ছা, অল্প সময় আমু খুড়া। এহোন বাড়ির দিকেই যাই। নেন চায়ের দামটা।

কিন্তু তারিণী কিছুতেই মূল্য রাখলো না : তুই আমারে ঠাওরাইলি কী আনোয়ার ?

: আচ্ছা, তাইলে যাই খুড়া।—হেসে পথে নামে আনোয়ার, কিন্তু কয়েক পা গিয়েই আবার ফিরে আসে।

তারিণী নিনিমেষে তার দিকে তাকিয়ে দোকানেরই কোনো খদ্দেরকে কি বলবার উদ্যোগ করছিলো, তাকে ফিরতে দেখেই চট করে মুখের ভাব পরিবর্তন করে : কী, ফিরল। যে ?

: জাহাজে একজন্যাডে হোনলাম কাপুড়-চুপুড় পাওয়া যায় না বোলে ছাশে। এহানে পামু তো ?

তারিণী হেসে উঠলো : আশা কম। তবে দেহো চেষ্টা কর্হইয়া। দেশের অনেক পরিবর্তন অইছে বাবা, যা দেইখা গেছো, হেদিন আর নাই।

কাপড়ের দোকানগুলো আগের মতোই খোলা। কিন্তু প্রতিটি তাক তার খালি। ঘুরে ঘুরে অবাক হয় আনোয়ার। সবাই বলে কাপড় নেই। তবে তাদের দোকান খুলে থাকার অর্থ কী! মুখে বলছে বটে বছর খানেক ধরে ব্যবসাই বন্ধ, কিন্তু সত্যিই কি তাই? মহিম পোদ্দারের চেহারায় আগের চাইতেও চর্বির বোঝা। হরিহর সাহার হাতে অতো বড়ো ছোটো আংটি এলো কোথা থেকে?

একটা দোকান থেকে বেরিয়ে আসতেই পিছন থেকে একটি লোক ডাকে : ও সাইব, হোনেন।

আনোয়ার দাঁড়ায়।

লোকটি কাছাকাছি এসে ফিস ফিস করে বলে : আমার সন্ধানে আছে কাপড়। নিতে গেলে দামটা এটু বেশিই পড়বে। আড়ালে কারবার, বুঝলেন কিনা।—হাসতে চায় লোকটি।

আনোয়ার হতাশ হয়ে পড়েছিলো। হোক একটু বেশি দাম। উৎফুল্ল হয়ে সে মা, বোন আর বাপের জ্ঞা কেনে এক এক জোড়া। কেনে আলতা, চিরুনি, পাউডার। বোনদের জ্ঞা নানা উপহারের জিনিস।

সেগুলো সংগ্রহ করে যখন বাড়ির পথে পা বাড়ায়, ইতিমধ্যে অনেকখানি উঠে এসেছে সূর্য। কিন্তু বনে-জঙ্গলে রুদ্ধশ্বাস গঞ্জের তখনো শীত কাটেনি। আঁকাবাঁকা সরু পথ দিয়ে পুরাতনকে নূতন করে দেখতে দেখতে প্রফুল্লমনে বাড়ির পথে চলে আনোয়ার। নিস্তব্ধ পথে ছপাশের বাসিন্দাদের চমকে হাড় বার করা রাস্তায় তার বৃট শব্দ করে—খট-খট-খট।

আড়াই বছর আগে এই পথেই একদিন বাড়ি থেকে পালিয়ে এসেছিলো আনোয়ার।

মনে মনে অতীতের কথা স্মরণ করে লজ্জা অনুভব হয় তার। কী দুরন্তই না ছিলো! সবাই তাকে জানত উচ্ছনে যাওয়া ছেলে বলে। গ্রামময় দাপাদাপি মারামারি করে বেড়াতো। গরিব, অতিগরিব অজস্র কষ্ট দিয়েছে এজ্ঞ। হয়তো তাদের জীবন তাকে নিয়ে অতিষ্ঠ হয়ে উঠেছিলো। সংসারের কোনো কাজেই লাগতো না বলে নিত্য গালমন্দ, প্রহার জুটতো তার ভাগ্যে। মার খেয়ে এদিক-ওদিকে গুম হয়ে পড়ে থাকলে মা বা বোনেরা ঘরে ডেকে নিয়ে যেতো। বিশেষ করে সর্বকনিষ্ঠ। বোনটির তার প্রতি সহানুভূতির অন্ত ছিলো না।

কিন্তু যোলো বছর বয়সের সময় মুহূর্তের ভুলে আত্মসংযম হারিয়ে সে যে কাণ্ডটি করে বসলো, তা জানতে পেরে হয়তো লজ্জায় মাথা কাটাই গিয়েছিলো তার পিতা অজিউল্লার।

এস্কেন্দার আলির বারো বছরের মেয়ে ময়নাকে দেখে অবধি ভালোবেসে ফেলেছিলো আনোয়ার। সুন্দরী মেয়ে ময়না। ডাগর-ডাগর গড়ন। বিয়ে হয়নি তখনো। অনেক বার তারও অপাঙ্গের চাহনিতো আনোয়ারও টের পেয়েছিলো তার স্বীকারোক্তি, নইলে সেইদিন নিরালা সন্ধ্যায় কোন্ সাহসে তার সামনে গিয়ে দাঁড়িয়েছিলো? তার সুন্দর লালিম ঠোঁটে ব্রীড়াবিধুর হাসি দেখে সব সংযমের বাঁধ টুটে গেল তার। প্রথম যৌবনের উন্মেষিত ভীকু অথচ উগ্র কামনায় ফুলের মতো কোমল ময়নাকে সে যেন নিজের সর্বাঙ্গে মিশিয়ে নিতে চেয়েছিলো। ময়না থর থর করে কেঁপে উঠলো তার আলিঙ্গনের মধ্যে—একটু বাধা দেবার চেষ্টা করে তারপর একেবারে নির্জীব।

তারপর যখন দেখলো সন্ধান-আসা ছোটো ভাইয়ের কাছে ধরা পড়ে গেছে, তাড়াতাড়ি ঝাঁকুনি দিয়ে নিজেকে সরিয়ে নেবার চেষ্টা করে চিংকার করে কেঁদে উঠেছিলো ময়না। বিস্মিত, ব্যাকুল, ভীর্ণ প্রণয়ী আনোয়ার ছুটে পালাবার পথ পায়নি সেদিন।

সন্ধ্যায় ছুরু ছুরু বৃকে বাড়ির বাইরে থেকে শুনলো পিতার গলা—
ব্যাপারডা জানাজানি কইরেন না মাঝি! হারামজাদা আউক বাড়ি,
আইজি সমুচিং শিক্ষা দিয়া হাড় জুড়াম্।

এরপর ক্রোধোন্মত্ত অজিউল্লার সামনে আর আসেনি আনোয়ার। সেই রাত্রেই বহু দুঃখ আর বহু লজ্জা নিয়ে সে গ্রাম ত্যাগ করলো। সেদিন ক্ষোভ জেগেছিলো ময়নার বিরুদ্ধে, বাপের বিরুদ্ধে, সমস্ত আখরপাড়া গ্রামের বিরুদ্ধে। সেই ক্ষোভই তাকে প্রেরণা দিলে মিলিটারিতে ভর্তি হতে, স্বদেশের মাটি ত্যাগ করে যেতে। ময়নার কাছে ঐ ব্যবহারের প্রত্যাশা তো তার ছিলো না!

দেরাহুনে ট্রেনিং-এ থাকার সময় দু'মাসের মাইনে বাড়িতে পাঠিয়েছিলো আনোয়ার। তা ফেরৎ এল। উদ্দিষ্টকে পাওয়া যায়নি। আনোয়ার ভাবলো, হয়তো রাগ করে রাখেনি তার বাবা। কয়েকবার মাফ চাওয়া সত্ত্বেও বাড়ি থেকে পাওয়া যায়নি কোনো প্রত্যুত্তর-পত্র। অল্পতাপ-দগ্ধ আনোয়ার হতাশ হয়ে দিনের পর দিন এই লড়াই-এর জীবন থেকে মুক্তির কামনা করেছে। তারপর ডুবে গেল কতো বিচিত্র অভিজ্ঞতার মধ্যে—কতো রোমাঞ্চকর ঘটনা ঘটে গেল জীবনে...

গঞ্জের ঘুপটি ছাড়িয়ে মুক্ত মাঠের কাঁচাপথে এসে পড়ে আনোয়ার। রোমাঞ্চিত হয়ে ওঠে পায়ের নিচে কাঁচামাটির স্পর্শে। বিস্তৃত মাঠ,

ক্ষেত, আকাশ আর সবুজ গ্রামের দিকে তাকিয়ে সে বুক ভরে শ্বাস গ্রহণ করে। হেঁটে যায় পথের পাশে শিশিরসিক্ত ছুঁবাদলের ধারে ধারে। কতো কাম্য ছিলো এই প্রত্যাবর্তন!

মনে পড়ে আফ্রিকার সেই রুক্ষ দিনগুলো। চারিদিকে যোজ্ঞনের পর যোজ্ঞন ব্যোপে উষর মরু-প্রান্তর। নেই ছায়া, নেই মেহুরতা। সেই আগ্নেয় উষ্ণতার মধ্যে এই স্নিগ্ধ শ্যাম দেশের কথা কল্পনা করে মন হাহাকার করে উঠতো। সেখানকার আকাশে ছিলো না এমন শুভ্র বলাকার অভিযান, মাটিতে ছিলো না সোনালি শস্যের সমারোহ। উড়োজাহাজের ঘর্ষর, ট্যাংক, ট্রাক আর লরী এবং অবিশ্রাম গোলাগুলির মধ্যে জীবনটুকু হাতে নিয়ে চলাফেরা করতে করতে মনে হতো রুক্ষ বালুকণার দেশ শ্যাম দেশের জীবনীটুকু শুষে পান করতে চাইছে।

তবু তারিণী খুড়োর চোখে আগের চাইতে চেহারা নাকি অতি চমৎকার হয়েছে তার। জার্মানদের হাতে বন্দী থাকার সময়কার চেহারা যদি দেখতো তারিণী খুড়ে! তবে ইটালীতে গিয়ে সত্যিই সে খুশি হয়েছিলো। অবিরাম কর্মের ছেদ পড়েনি বটে, তবু সে আরাম পেয়েছে অনেক। সেখানে আছে বর্ণালি গাছপালা, প্রকৃতির সজীবতা। এই বাংলা দেশেরই মতো সেখানে শস্যের ক্ষেতে মাতন তুলে হাওয়া বয়। গাছে গাছে ছবির মতো রঙিন আপেল আর ঝুবেরী। লতায় লতায় থোকায় থোকায় সুপুষ্ট আঙুর। জ্যোৎস্না রাত্রে ছোটো কুলুকুলু ঝরণার পাশে আঙুরকুঞ্জে বসে আকাশভরা ঝলমলে রূপালি জ্যোৎস্না দেখেছো কোনোদিন? অথবা বিকেলে নিভন্ত আলোয় দাঁড়িয়ে বহু রঙের ঘাসফুলে আর সবুজ তুণে টাঁকা

ছোটো ছোটো পাহাড়? জীবন সার্থক হয় সে দৃশ্য দেখে। আর মনে থাকবে সে দেশের ডালিম রঙের মেয়েদের কথা। তারা এদেশের ছোটাই বিবি, সোনাভানু বা ময়না বিবি নয়—পরীর মতো স্থলন্দরী, দুখে আলতায় গোলা তাদের গায়ের রঙ। সারাদেহে রক্তাভ ‘যৈবন’ আঙুরের মতোই টইটস্থুর। তাদের চাষীর মেয়েদের প্রজাপতির মতো বেশ, রূপকথার রাজকন্যার মতো ভঙ্গিমা। যদি একজনকে দেখ, বা শোনো কাঁচভাঙার মতো, ঝরণার উদ্দামতার মতো হাসি, তাহলে কোনো স্বপ্নের রাজ্যে উধাও হয়ে যাবে তোমার মন। আনোয়ারের সে এক স্মৃতি।

বিশেষ করে মনে থাকবে সেই এমার কথা—তাদের তাঁবুর কাছে পাহাড়ের কোলে যাদের কাঠের ঘর, নিত্য যে বিকেল বেলায় বাড়ির সম্মুখের তৃণভূমি থেকে নদর গাই ছটিকে নিয়ে বাড়ি ফিরতো।

গরীবের ঘরের অল্পবয়সী মেয়ে এমা। তার সঙ্গে পরিচয় হোলো ঘটনাচক্রে। তারপর ঘনিষ্ঠতা। প্রথম প্রথম ভয়-সংকোচ অনুভব করেছে আনোয়ার। সাহেব দেখলেই কেমন যেনো ছোটো হয়ে যায় সে। কিন্তু অতি গরীব ঘরের মেয়ে এমার সঙ্গে ক্রমাগত মেলামেশার ফলে একদিন আর সে সংকোচটুকু রইলো না। বন্ধুদের পরামর্শ মতো সে তাকে এনে দিতো নানা উপহার। এমা মুগ্ধ হতো।

তারা দুজনে একদিন সন্ধ্যায় ঝরণার দিকে তাকিয়ে একটা গাছের নিচে বসেছিলো। আকাশে একটু বাঁকা চাঁদ। জ্যোৎস্না টলটল করছিলো ঝরণার জলে।

ভয়ে ভয়ে আনোয়ার এমার শুভ্র নিটোল একখানা হাত স্পর্শ করলো।

এমা একটু হেসে মুখ তুলে আনলো। ভয়ে ভয়ে সন্তর্পণে মোমের পুতুলের মতো এমার সৌগন্ধময় নরম দেহটিকে আনোয়ার সমস্ত ইন্দ্রিয় দিয়ে যতো না করেছিলো উপভোগ, তার চাইতে বেশি করেছিলো অনুভব। যাবার সময় নূতন একটা ঘাঘরা তৈরির টাকা চেয়েছিলো এমা। তবু সে সন্ধ্যাটি চিরকাল মনে থাকবে তার। এমার চুলে ছিলো কটা গন্ধ। পয়সার অভাবে তেল মাখা হতো না। আঁটোসাঁটো ভরপুর দেহটি পুরানো ঘামে-ভেজা জামায় মানাত না। সংসারে অগাধ দারিদ্র্য। বাবা রুগ্ন, মা বৃদ্ধা। এক ভাই ছিল, যুদ্ধে মারা গেছে। ছবেলা ভালো করে খেতেও পেতো না তারা। প্রায় একটি বছরই তো আনোয়ার ছিলো সেখানে। যথাসাধ্য সাহায্য করে এমাকে সে সম্পূর্ণ জয় করেছিলো।

ইচ্ছে করলে সেখানেই থেকে গিয়ে এমাকে বিয়ে করে ঘরকন্না পাতে পারত আনোয়ার। কিন্তু লড়াই বন্ধ হবার সঙ্গে সঙ্গেই ঘরে ফেরার কি রকম টান এসে গিয়েছিলো মনে।

জীবনে হয়তো আর এমার সঙ্গে দেখা হবে না। এমা কি তাকে মনে রাখবে? এমনি সকালে গাই ছুটি নিয়ে মাঠে নামত সে। আর কি পারবে কোনোদিন পর্বতসান্নুদেশের এমার সেই বাড়ির উঠোনে গিয়ে দাঁড়াতে?

আসার দিন বিদায় নিয়ে আসাও হয়নি তার কাছে।

: কে যানেন?

পাশের ক্ষেতে কর্মরত একজন চাষী ডেকে শুধায়। যথাযোগ্য জুবাব দিয়ে আবার অগ্রসর হয় আনোয়ার।

একটুও বদলায়নি গ্রাম। আগের মতোই ছপাশে বিশাল শস্যভরা মাঠ। কর্মরত চাষীর দল। অপরিচিতকেও ডেকে সেই আলাপের অন্তরঙ্গতা। পাশের নালায় জল সেচে মাছ ধরছে ছোটো ছোটো ঝাংটা ছেলেমেয়েরা। দূরে দূরে সন্তুর্পণে জলের কিনারায় তেমনি ঘাড় ডুবিয়ে বসে আছে বক। তার পদশব্দে ঘাড় তুলে ঐ ছেলেমেয়েদের মতোই তাকিয়ে থাকে তার দিকে।

হাওয়ায় জড়ানো শিশির। খেজুরকুঁড়ি আর রসের স্রবাস। শীতকালের মধুর গন্ধ। আনোয়ার অনুভব করে সত্যিই এবার নিজের দেশে এসেছে।

বাড়ি গিয়েও হয়তো বিশেষ পরিবর্তন দেখবে না। সবই আছে হয়তো আগের মতো। সেই খালপাড়ে কলাগাছে ঘেরা কুঁড়েঘর। পেছনে পুকুরঘাট।

বাবার আছে সেই পুরানো কাশির অসুখ। মায়ের গৃহস্থালি গোছাবার প্রাণান্ত প্রয়াস। আনোয়ারকে পেয়ে আবার খুশি হবে না তারা? আরো খুশি হবে তাদের পায়ে এতোদিনকার সঞ্চয় বাঙিল-বাঁধা টাকা আর এই সব উপহার পেয়ে। মা হয়তো দীর্ঘ দিন পরে তাকে কাছে কোলে নিয়ে কাঁদতে বসতে চাইবে। ধ্যাৎ, মায়ের যা স্বভাব!

বোনরা সব বিচিত্র উপহার পেয়ে আহ্লাদে অধীর! প্রশ্নের পর প্রশ্ন তুলে জর্জরিত করে তুলবে।

মা হয়তো বোনদের বলবে : কী নাচানাচি লাগাইছে হারামজাদিরা, শীগগির ভাত চড়াইয়া দে, কবে না কবে খাইয়া আইছে, মুখখানা শুখাইয়া গেছে, আহা!

তারপর কাছে এসে মাখায় হাত বুলিয়ে ডুকরে কেঁদে উঠবে : ওরে নিষ্ঠুরইয়া, তোর কি এই রহম দাগা দিয়া পলাইয়া যাওনডা উচিং অইছেলো ? একবারো ভাবলি না—

সে সব কাণ্ড করে অনেক লজ্জা দেবে মা । বাবা হয়তো টাকার বাঙিল কাপড়গুলো হাতে নাড়াচাড়া করতে করতে সম্মিতমুখে তাকিয়ে থাকবেন তার দিকে, খুশিতে উজ্জল মেয়েদের দিকে । খুশিতে তাদের ঝলমল করবে না মুখ ! যে রাগ আড়াই বছর আগে দেখে গেছে, তার আর কোনো চিহ্ন দেখবে না কোনোখানে ।

কিন্তু বোনদের যদি বিয়ে হয়ে গিয়ে থাকে ? তাহলে বাড়ি পৌঁছেই নৌকো নিয়ে তাদের আনতে বেরিয়ে পড়বে । তাদের আদরের ‘মেয়াভাই’ আনতে গেলে লাফিয়ে নৌকোয় উঠবে তারা । ছোটো আত্মরে বোন ফুলি ওরফে কামরুন্নেছা তাকে দেখে আনন্দে কেঁদে না ফেললে হয় !...

বড়োজনের মতো গম্ভীর সংযত নয় সে । তার প্রকৃতিটা অত্যন্ত চঞ্চল । হরদম্ ঝগড়া করতো তার সঙ্গে, বাপ মায়ের বকুনি খাওয়াতো, আবার পরক্ষণেই এসে ভাব করে যেতো ।

একদিন চড়ুইভাতি করবে ফুলি । বাড়ির সবারই তাতে দাওয়াৎ । আনোয়ার তামাশা করতে গিয়ে কী একটা জিনিস যেন নষ্ট করে ফেললো । ফুলি গিয়ে কাঁদো কাঁদো মুখে নালিশ করলে বাবার কাছে । কী কথায় তার মুখে মুখে জবাব দিতেই অজিউল্লা কান ধরে এক প্রচণ্ড চড় কশিয়ে দিলো তার গালে । আনোয়ার কোনো প্রতিবাদ করলো না । অভিমানে খেলো না চড়ুইভাতি । খেলো না রাত্রে । ফুলি

অপরোধী মতো দূরে দূরে রইলো। রান্নার অর্ধেক উৎসাহই যেন তার চলে গিয়েছিলো। কারো সাধাসাধিতে কান দিলো না আনোয়ার, সন্ধ্যার পরই ঘুমিয়ে পড়লো।

গভীর রাতে হঠাৎ তার ঘুম ভেঙে গেল। চেয়ে দেখে পাশে উবু হয়ে বসে আছে ফুলি। থতোমতো খেয়ে জিজ্ঞাসা করলে : চোপাড়াডায় খুব ব্যথা পাইছো ম্যাভাই ?

আনোয়ার নিরুত্তরে পাশ ফিরে গুলো।

ফুলি কান্নায় ভেঙে পড়লো : আমারে মাফ করো ম্যাভাই, আর কখনো এ রহম করমু না।

: ঠিক ?

: ঠিক। আল্লার কিরা। তুমি ওডো ম্যাভাই, খাও আইয়া। একলা উইঠ্যা চুপেসারে রানছি আবার তোমার লইগ্যা, ওডো।

: এই শীতে উইড্যা আবার রানছো ? পাগলী ! ভয় করলে না তোর ?

: বুঝু আছে না ! হে-ও তো চুলাহালে বইয়া রইছে তোমার লইগ্যা। লও শীগ্গরি, নইলে একলা আবার ডরাইবে।

তিন ভাইবোনের কাছে সে এক মধুর রাত। আনোয়ার কোথা থেকে অন্ধকারে চুরি করে খেজুর রস আনলো, আর আনলো নারিকেল, তারপর সেইরাতে ‘সিন্নি’ রাঁধা, শীতে গুটিশুটি দিয়ে উমুন ঘিরে চাপাস্বরে গল্প, তারপর কাড়াকাড়ি ভাগাভাগি করে খাওয়া—এমনকি ভোর রাতে ঘুম থেকে মা-বাবাকেও ডেকে তোলা।...

এদের ছেড়ে, এই জীবনকে ছেড়ে কেমন করে দেশ ত্যাগ করতে পেরেছিলো ভেবে তার বিস্ময়ের সীমা থাকে না। এবার আবার সেই

মুক্ত মধুর জীবন। খালে খালে মাছ ধরে, ভিটায় ভিটায় ফাঁদ পেতে ঘুঘু, ‘কোলায়’ ছিটকা পেতে বক শিকার করে, আবারও সেই রকম সব রোমাঞ্চকর রাত্রি উপভোগ করে সেইসব পুরোনো দিনগুলিকে সে ফিরিয়ে আনবে। তার সমস্ত দুর্নাম, সংসারের সমস্ত দারিদ্র্য ঘুচিয়ে দিয়ে বাপ-মা-বোনদের মুখে তৃপ্তি আর আনন্দের হাসি ফোটাবার সাধনা শুরু হবে তার। কতো দারিদ্র্য দেখে গেছে সংসারে! এবার দারিদ্র্যে সঞ্চিত এই অর্থে এক মধুর সংসার রচনা করবে সে, এক মধুর সংসার রচনা করবে সে দারিদ্র্যক্লিষ্ট পিতার সম্মুখে,—তার পাশে সে গিয়ে পরম শক্তি, অভয়বাণীর মতো দাঁড়াবে—আত্মক দারিদ্র্যের শত-সহস্র আঘাত, বর্মের মতো সব আঘাত আপন বুক নিয়ে সকলকে নিঃশঙ্ক করবে। আকাশের চাঁদের মতো অসম্ভব-আর অদ্ভুত মনে হবে তখন এমাকে!...

ময়না। ধানক্ষেতের পাশে আমার বাগানভরা বাড়ির মেয়ে ময়না কোথায় আছে এখন? ভিটার নালার ধারে উঁচু পাড়ের উপর দোতুল কাশের পাশে তাকে প্রথম দেখেছিলো আনোয়ার।...আজ্ঞো বুঝে উঠতে পারলো না তার চরিত্র—সেদিনকার রহস্য।...

নানা ভাবনার মধ্যে কখন জেলাবোর্ডের পথ ছেড়ে হাইস্কুলের পাশ দিয়ে বাড়ি যাবার সোজা পথ ধরেছে আনোয়ার।

স্কুলের ছেলেরা তার দিকে অনুসন্ধিৎসু চোখে তাকায়। শুকনো মাটির উপর আনোয়ারের নাল দেওয়া বুট শব্দ করে—খট-খট-খট।... ভারী পুটলিটা সে বদলে নেয় এ-কাঁধ থেকে ও-কাঁধে। উৎসাহে আগ্রহে সজীব আনোয়ারের কাঁধে তা বহনের এতোটুকু হুঃসহতা নেই, বরং আরো হালকা হয়ে পদক্ষেপগুলো দ্রুততর করে আনে।...

ঃ হণ্ট!

পেছনে কে একটি ছাত্র রসিকতা করে চৌঁচিয়ে ওঠে। আনোয়ার অভ্যাসবশে সত্যি থমকে দাঁড়িয়ে পড়ে; তারপর ব্যাপারটা বুঝে একটু লজ্জা পায়। কিন্তু রাগ করে না, হাসিমুখে পেছনে তাকিয়ে আবার অগ্রসর হয়।.....

কিন্তু ছুপুরের পরেই আবার তাকে নিজের দোকানের সম্মুখে দেখে চমকে ওঠে তারিণী। ধুলিধূসর উন্মাদ উদভ্রান্তের মতো তার চেহারা। দুই চোখে ব্যাকুল শূন্যতা।

তারিণীকে দেখে সে কাঁধের পুটলিটা ছুঁড়ে হাউমাউ করে কঁদে বলে : ক্যান তুমি আমারে তখন সব কইলা না খুড়া ? এইসব আমি কাগো লইগ্যা নেছেলাম !

তারিণী আস্তে আস্তে একখানা হাত রাখে তার কাঁধে : কইতে পারি নায় বাবা। আয় বয় আইয়া, এটু স্থির হ।—আনোয়ারকে নিয়ে সে বসায়।

আল্পপূর্বিক সমস্ত ইতিহাস ধীরে ধীরে বলে যায় তারিণী। ভাঙা বন্দরের পাড়ে বসে মন্থস্তরে আপন ভাঙন কাহিনী শুনতে শুনতে রোক্তমান আনোয়ারের চোখ-মুখে যে ব্যাকুলতা ফুটে ওঠে, তা দেখে ভয় পায় তারিণী। এই বন্দরকে দেখে যেমন মনে হয় কোনো লুক্ক সওদাগর রক্ত্র হস্তে এখানকার জীবনটুকু লুণ্ঠে নিয়ে ভাঙন এনেছে, আনোয়ারের মুখেও সেই রকম নিঃশেষিত ভয়াল ছায়া। তারিণী এক পেয়ালা চা করে তার দিকে বাড়িয়ে দেয় : কান্দিস না। বাপেরে

শাহেরবাহু

তো আর দেখলি না ; কিন্তু ঈশ্বর বাঁচাইয়া রাখলে মা-বুইনগো দেহা পাবি ।

মিথ্যা আশ্বাস দেয় তারিণী । ছ'বছর যাদের দেখা নেই, কে বলবে আনোয়ার আর কোনোদিন তাদের ফিরে পাবে কিনা ?

: ওরে পাগল, কইন্দা লাভ কী আর ? কান্দলেই তো পাবি না ।

নে চা-টা খাইয়া একটু ঠাণ্ডা হ—তারপর কী করবি ভাব দেহি ।

ভাঙা বন্দরের ভুতুড়ে দেহের উপর বিকেলের ছায়া নেমে এসেছে তখন । গাঙের বুকে ভাঙা বেলার রাঙা আলোর ঝলমলানি । পাড় ভাঙে—রূপ-রূপ ।

সেদিকে তাকিয়ে থাকতে থাকতে হাঁটুতে মুখ ঢেকে অকস্মাৎ এক সময় মেয়েমানুষের মতো ডুকরে কেঁদে ওঠে আনোয়ার ।

